MÔ-T'A DJÜN FOH-ING SHÜ. <u>馬太</u> 傳福音書

Mt. I.

Üô-pah-lah-hen 'Eo-dæ, Da-bih-go Ng-ts, Yiæ-su Kyitoh-go kô-pu. ² Üô-pah-lah-hen sang Yi-sah; Yi-sah sang Yüô-kôh; Yüô-kôh sang Yiu-da teng gyi hyüong-di; ³ Yiu-da teng sing-vu Da-mô sang Fah-leh-z teng Sah-lah; Fah-leh-z sang Yi-z-leng Yi-z-leng sang Üô-læn; ⁴ Üô-læn sang Üô-mi-nô-dah; Üô-mi-nô-dah sang Nô-jing; Nô-jing sang Sahmeng; ⁵ Sah-meng c'ü Lah-'eh sang Po-z; Po-z c'ü Lu-teh sang O-pah; O-pah sang Yiæ-si; Yiæ-si sang Da-bih wông.

亞伯拉罕後代、大闢個兒子、耶穌基督個家譜。²亞伯 拉罕生以撒,以撒生雅各,雅各生猶大等其兄弟,³猶大等 新婦大瑪生法勒士等撒拉,法勒士生以士崙,以士崙生亞 蘭,⁴亞蘭生亞米拿達,亞米拿達生拿順,拿順生撒門,⁵ 撒門娶喇合生<u>波士</u>,<u>波士</u>娶<u>路得</u>生阿伯,阿伯生耶西,耶 西生大闢王。

⁶ Da-bih wông c'ü U-li-üô-go *lao-nyüing* sang Sô-lo-meng; ⁷ Sô-lo-meng sang Lo-po-en; Lo-po-en sang Üô-pi-üô: Üô-pi-üô sang Üô-sah; Üô-sah sang Iah-sô-fah; Iah-sô-fah sang Iah-læn; Iah-læn sang U-si-üô; ⁹ U-si-üô sang Iah-tæn; Iah-tæn sang Üô-ha-z; Üô-ha-z sang Hyi-si-kyüô; ¹⁰ Hyi-si-kyüô sang Mô-nô-si; Mô-nô-si sang Üô-meng; Üô-meng sang Iah-si-üô; ¹¹ *pah-sing* lo-liah tao Pô-pi-leng z- 'eo, Iah-si-üô sang Yiæ-ko-nyi-üô teng gyi hyüong-di.

6大關王聚島利亞個老嫖生所羅門,⁷所羅門生羅波安,羅波安生亞比亞,⁸亞比亞生亞撒,亞撒生約沙法,約沙法生約蘭,約蘭生島西亞,⁹島西亞生約担,約担生亞哈士,亞哈士生希西家,¹⁰希西家生瑪拿西,瑪拿西生亞門,亞門生約西亞,¹¹百姓擄掠到巴比倫時候,約西亞生耶哥尼亞等其兄弟。

 $^{^{12}}$ Pah-singlo-liah tao Pô-pi-leng ts-'eo, Yiæ-ko-nyi-üô sang Sah-lah-t'ih; Sah-lah-t'ih sang Sô-lo-pô-pah; 13 Sô-lo-

pô-pah sang Üô-pi-üoh; Üô-pi-üoh sang Yi-li-üô-kying; Yi-li-üô-kying sang Üô-sô; ¹⁴ Üô-sô sang Sah-doh; Sah-doh sang Üô-kying; Üô-kying sang Yi-lih; ¹⁵ Yi-lih sang Yi-li-üô-sah; Yi-li-üô-sah sang Mô-tæn; Mô-tæn sang Yüô-kôh; ¹⁶ Yüô-kôh sang Mô-li-üô nen-nyüing Iah-seh; keh ziu-z sang Yiæ-su kyiao-leh Kyi-toh go Mô-li-üô.

12 百姓擄掠到巴比倫之後,耶哥尼亞生撒拉鐵,撒拉鐵生所羅巴伯,13 所羅巴伯生亞比鬱,亞比鬱生以利亞敬,以利亞敬生亞所,14 亞所生撒鐸,撒鐸生亞金,亞金生以律,15 以律生以利亞撒,以利亞撒生馬担,馬担生雅各,16 雅各生馬利亞男媳約瑟,箇就是生耶穌叫勒基督個馬利亞。

¹⁷ Ka-ni, dzong Üô-pah-lah-hen tao Da-bih keh-sing shü-dæ, long-tsong yiu jih-s dæ: dzong Da-bih tao pah-sing lo-liah tao Pô-pi-leng z-'eo, yia z jih-s dæ: dzong pah-sing lo-liah tao Pô-pi-leng z-'eo tao Kyi-toh, yi z jih-s dæ.

¹⁷ 介呢,從<u>亞伯拉罕</u>到<u>大關</u>箇星世代,攏總有十四 代。從大闢到百姓擄掠到巴比倫時候,也是十四代。從百 姓擄掠到巴比倫時候到基督, 又是十四代。

¹⁸ [1]YIÆ-SU Kyi-toh sang-go z-ken tsiao 'ô-veng ka: Gyi ah-nyiang Mô-li-üô yi-kying he peh Iah-seh, feh-zing dzing-ts'ing, be Sing-Ling ken-dong yiu-leh sing-yüing peh nying-kô teh-cü-de. ¹⁹ Gyi-go nen-nyüing Iah-seh z-go hao-nying, feh iao ming-tông-tông tao gyi me, keh-lah sing-siang s-'ô iao t'e-hweng-de. ²⁰ Gyi tsing-hao læ-kæn s-ts'eng keh-sing z-ken, Cü-go t'in-s mong li-hyiang yinc'ih-læ, teng gyi wô, "Da-bih-go 'eo-dæ Iah-seh, ng ky'i c'ü ng-go lao-nyüing Mô-li-üô kyü-læ, feh fông-teh-go; ing-we gyi yiu-tih-go t'æ z dzong Sing-Ling ka læ-go. ²¹ Gyi we sang ih-go Ng-ts, ng hao c'ü Gyi ming-z [2]YIÆ-SU; ing-we Gyi iao kyiu Gyi pah-sing c'ih gyi-lah ze-ky'in lihyiang."

¹⁸ <u>耶穌基督</u>生個事幹照下文介^[1]。其阿孃<u>馬利亞</u>已經 許撥<u>約瑟</u>,弗曾成親,被聖靈感動有了身孕撥人家得知 了。¹⁹ 其個男嬝<u>約瑟</u>是個好人,弗要明當當倒其楣,箇勒 心想私下要退婚了。²⁰ 其正好來間思忖箇星事幹,主個天 使夢裏向現出來,等其話:「<u>大關</u>個後代<u>約瑟</u>,爾去娶爾個老檂<u>馬利亞</u>歸來,弗妨得個。因為其有的個胎是從聖靈介來個。²¹ 其會生一個兒子,爾好取其名字<u>耶穌</u>^[2],因為其要救其百姓出其拉罪愆裏向。」

- [1] Pi da-kæ eo "Yiæ-su kyüông-seng keh nyin" tsao ng nyin. 比大概 謳「耶穌降生箇年」早五年。(原註)
- [2] Yiæ-su go ka-shih ziu-z Kyiu-cü. <u>耶穌</u>個解說就是救主。(原 註)
- ²³ Keh-sing ih-ts'ih-go z-ken tu z ka tso-fah, hao s-teh Cü t'ôh ih-go sin-cü-nying kông-ko-go shih-wô yiu yiao-nyiæn, z-ka wô, ²³ "Ts'ia-k'en yiu ih-go do-kwu-nyiang we yiu sing-yüing sang Ng-ts: nying-kô iao ts'ing-hwu Gyi ming-z YI-MÔ-NE-LIH;" [Y. 7. 14.] fæn-c'ih-læ ziu-z, JING-MING TENG AH-LAH DÔ-KÔ LÆ-TONG, ka i-s.
- ²³ 箇星一切個事幹都是介做法,好使得主託一個先知 人講過個說話有效驗,是介話:²³ 「且看有一個大姑娘會

有身孕生兒子。人家要稱呼其名字<u>以馬內力</u>; 」[Y. 7. 14.] 翻出來就是,神明等阿拉大家來東,介意思。

²⁴ Iah-seh diao-kao-cün-læ, i-leh Cü-go t'in-s feng-fu, ky'i c'ü gyi lao-nyüing kyü-læ: ²⁵ dæn-z feh teng gyi dong-zông, ih-dzih tao sang gyi deo-ih-go Ng-ts c'ih-læ; ming-z c'ü Gyi YIÆ-SU.

24 <u>約瑟</u>調覺轉來,依了主個天使吩咐,去娶其老嬝歸來。²⁵ 但是弗等其同牀,一直到生其頭一個兒子出來,名字取其耶穌。

Mt. II.

^[1]Hyi-lih wông z-'eo, Yiæ-su yi-kying sang-c'ih læ Yiu-t'a koh-go Pah-li-'eng di-fông, yiu kyi-go poh-lao dzong tong-pin tseo tao Yiæ-lu-sah-leng læ, z-ka wô, ² "Sang-c'ih tso Yiu-t'a nying-go Wông-ti Cü-kwu læ 'ah-li?

ing-we ah-lah læ tong-pin k'en-kyin Gyi-go sing-soh, ziu læ pa Gyi."

希律王時候^[1],<u>耶穌已經生出來猶太</u>國個<u>伯利恆</u>地方,有幾個博老從東邊走到<u>耶路撒冷</u>來,是介話:²「生出做<u>猶太</u>人個皇帝主顧來何裏?因爲阿拉來東邊看見其個星宿,就來拜其。」

[1] Pi da-kæ eo "Yiæ-su kyüông-seng keh nyin" tsao s nyin. 比大概謳「耶穌降生箇年」早四年。(原註)

³ Hyi-lih wông ih t'ing-meng ziu ky'ih-hoh-de; Yiæ-lu-sah-leng-go cong-nying yia z-ka. ⁴ Gyi ziu dziao-long long-tsong tsi-s-deo teng pah-sing-go doh-shü-nying, bunmeng gyi, Kyi-toh kæ sang læ 'ah-li. ⁵ Gyi-lah teng koh-wông wô, "Læ Yiu-t'a koh-go Pah-li-'eng di-fông: ing-we sin-cü-nying z-ka sia-lôh-tih, wô, ⁶ 'Yiu-da di-fông-go Pah-li-'eng, ng læ Yiu-da keh-sing ky'üih-veng li-hyiang bing-fi ting siao-go: ing-we dzong ng iao c'ih ih-go Cü-tsæ, z we tsiao-kwun Ngô Yi-seh-lih pah-sing go.' [Mi. 5. 2.]"

³ <u>希律</u>王一聽聞就喫惟了; <u>耶路撒冷</u>個衆人也是介。⁴ 其就召攏攏總祭司頭等百姓個讀書人, 盤問其, <u>基督</u>該生來何裏。⁵ 其拉等國王話: 「來<u>猶太</u>國個<u>伯利恆</u>地方。因為先知人是介寫落的,話: ⁶ 『<u>猶大</u>地方個<u>伯利恆</u>,爾來<u>猶大</u> 箇星闕份裏向並非頂小個。因為從爾要出一個主宰, 是會照管我以色列百姓個。』[Mi. 5. 2.]」

⁷ Keh-tsao Hyi-lih s-'ô eo keh-sing poh-lao læ, ts-si bun-meng gyi, keh sing-soh dza z-'eo C'ih-yin: ziu ts'a gyi-lah tao Pah-li-'eng ky'i, z-ka wô, "Ng-lah ts-si ky'i tang-t'ing keh Na-hwun-go z-ken; tang-t'ing-djôh, ziu læ pao hyiang ngô dao, peh ngô yia hao ky'i pa-pa Gyi." ⁹ Gyilah t'ing koh-wông-go shih-wô ky'i-de: læ tong-pin k'enkyin-ko-go sing-soh ziu ying-dao gyi-lah, ih-dzih tao Nahwun læ-kæn u-dông zông-deo, ziu deng-lôh-de. ¹⁰ Pohlao k'en-kyin sing-soh, liao-feh-teh hwun-hyi. 11 Tseotsing oh-lô, k'en-kyin Na-hwun teng Gyi ah-nyiang Mô-liüô, ziu p'oh-tao pa keh-go Na-hwun; wa-yiu hyiao-k'æ 'eh-ts, do-leh kying-ts, jü-hyiang, mah-yiah hyin peh Gyi

tso li-veh. ¹² *Keh-sing poh-lao* mong li-hyiang teh-djôh meh-z, eo gyi m-nao cün-ky'i kyin Hyi-lih; ziu dzong bih-da lu kyü tao zi-go di-fông ky'i-de.

⁷ 箇遭<u>希律</u>私下謳箇星博老來,仔細盤問其,箇星宿咋時候出現。就差其拉到<u>伯利恆</u>去,是介話:「爾拉仔細去打聽箇奶花個事幹。打聽着,就來報向我道,撥我也好去拜拜其。」⁹ 其拉聽國王個說話去了。來東邊看見過個星宿就引導其拉,一直到奶花來問鳥蕩上頭,就咸落了。¹⁰ 博老看見星宿,了弗得歡喜。¹¹ 走進屋落,看見奶花等其阿孃<u>馬利亞</u>,就撲倒拜箇個奶花。還有操開盒子,馱勒金子、乳香、沒藥獻撥其做禮物。¹² 箇星博老夢裏向得着默示,謳其嘸得好轉去見<u>希律</u>,就從別埭路歸到自個地方去了。

13 Kyü-ky'i ts-'eo, Cü-go t'in-s mong li-hyiang yin-c'ih, teng Iah-seh wô, "Bô-ky'i, ta-leh Na-hwun teng Gyi ah-nyiang dao tao Yiæ-gyih ky'i; læ keh-deo deng-kæn, teng-tao ngô tsæ wô hyiang ng dao: ing-we Hyi-lih iao zing keh-go Na-hwun hao djü-mih Gyi sing-ming." ¹⁴ Iah-seh

ziu bô-ky'i, lin-yia ta-leh Na-hwun teng Gyi ah-nyiang, pun tao Yiæ-gyih ky'i; ¹⁵ læ keh-deo ih-dzih deng tao Hyi-lih ling-cong: hao s-teh Cü t'ôh ih-go sin-cü-nying kông-ko-go shih-wô yiu yiao-nyiæn, z-ka wô, "Ngô dzong Yiæ-gyih yiu Ngô Ng-ts eo-c'ih-læ-de." ['O. 11.1.]

13 歸去之後,主個天使夢裏向現出,等<u>約瑟</u>話:「爬起,帶勒奶花等其阿孃逃到<u>埃及</u>去。來箇頭庉間,等到我再話向爾道。因為<u>希律</u>要尋箇個奶花好除滅其性命。」¹⁴ <u>約瑟</u>就爬起,連夜帶勒奶花等其阿孃,搬到<u>埃及</u>去。¹⁵ 來 箇頭一直庉到<u>希律</u>臨終。好使得主託一個先知人講過個說話有效驗,是介話:「我從<u>埃及</u>有我兒子謳出來了。」['O. 11.1.]

¹⁶ Keh-tsao Hyi-lih teh-cü be keh-sing poh-lao hong-p'in, long-do fah-ông; ziu tsiao gyi læ poh-lao u-dông meng-c'ih-læ-go z-'eo, ts'a nying ky'i pô Pah-li-'eng zing-li teng s-hyiang z liang-shü yi-'ô-go siao-wæn long-tsong djü-mih-diao. ¹⁷ Keh-tsao sin-cü Yiæ-li-mi kông-ko-liao shih-wô yiu yiao-nyiæn, z-ka wô, ¹⁸ "Læ Lah-mô di-fông"

t'ing-meng 'ao-li-da-k'oh, long-do pe-shông-go singhyiang; ziu-z Lah-kyih læ-tih k'oh gyi-go ng-ts, feh k'eng t'ing ky'ün, ing-we ng-ts m-neh-de." [Yl. 31. 15.]

¹⁶ 箇遭<u>希律</u>得知被箇星博老哄騙,弄大發快。就照其來博老烏蕩問出來個時候,差人去把<u>伯利恆</u>城裏等四鄉是兩歲以下個小娃攏總除滅掉。¹⁷ 箇遭先知<u>耶利米</u>講過了說話有效驗,是介話: ¹⁸ 「來<u>拉瑪</u>地方聽聞號淚大哭,弄大悲傷個聲響。就是<u>拉結</u>來的哭其個兒子,弗肯聽勸,因為兒子嘸得了。」[Yl. 31. 15.]

19 Hyi-lih si-ts, [1]yiu Cü-go t'in-s læ Yiæ-gyih di-fông mong li-hyiang yin-c'ih, teng Iah-seh wô, ²⁰ "Bô-ky'i, taleh Siao-wæn teng Gyi ah-nyiang, tao Yi-seh-lih di-fông ky'i: ing-we iao meo-'æ Siao-wæn sing-ming cü-kwu yi-kying si-de." ²¹ Iah-seh ziu bô-ky'i, ta-leh Siao-wæn teng Gyi ah-nyiang tao Yi-seh-lih di-fông læ-de. ²² T'ing-meng Üô-kyi-lao tsih gyi ah-tia Hyi-lih-go we, tso Yiu-t'a koh-go wông, feh-ken tao keh-deo ky'i. Mong li-hyiang yi teh-djôh meh-z, ziu cün-wæn tao Kyüô-li-li di-fông ky'i; ²³

deng-lôh ih-go zing-li, kyiao-leh Nô-sah-leh: hao s-teh keh-sing sin-cü-nying kông-ko-liao shih-wô yiu yiao-nyiæn, z-ka wô, "Nying-kô we ts'ing-hwu Gyi z Nô-sah-leh nying."

19 <u>希</u>律死仔^[1],有主個天使來<u>埃及</u>地方夢裏向現出,等<u>約瑟</u>話: ²⁰ 「爬起,帶勒小娃等其阿孃,到<u>以色列</u>地方去。因為要謀害小娃性命主顧已經死了。」 ²¹ <u>約瑟</u>就爬起,帶勒小娃等其阿孃到<u>以色列</u>地方來了。 ²² 聽聞<u>亞基老</u>接其阿爹<u>希</u>律個位,做<u>猶太</u>國個王,弗敢到箇頭去。夢裏向又得着默示,就轉彎到<u>加利利</u>地方去。 ²³ 底落一個城裏,叫勒拿撒勒。好使得箇星先知人講過了說話有效驗,是介話:「人家會稱呼其是拿撒勒人。」

[1] Pi da-kæ eo "Yiæ-su kyüông-seng keh nyin" tsao sæn nyin. 比大概 謳「耶穌降生箇年」早三年。(原註)

Mt. III.

Keh-go z-'eo 'Ang-si-li-go Iah-'en tao Yiu-t'a koh-go kw'ông-iæ di-fông læ djün kyiao, z-ka wô, ² "Ng-lah hao we-sing-cün-i; ing-we t'in-koh gying-long-læ-de." ³ Sin-cü Yi-sæ-üô sô wô, "Kw'ông-iæ di-fông yiu nying-go sing-hyiang læ-kæn eo, z-ka wô, 'Ng-lah hao ky'i be-bæn Cü-go lu, p'u-dzih Gyi-go ka-dao," [Y. 4O. 3.] keh ziu-z gyi. ⁴ Keh Iah-'en c'ün-go i-zông z loh-do mao; kyi-go kyiao-sing-ta z bi-go; ky'üoh-zih z wông-djong teng yia mih-dông.

箇個時候行洗礼個<u>約翰</u>到猶太國個曠野地方來傳教,是介話:²「爾拉好回心轉意,因為天國近攏來了。」³先知<u>以賽亞</u>所話:「曠野地方有人個聲響來問謳,是介話:『爾拉好去備辦主個路,鋪直其個街道,』」[Y. 40. 3.] 箇就是其。⁴ 箇<u>約翰</u>穿個衣裳是駱駝毛,繫個繳身帶是皮個,喫食是蝗蟲等野蜜糖。

⁵ Keh-go z-'eo Yiæ-lu-sah-leng, teng 'en Yiu-t'a difông, wa-yiu long-tsong deng læ Iah-dæn 'o pin-yin go nying, tu tseo-c'ih tao gyi u-sen læ; ⁶ tsiao-jing zi-go zeky'in, læ Iah-dæn 'o ziu Iah-'en-go si-li. ⁵ 箇個時候<u>耶路撒冷</u>,等咸<u>猶太</u>地方,還有攏總庉來<u>約</u> 但河邊沿個人,都走出到其烏碎來,⁶ 招認自個罪愆,來<u>約</u> 但河受約翰個洗禮。

⁷ Iah-'en k'en-kyin hyü-to Fah-li-sæ nying teng Saht'u-kæ nying læ ziu gyi-go si-li, teng gyi-lah wô, "Doh-dzôgo cong-tông! jü ts-ying ng-lah to-bi tsiang-læ-go ô-wông? 8 Ka-ni, hao kyih we-sing-cün-i cü-kwu kæ kyih go ko-ts. 9 Yia hao-vong zi læ-tih wô, "Üô-pah-lah-hen z ah-lah-go tsu-tsong: ngô wô hyiang ng-lah dao, Ziu-z keh-sing zahdeo, Jing-ming yia neng-keo s-teh gyi we tso Üô-pah-lahhen-go ts-seng. ¹⁰ Tsæ-wô, fu-deo yi-kying en-leh jü kengdeo: væn-pah feh kyih hao ko-ts go jü, pih iao tsôh-tao tiuleh ho-li. 11 Ngô z yüong shü teng ng-lah 'ang we-singcün-i-go si-li: dæn-z 'eo-jü ngô læ-go Cü-kwu, Gyi-go neng-ken do-jü ngô, ziu-z teng Gyi do 'a ngô yia ky'in hao; Gyi we yüong Sing-Ling teng ho, 'ang si-li peh ng-lah. 12 Gyi siu-li yiu feng-kyi do-tih, we yiang ken-zing Gyi sadziang-li-go koh; Gyi-go koh we siu-tsing ts'ông-li, k'ôngnyiæn yüong feh we u go ho siao-diao."

7 約翰看見許多法利賽人等撒土該人來受其個洗禮,等 其拉話:「毒蛇個種黨!誰指引爾拉躲避將來個啞喤?8介 呢,好結回心轉意主顧該結個果子。⁹也好留自來的話: 『亞伯拉罕是阿拉個祖宗。』我話向爾拉道,就是箇星石 頭,神明也能夠使得其會做亞伯拉罕個子孫。10 再話,斧 頭已經安勒樹根頭。凡百弗結好果子個樹, 必要斫倒丟勒 火裏。¹¹ 我是用水等爾拉行回心轉意個洗禮。但是後如我 來個主顧, 其個能幹大如我, 就是等其馱鞋我也欠好。其 會用聖靈等火,行洗禮撥爾拉。¹² 其手裏有糞箕馱的,會 揚乾淨其曬場裏個穀, 其個穀會收進倉裏, 糠驗用弗會熓 個火燒掉。」

¹³ [1]KEH-GO z-'eo Yiæ-su dzong Kyüô-li-li tseo tao Iah-dæn 'o, tao Iah-'en-go u-sen, iao ziu gyi si-li. ¹⁴ Iah-'en tsih-ih iao t'e-dz, wô, "Ngô ing-kæ ziu Ng-go si-li, Ng fæn-cün tao ngô u-sen læ ma?" ¹⁵ Yiæ-su we-teh gyi wô,

"Næn-kæn ts'ia ing-hyü z-de; ing-we ih-ts'ih-go kong-yi ah-lah tu kæ z-ka tso-dzing." Keh-tsao gyi ing-hyü-de.

¹³ 箇個時候^[1] 耶穌從<u>加利利</u>走到<u>約但</u>河,到<u>約翰</u>個烏碎,要受其洗禮。¹⁴ 約翰執一要推辭,話:「我應該受爾個洗禮,爾反轉到我烏碎來嗎?」¹⁵ 耶穌回答其話:「難間且應許是了,因爲一切個公義阿拉都該是介做成。」箇 遭其應許了。

[1] Y. 'E. 27. 耶 (穌)後(頭)27 (年)。(原註)

¹⁶ Yiæ-su si-li ziu-ko-ts, ziu dzong shü-go u-dông ka tseo-zông-læ: t'in k'æ-k'æ peh Gyi, ziu k'en-kyin Jing-ming-go Ling ziang ih-tsah beh-keh ka kông-lôh-læ, deng læ Gyi zông-deo: ¹⁷ wa-yiu dzong t'in-li yiu sing-hyiang, z-ka wô, "Keh z Ngô ts'ing-æ-go Ng-ts, Ngô ting teh-i-go."

16 <u>耶穌</u>洗禮受過仔,就從水個烏蕩介走上來。天開開 撥其,就看見神明個靈像一隻鵓鴿介降落來, 底來其上 頭。¹⁷ 還有從天裏有聲響,是介話:「箇是我親愛個兒 子,我頂得意個。」

Mt. IV.

Keh-tsao Yiæ-su be Sing-Ling ling tao kw'ông-iæ difông, hao peh mo-kwe s-s Gyi k'en. ² Gyi s-jih nyih-yia kying-zih, 'eo-deo du-kyi-de. ³ Keh s-s-go cü-kwu tseolong, teng Gyi wô, "Ng ziah z Jing-ming-go Ng-ts, hao eo keh-sing zah-deo pin tso ky'üoh-zih." ⁴ Yiæ-su we-teh *gyi*, wô, "*Shü-li* yiu sia-tih, 'Nying feh tæn-tsih k'ao-djôh ky'üoh-zih we weh; z iao k'ao-djôh Jing-ming-go k'eo-li kông-c'ih-læ kyü-tang-kyü shih-wô.' [Sm. 8. 3.]"

箇遭<u>耶穌</u>被聖靈領到曠野地方,好撥魔鬼試試其看。² 其四十日夜禁食,後頭肚飢了。³ 箇試試個主顧走攏,等其 話:「爾若是神明個兒子,好謳箇星石頭變做喫食。」⁴ <u>耶</u> <u>穌</u>回答其,話:「書裏有寫的:『人弗單只靠着喫食會 活,是要靠着神明個口裏講出來句打句說話。』[Sm. 8. 3.]」 ⁵ Keh-tsao mo-kwe ta Gyi tao sing-dzing li-hyiang, peh Gyi lih læ sing-din-go oh-nao-tsin, ⁶ teng Gyi wô, "Ng ziah z Jing-ming-go Ng-ts, hao t'iao-lôh-ky'i, ing-we Shü-li yiu sia-tih, 'Gyi we feng-fu Gyi-go t'in-s kwu-djôh Ng; gyi-lah siu we læ tông Ng, sæn-leh Ng-go kyiah bang-djôh zah-deo.'[S. 91. 11, 12.]" ⁷ Yiæ-su teng gyi wô, "*Shü-li* wa-yiu sia-tih, "Ng m-nao s-s Cü ng-go Jing-ming k'en.' [Sm. 6. 16.]"

⁵ 箇遭魔鬼帶其到聖城裏向,撥其立來聖殿個屋腦尖, ⁶ 等其話:「爾若是神明個兒子,好跳落去,因為書裏有寫 的:『其會吩咐其個天使顧着爾,其拉手會來擋爾,省勒 爾個腳碰着石頭。』」⁷ <u>耶穌</u>等其話:「書裏還有寫的: 『爾嘸得好試試主爾個神明看。』」

⁸ Mo-kwe tsæ ta Gyi tao ih-zo ting kao sæn-teng, pô t'in-'ô væn-koh teng gyi-lah-go yüong-wô peh Gyi k'en, ⁹ ziu teng Gyi wô, "Ng ziah p'oh-tao pa ngô, keh-sing long-tsong ngô we s-peh Ng." ¹⁰ Keh-tsao Yiæ-su teng gyi wô, "^[1]Sah-dæn, tseo-ko: ing-we *Shü-li* yiu sia-tih, "Tông-kæ

pa Cü ng-go Jing-ming, doh-meng voh-z Gyi." [Sm. 6. 13.]"

¹¹ Keh-tsao mo-kwe li-k'æ Yiæ-su, ky'i-de; ziu yiu t'in-s læ voh-z Gyi.

⁸ 魔鬼再帶其到一座頂高山頂,把天下萬國等其拉個榮華撥其看,⁹ 就等其話:「爾若撲倒拜我,箇星攏總我會賜撥爾。」¹⁰ 箇遭<u>耶穌</u>等其話:「<u>撒但</u>^[1],走過。因為書裏有寫的:『當該拜主爾個神明,獨門服侍其。』」¹¹ 箇遭魔鬼離開耶穌,去了,就有天使來服侍其。

[1] Ziu-z Mo-kwe. 就是魔鬼。(原註)

12 YIÆ-SU t'ing-meng Iah-'en [1]ky'ih-lôh *lao-kæn*, ziu kyü tao Kyüô-li-li ky'i: ¹³ li-k'æ-ts Nô-sah-leh, ky'i deng læ [2]hæ pin-yin-go Kyüô-pah-nong, ziu-z læ Si-pu-leng teng Neh-da-li-go di-ka: ¹⁴ s-teh sin-cü Yi-sæ-üô kông-ko-liao shih-wô yiu yiao-nyiæn, z-ka wô, ¹⁵ "Si-pu-leng teng Neh-da-li di-fông, læ Iah-dæn 'o nga-deo, hæ pin-yin u-sen, ziu-z deng bih-koh-nying go Kyüô-li-li, ¹⁶ heh-en u-sen deng-tih-go pah-sing yiu do-do liang-kwông k'en-kyin;

ziang ing-s ka tsô-en di-fông djü-tih-go cü-kwu, yiu kwông c'ih-ky'i tsiao-djôh gyi-lah." [Y. 9. 1, 2.]

12 <u>耶穌聽聞約翰</u>挈落牢監^[1],就歸到<u>加利利</u>去。¹³離開仔<u>拿撒勒</u>,去庉來海邊沿個<u>迦百農</u>^[2],就是來<u>西布倫</u>等納大利個地界。¹⁴使得先知<u>以賽亞</u>講過了說話有效驗,是介話: ¹⁵「<u>西布倫等納大利</u>地方,來<u>約但</u>河外頭,海邊沿烏碎,就是庉別國人個<u>加利利</u>,¹⁶黑暗烏碎庉的個百姓有大大亮光看見,像陰司介遮暗地方住的個主顧,有光出去照着其拉。」[Y. 9. 1, 2.]

[1] Y. 'E. 30. 耶 (穌)後(頭)30(年)。

[2] Y. 'E. 31. 耶 (穌)後(頭)31 (年)。

¹⁷ Dzong-ts'-yi-'eo Yiæ-su ky'i djün kyiao, z-ka wô, "Ng-lah kæ we-sing-cün-i; ing-we t'in-koh gying-long-læ-de."

¹⁷ 從此以後<u>耶穌</u>去傳教,是介話:「爾拉該回心轉意,因為天國近攏來了。」

¹⁸ Yiæ-su læ Kyüô-li-li hæ pin-yin læ-kæn tseo, k'en-kyin liang hyüong-di, ziu-z Si-meng kyiao-leh Pe-teh, teng gyi hyüong-di En-teh-lih, hæ-li læ-kæn 'ô mông, ing-we z k'ô-ng-go; ¹⁹ ziu teng gyi-lah wô, "Keng-leh Ngô læ, Ngô we peh ng-lah ky'i k'ô nying." ²⁰ Gyi-lah lih-k'eh ky'i-diao mông, keng-leh Gyi ky'i-de. ²¹ Yiæ-su yi tseo-ko-ky'i, k'en-kyin wa-yiu liang hyüong-di, ziu-z Si-pi-t'a-go ng-ts Yüô-kôh teng gyi hyüong-di Iah-'en, teng ah-tia Si-pi-t'a dô-kô læ jün-li, læ-kæn pu mông; ziu eo gyi-lah. ²³ Gyi-lah lih-k'eh li-k'æ jün teng ah-tia, keng-leh Gyi ky'i-de.

18 <u>耶穌來加利利</u>海邊沿來間走,看見兩兄弟,就是<u>西</u>門叫勒<u>彼得</u>,等其兄弟<u>安得烈</u>,海裏來間下網,因為是抲魚個,¹⁹ 就等其拉話:「跟勒我來,我會撥爾拉去抲人。」²⁰ 其拉立刻棄掉網,跟勒其去了。²¹ <u>耶穌</u>又走過去,看見還有兩兄弟,就是<u>西庇太</u>個兒子雅各等其兄弟約翰,等阿爹<u>西庇太</u>大家來船裏,來間補網,就謳其拉。²³ 其拉立刻離開船等阿爹,跟勒其去了。

²³ YIÆ-SU tseo-pin t'ong Kyüô-li-li di-fông, læ gyi-lah jü-we-dông-li kông dao-li, yi pô t'in-koh-go foh-ing djünk'æ, wa-yiu i pah-sing-lah yiang-yiang bing-t'ong, yiangyiang tsing-'eo. ²⁴ Gyi-go ming-sing læ t'ong Jü-li-üô difông tu yiang-k'æ-de. Væn-pah yiu-bing-go, feh-leng sohgo bing-tsing soh-go t'ong-kw'u, wa-yiu jih-mo-go, c'ütin-go, fong-t'æn-go keh-sing, tu ta gyi-lah tao Yiæ-su udông; Yiæ-su ziu teng gyi i-hao-de. 25 Dzong Kyüô-li-li, Dikyüô-po-li, Yiæ-lu-sah-leng, Yiu-t'a, teng Iah-dæn 'o-nga, keh-sing di-fông, tu yiu deh-ma-dziao nying læ keng-djôh Gyi.

23 <u>耶穌</u>走遍統<u>加利利</u>地方,來其拉聚會堂裏講道理, 又把天國個福音傳開,還有醫百姓拉樣樣病痛,樣樣症 候。²⁴ 其個名聲來統<u>敘利亞</u>地方都揚開了。凡百有病個, 弗論啥個病症啥個痛苦,還有入魔個、癡癲個、風癱個箇 星,都帶其拉到<u>耶穌</u>鳥蕩,<u>耶穌</u>就等其醫好了。²⁵ 從<u>加利</u> <u>利、第加波利、耶路撒冷、猶太</u>,等<u>約但</u>河外,箇星地 方,都有特買潮人來跟着其。

Mt. V.

Yiæ-su k'en-kyin keh-do-dziao nying, tseo-zông sænteng: Gyi zo-lôh-ts, meng-du tseo-long-læ. ² Yiæ-su k'æ k'eo kao-hyüing gyi-lah, z-ka wô:——

耶穌看見箇大潮人,走上山頂。其坐落仔,門徒走攏來。²耶穌開口教訓其拉,是介話:——

- ³ "KEH-SING" sing li-hyiang gyüong-go yiu foh-kyʻi; ing-we tʻin-koh z gyi-lah-go.
 - 3 「箇星心裏向窮個有福氣,因爲天國是其拉個。
- ⁴ "Keh-sing pe-shông-go yiu foh-ky'i; ing-we gyi-lah we teh-djôh en-we.
 - 4 「箇星悲傷個有福氣,因爲其拉會得着安慰。
- ⁵ "Keh-sing weng-ziu-go yiu foh-ky'i; ing-we gyi-lah we teh-djôh di-t'u tso ts'æn-nyih.
 - 5 「箇星溫柔個有福氣,因爲其拉會得着地土做產業。

- ⁶ "Keh-sing ziang du-kyi k'eo-k'eh ka ky'i-mo kongyi, yiu foh-ky'i; ing-we gyi-lah we teh-djôh i-sing-muntsoh.
- ⁶「箇星像肚飢口渴介去慕公義,有福氣,因爲其拉會 得着依心滿足。
- ⁷ "Keh-sing yiu æ-lin-sing go yiu foh-ky'i; ing-we gyilah we teh-djôh æ-lin.
 - ⁷「箇星有哀憐心個有福氣,因爲其拉會得着哀憐。
- ⁸ "Keh-sing sing-li ts'ing-kyih-go yiu foh-ky'i; ing-we gyi-lah we k'en-kyin Jing-ming.
 - 8 「箇星心裏淸潔個有福氣,因爲其拉會看見神明。
- ⁹ "Keh-sing ky'ün nying-kô 'o-moh go yiu foh-ky'i; ing-we gyi-lah we ts'ing-hwu z Jing-ming-go ng-nô.
- ⁹「箇星勸人家和睦個有福氣,因為其拉會稱呼是神明個兒囡。

- ¹⁰ "We-leh kong-yi-go yün-kwu peh nying-kô pih-næn go, yiu foh-ky'i; ing-we t'in-koh z gyi-lah-go.
- 10 「為了公義個緣故撥人家逼難個,有福氣,因為天國是其拉個。
- ¹¹ "Ziah yiu nying-kô we-leh Ngô-go yün-kwu zôh-mô *ng-lah*, pih-næn ng-lah, yüong yiang-yiang ôh shih-wô hwông-wô ng-lah, ng-lah tao yiu foh-ky'i. ¹² Hao hwun-hyi kw'a-weh; ing-we læ t'in-zông ng-lah-go pao-ing do-leh-kying: ing-we pi ng-lah zin-deo keh-sing sin-cü-nying, nying-kô yia z-ka pih-næn gyi.
- ¹¹「若有人家為了我個緣故警罵爾拉,逼難爾拉,用 樣樣惡說話謊話爾拉,爾拉倒有福氣。¹²好歡喜快活,因 為來天上爾拉個報應大勒緊,因為比爾拉前頭箇星先知 人,人家也是介逼難其。
- ¹⁸ "NG-LAH z t'in-'ô-go yin. Yin ziah shih-diao gyi 'æn-go mi-dao, wa-yiu soh-si hao long gyi 'æn ni? 'Eo-deo

z yiang-yiang m-yüong, tsih hao tao-leh nga-deo, peh nying-kô dah-diao.

- ¹⁸「爾拉是天下個鹽。鹽若失掉其鹹個味道,還有啥 西好弄其鹹呢?後頭是樣樣嘸用,只好倒勒外頭,撥人家 踏掉。
- 14 "Ng-lah z shü-kæn-zông-go liang-kwông. Ih-zo dzing-ts kyin læ sæn-teng, tsæ-ve k'en-feh-kyin-go. ¹⁵ Nying-kô tsæ-ve tin teng-tsæn fông-leh teo-dong-'ô, tsong z *fông-leh* teng-dæ-zông go, ziu tsiao-djôh 'o-kô li-hyiang nying. ¹⁶ Ng-lah-go liang-kwông yia z-ka kæ tsiao læ nying-kô min-zin; s-teh gyi-lah k'en-kyin ng-go hao 'ang-we, ziu we tsæn-me ng-lah t'in-zông-go Ah-tia.
- ¹⁴「爾拉是世間上個亮光。一座城子建來山頂,再艙 看弗見個。¹⁵ 人家再艙點燈盞放勒斗桶下,總是放勒燈檯 上個,就照着和家裏向人。¹⁶ 爾拉個亮光也是介該照來人 家面前,使得其拉看見爾個好行為,就會讚美爾拉天上個 阿爹。

¹⁷ "M-nao ts'eng Ngô læ, z iao hwe-diao lih-fah teng sin-cü-nying shih-wô; Ngô læ, feh-z iao hwe-diao gyi, z iao wun-djün gyi. ¹⁸ Ngô tsing wô hyiang ng-lah dao, Keh-go lih-fah, yiang-yiang wa feh-zing yiu yiao-nyiæn de, ziu-z ih-tin ih-wah, ih-dzih tao t'in-di fi-diao-go z-'eo, tu feh we fi-diao-go. ¹⁹ Keh-sing lih-li ziu-z ih-diao ting siao-go, ziah yiu nying we-be gyi, wa iao kao bih-nying ky'i we-be, kehgo nying læ t'in-koh-li iao sön gyi z ting siao-go. Ziah yiu nying i-dzong gyi, wa we kao bih-nying ky'i i-dzong, kehgo nying læ t'in-koh-li iao sön gyi z do-go. 20 Ngô wô hyiang ng-lah dao, Ng-lah-go kong-yi ziah feh ko-jü dohshü-nying teng Fah-li-sæ nying-go kong-yi, ng-lah tön feh neng-keo tseo-tsing t'in-koh-li ky'i.

¹⁷「嘸得好忖我來,是要毀掉律法等先知人說話。我來,弗是要毀掉其,是要完全其。¹⁸ 我眞話向爾拉道,箇個律法,樣樣還弗曾有效驗了,就是一點一劃,一直到天地廢掉個時候,都弗會廢掉個。¹⁹ 箇星律例就是一條頂小個,若有人違背其,還要教別人去違背,箇個人來天國裏

要算其是頂小個。若有人依從其,還會教別人去依從,箇個人來天國裏要算其是大個。²⁰ 我話向爾拉道,爾拉個公義若弗過如讀書人等<u>法利賽</u>人個公義,爾拉斷弗能夠走進天國裏去。

²¹ "Ng-lah t'ing-meng ^[1]kwu-z-tsin nying yiu ka wô, 'M-nao sah nying; væn-pah sah-nying-go, pih iao ding-ze.' ²² Ngô wô hyiang ng dao, Væn-pah vu-yün-vu-kwu ô-wông gyi hyüong-di cü-kwu, pih iao ding-ze: ziah yiu nying wô gyi hyüong-di, ^[2]Lah-kyüô, kwun-fu pih iao ding-ze: ziah yiu nying wô hyüong-di, [3]Mo-li, pih iao ding di-nyüoh-ligo ho siao. ²³ Keh-lah ng ta li-veh tao tsi-dæn-zin, læ kehdeo ziah kyi-teh hyüong-di teng ng yiu soh-go ün-'eng, ²⁴ ng-go li-veh læ tsi-dæn-zin fông-kæn-ts, sin ky'i teng hyüong-di siang-'o, 'eo-deo læ hyin li-veh. ²⁵ Ng teng tedeo wa dô-kô læ lu-zông, yüong kw'a-kw'a teng gyi kông-'o; k'ong-p'ô te-deo song ng peh kwun-fu, kwun-fu kao-fu peh ts'a-nying, ziu ky'ih ng lôh lao-kæn-li. ²⁶ Ngô tsing wô hyiang ng dao, Ziah yiu ih-go dong-din wa m-neh wænwun, ng tsong feh neng-keo lao-kæn-li tseo-c'ih-læ.

- ²¹「爾拉聽聞古時節^[1]人有介話:『嘸得好殺人,凡百殺人個,必要定罪。』²² 我話向爾道,凡百無緣無故啞喤其兄弟主顧,必要定罪。若有人話其兄弟,<u>拉加</u>^[2],官府必要定罪。若有人話兄弟,<u>魔利</u>^[3],必要定地獄裏個火燒。²³ 箇勒爾帶禮物到祭壇前,來箇頭若記得兄弟等爾有啥個冤恨,²⁴ 爾個禮物來祭壇前放問仔,先去等兄弟相和,後頭來獻禮物。²⁵ 爾等對頭還大家來路上,用快快等其講和,恐怕對頭送爾撥官府,官府交付撥差人,就挈爾落牢監裏。²⁶ 我眞話向爾道,若有一個銅鈿還嘸得還完,爾總弗能夠牢監裏走出來。
- [1] 'Ôh tsia wô, yiu kông peh kwu-z-tsin nying t'ing, z-ka wô. 或者話,有講撥古時節人聽是介話。(原註)
- [2] [3] Lah-kyüô, teng Mo-li, ziu-z Yiu-t'a nying zôh-mô shih-wô. 拉加等魔利,就是猶太人譽罵說話。(原註)

²⁷ "Ng-lah t'ing-meng kwu-z-tsin nying yiu ka wô, 'Mnao kæn-ying.' ²⁸ Ngô wô hyiang ng dao, Væn-pah k'enkyin nyü-nying ky'i ying-sing go cü-kwu, sing-li z yi-kying kæn-ying gyi ko-de. ²⁹ Ng-go jing-tsah ngæn-tsing ziah-z ta-li ng væn-ze, hao leo-c'ih, tiu-diao-ts: neng-s pah-t'i lihyiang ky'üih ih-yiang, feh iao weng-sing tiu-lôh dinyüoh-li ky'i. ³⁰ Ng jing-tsah siu ziah-z ta-li ng væn-ze, hao tsæn-lôh, tiu-diao-ts: neng-s pah-t'i li-hyiang ky'üih ih-yiang, feh iao weng-sing tiu-lôh di-nyüoh-li ky'i.

²⁷「爾拉聽聞古時節人有介話:『嘸得好姦淫。』²⁸ 我話向爾道,凡百看見女人起淫心個主顧,心裏是已經姦 淫其過了。²⁹ 爾個順隻眼睛若是帶累爾犯罪,好數出,丟 掉仔。能使百體裏向缺一樣,弗要渾身丟落地獄裏去。³⁰ 爾順隻手若是帶累爾犯罪,好斬落,丟掉仔。能使百體裏 向缺一樣,弗要渾身丟落地獄裏去。

³¹ "Yi yiu ka wô, 'Ziah yiu nying iao li-diao lao-nyüing, ing-kæ sia li-shü peh gyi." ³² Ngô wô hyiang ng dao, Ziah yiu nying, feh-z we-leh tso wॅa-nying go yün-kwu, li-diao

lao-nyüing, z 'æ gyi ky'i tso kæn-ying: ziah yiu nying ky'i c'ü li-diao-go *lao-nyüing*, yia z tso kæn-ying.

31 「又有介話:『若有人要離掉老媳,應該寫離書撥 其。』³² 我話向爾道,若有人,弗是為了做壞人個緣故, 離掉老媳,是害其去做姦淫。若有人去娶離掉個老媳,也 是做姦淫。

³³ "Ng-lah wa-yiu t'ing-meng kwu-z-tsin nying yiu ka wô, 'M-nao we-be vah-tsiu-go shih-wô; ng hyü-nyün peh Cü, tsong iao wæn-go.' ³⁴ Ngô wô hyiang ng dao, Ih-ngæn m-nao vah-tsiu. Yia m-nao pô t'in vah-tsiu, ing-we t'in z Jing-ming-go zo-we. ³⁵ Yia m-nao pô di *vah-tsiu*, ing-we *di* z Gyi-go dah-kyiah-teng. Yia m-nao tin-tin Yiæ-lu-sah-leng vah-tsiu, ing-we Yiæ-lu-sah-leng z keh-we do-do Wông-ti-go kying-dzing. ³⁶ Yia m-nao pô zi-go deo vah-tsiu, ing-we ziu-z ih-keng deo-fah peh gyi bah, peh gyi heh, ng tu tsofeh-læ. ³⁷ Dæn-z ng-lah-go shih-wô kæ ka kông, Z, wô z; feh-z, wô feh-z: ziah yiu kô-ts'eo, z dzong ôh-go i-s ka læ.

33 「爾拉還有聽聞古時節人有介話:『嘸得好違背罰 咒個說話,爾許願撥主,總要還個。』34 我話向爾道,一 眼嘸得好罰咒。也嘸得好把天罰咒,因為天是神明個座 位。35 也嘸得好把地罰咒,因為地是其個踏腳凳。也嘸得 好點點<u>耶路撒冷</u>罰咒,因為<u>耶路撒冷</u>是箇位大大皇帝個京 城。36 也嘸得好把自個頭罰咒,因為就是一根頭髮撥其 白,撥其黑,爾都做弗來。37 但是爾拉個說話該介講, 是,話是,弗是,話弗是。若有加湊,是從惡個意思介 來。

³⁸ "Ng-lah t'ing-meng yiu ka wô, 'Ngæn-tsing ti-wæn ngæn-tsing, ngô-ts' ti-wæn ngô-ts'.' ³⁹ Ngô wô hyiang ng dao, M-nao ky'i ti-dih ôh-*nying*: ziah yiu nying kwah ng jing-siu-pin pô-công, tsia-siu-pin yia hao nyin-cün peh gyi *kwah*. ⁴⁰ Ziah yiu nying iao ng-go pu-sæn tang-tsiang teng ng ky'üoh kwun-s, lin bao-ts yia hao peh gyi do-ky'i. ⁴¹ Ziah yiu nying ngang-iao ng tseo ih-li lu; yia hao teng gyi tseo liang li. ⁴² T'ao ng go cü-kwu, hao peh gyi; iao tsia ng go cü-kwu, m-nao we-foh gyi.

38 「爾拉聽聞有介話:『眼睛抵還眼睛,牙齒抵還牙齒。』39 我話向爾道,嘸得好去抵敵惡人。若有人刮爾順手邊巴掌,借手邊也好扭轉撥其刮。40 若有人要爾個布衫打賬等爾喫官司,連袍子也好撥其馱去。41 若有人硬要爾走一里路,也好等其走兩里。42 討爾個主顧,好撥其;要借爾個主顧,嘸得好回覆其。

⁴³ "Ng-lah t'ing-meng yiu ka wô, 'Ng-go ling-sô-kô hao æ-sih gyi; ng-go ün-kô hao u-su gyi.' 44 Ngô wô hyiang ng dao, Ng-go ün-kô yüong æ-sih gyi; tsiu-mô ng-lah cükwu, yüong coh-foh gyi; u-su ng-lah cü-kwu, yüong tao gyi hao; long-song ng pih-næn ng go cü-kwu, yüong t'i gyi tao-kao. 45 Z-ka ni, hao tso ng-lah T'in-Vu-go ng-nô; ingwe wa-nying teng hao-nying, Gyi tu s-teh Gyi-go nyih-deo c'ih-ky'i tsiao-djôh gyi; wa-yiu tsing-dzih nying teng feh tsing-dzih nying, tu kông-lôh yü peh gyi. 46 Ng-lah ziah ky'i æ-sih æ-sih ng-lah go cü-kwu, yiu soh-go pao-ing ni? Ziu-z keh-sing siu-zin-liang-go, gyi-lah zi næn-dao feh yia z-ka tso ma? 47 Ziah-z tæn tsiao-tsih zi-go hyüong-di, ka tso yiu soh-go kah-nga hao ni? Ziu-z keh-sing siu-zin-liang-go, gyi-lah næn-dao feh yia z-ka tso ma? ⁴⁸ Keh-lah ng-lah tso-nying kæ djün-be, ziang ng-lah T'in-Vu ka djün-be.

43 「爾拉聽聞有介話:『爾個鄰舍家好愛惜其,爾個冤家好惡愫其。』44 我話向爾道,爾個冤家用愛惜其,咒罵爾拉主顧,用祝福其,惡愫爾拉主顧,用到其好;弄送爾逼難爾個主顧,用替其禱告。45 是介呢,好做爾拉天父個兒囡。因為壞人等好人,其都使得其個日頭出去照着其。還有正直人等弗正直人,都降落雨撥其。46 爾拉若去愛惜愛惜爾拉個主顧,有啥個報應呢?就是箇星收錢糧個,其拉自難道弗也是介做嗎?47 若是單招接自個兄弟,介做有啥個格外好呢?就是箇星收錢糧個,其拉難道弗也是介做嗎?48 箇勒爾拉做人該全備,像爾拉天父介全備。

Mt. VI.

"NG-LAH tso hao z-ken, tön m-nao deh-we læ nyingkô min-zin hao peh gyi k'en: ziah-z ka, ng-lah-go T'in-Vu u-sen feh neng-keo teh-djôh pao-ing.

「爾拉做好事幹,斷嘸得好特為來人家面前好撥其 看。若是介,爾拉個天父烏碎弗能夠得着報應。

² "Keh-lah 'ang hao-z z-'eo, m-nao læ zi-go min-zin c'ü 'ao-deo, ziang keh-sing kô-hao-nying læ jü-we-dông-li teng do-ka-zông læ-kæn tso, deh-we hao peh nying-kô ts'ing-tsæn. Ngô tsing wô hyiang ng dao, Gyi-lah-go paoing yi-kying teh-djôh-de. ³ Dæn-z ng-noh 'ang hao-z, jing-tsah siu sô tso-go, m-nao peh tsia-tsah siu teh-cü, ⁴ s-teh ng-go hao-z we en-dong-dong-go: ka-ni ng-go Ah-tia, lin en-dong-dong *u-dông* tu k'en-kyin-go, Zi we ming-tông-tông pao ng.

²「箇勒行好事時候,嘸得好來自個面前吹號頭,像箇星假好人來聚會堂裏等大街上來間做,特為好撥人家稱讚。我眞話向爾道,其拉個報應已經得着了。³但是爾儂行好事,順隻手所做個,嘸得好撥借隻手得知,⁴使得爾個好

事會暗洞洞個。介呢爾個阿爹,連暗洞洞烏蕩都看見個, 自會明當當報爾。

⁵ "Tsæ-wô tao-kao z-'eo, m-nao ziang keh-sing kô-hao-nying ka: gyi-lah hwun-hyi læ jü-we-dông-li teng do-ka-zông-go s-ts'ô-lu-k'eo lih-ts tao-kao, deh-we hao peh nying-kô k'en. Ngô tsing wô hyiang ng dao, Gyi-lah-go pao-ing yi-kying teh-djôh-de. ⁶ Dæn-z ng-noh tao-kao z-'eo, hao tseo-tsing zi-go mih-feh-dong-fong vông-li, meng kwæn-ts, hao gyiu-gyiu ng-go Ah-tia lin en-dong-dong *u-dông* tu læ-tong-go: ka-ni ng-go Ah-tia, lin en-dong-dong *u-dông* tu k'en-kyin-go, we ming-tông-tông pao ng.

⁵「再話禱告時候,嘸得好像箇星假好人介。其拉歡喜來聚會堂裏等大街上個四岔路口立仔禱告,特為好撥人家看。我眞話向爾道,其拉個報應已經得着了。⁶但是爾儂禱告時候,好走進自個密弗洞風房裏,門關仔,好求求爾個阿爹連暗洞洞烏蕩都來東個。介呢爾個阿爹,連暗洞洞烏蕩都看見個,會明當當報爾。

⁷ "Ng-lah tao-kao, m-nao kông-ko yi kông, ziang kehsing bih-koh-nying ka: ing-we gyi-lah ts'eng, we-leh shih-wô kông-leh to pih-ding k'eng t'ing. ⁸ M-nao ziang gyi ka: ing-we feh-zing t'ao Gyi zin-deo, ng-lah sô iao-go tong-si, ng-go Ah-tia yi-kying hyiao-teh-de. ⁹ Keh-lah ng-lah kæ z-ka tao-kao:—

⁷「爾拉禱告,嘸得好講過又講,像箇星別國人介。因 為其拉忖,為了說話講勒多必定肯聽。⁸ 嘸得好像其介。因 為弗曾討其前頭,爾拉所要個東西,爾個阿爹已經曉得 了。⁹ 箇勒爾拉該是介禱告:——

"Ah-lah Ah-tia læ t'in-zông-go, dæn-nyün *long-tsong* tseng-kying Ng-go ming-deo: ¹⁰ dæn-nyün Ng-go koh we læ: dæn-nyün Ng-go ts-i we tso-dzing, læ di-'ô ziang læ t'in-zông ka-go. ¹¹ Iao ky'üoh go k'eo-liang kyih-mih s-peh ah-lah. ¹² Sô-diao ah-lah ze, ziang ah-lah sô-diao keh-sing teh-ze ah-lah go cü-kwu ka. ¹³ M-nao peh ah-lah tseo-tsing mi-'ôh li-hyiang, iao kyiu ah-lah c'ih hyüong-ôh li-

hyiang: ing-we koh-veng teng neng-ken teng yüong-wô, tao shü-shü-dæ-dæ tu z Ng-go. Üô-meng.

「阿拉阿爹來天上個,但願攏總算敬爾個名頭。¹⁰ 但願爾個國會來。但願爾個旨意會做成,來地下像來天上介個。¹¹ 要喫個口糧今末賜撥阿拉。¹² 赦掉阿拉罪,像阿拉赦掉箇星得罪阿拉個主顧介。¹³ 嘸得好撥阿拉走進迷惑裏向,要救阿拉出兇惡裏向。因為國份等能幹等榮華,到世世代代都是爾個。亞們。

- ¹⁴ "Ing-we ng-lah ziah sô-diao nying-kô-go ko-shih, ng-lah t'in-zông-go Ah-tia yia we sô-diao ng-lah-go ko-shih. ¹⁵ Ng-lah ziah feh k'eng sô-diao nying-kô-go ko-shih, ng-lah Ah-tia yia feh k'eng sô-diao ng-lah-go ko-shih.
- ¹⁴「因為爾拉若赦掉人家個過失,爾拉天上個阿爹也會赦掉爾拉個過失。¹⁵ 爾拉若弗肯赦掉人家個過失,爾拉阿爹也弗肯赦掉爾拉個過失。
- ¹⁶ "Wa-yiu kying-zih-go z-'eo, m-nao yiu iu-meng-go siang-mao, ziang keh-sing kô-hao-nying ka: ing-we gyi-lah

pin-wun min-seh, hao peh nying-kô k'en-c'ih gyi z læ-tih kying-zih. Ngô tsing wô hyiang ng dao, Gyi-lah pao-ing yi-kying teh-djôh-de. ¹⁷ Dæn-z ng-noh kying-zih, hao fu-fu deo, gyiang-gyiang min; ¹⁸ feh iao peh nying-kô k'en-c'ih, tsih iao peh ng lin en-dong-dong *u-dông* tu læ-tong-go Ahtia hao k'en-c'ih ng z læ-tih kying-zih: ng-go Ah-tia, lin en-dong-dong *u-dông* tu k'en-kyin-go, we ming-tông-tông pao ng.

¹⁶「還有禁食個時候,嘸得好有憂悶個相貌,像箇星假好人介。因為其拉變換面色,好撥人家看出其是來的禁食。我眞話向爾道,其拉報應已經得着了。¹⁷但是爾儂禁食,好嫐嫐頭,滰滰面,¹⁸ 弗要撥人家看出,只要撥爾連暗洞洞烏蕩都來東個阿爹好看出爾是來的禁食。爾個阿爹,連暗洞洞烏蕩都看見個,會明當當報爾。

¹⁹ "NG-LAH m-nao tsih-jü dzæ-veh læ di-zông, z cü-djong cü-diao, fah-siu me-læn, dao-zeh ts'ah dong t'eo-ky'i-go u-dông: ²⁰ iao tsih-jü dzæ-veh læ t'in-zông, z cü-djong ve cü-diao, ve fah-siu me-læn, dao-zeh ve ts'ah

dong t'eo-ky'i go u-dông. ²¹ Ing-we ng-lah-go dzæ-veh læ 'ah-li, ng-lah-go sing yia we læ 'ah-li.

- ¹⁹「爾拉嘸得好積聚財物來地上,是蛀蟲蛀掉,發鏽 黴爛,盜賊拆洞偷去個鳥蕩。²⁰ 要積聚財物來天上,是蛀 蟲瘤蛀掉,瘤發鏽黴爛,盜賊瘤拆洞偷去個鳥蕩。²¹ 因為 爾拉個財物來何裏,爾拉個心也會來何裏。
- ²² Ngæn-tsing z kyi-sing-go teng-tsæn. Ng-go ngæn-tsing ziah hao-go, weng-sing we liang-go. ²³ Ng-go ngæn-tsing ziah wa-go, weng-sing we en-go. Ng-go kwông ziah-z en-go, keh-go en soh-go yiu ka en ni?
- ²² 眼睛是肌身個燈盞。爾個眼睛若好個,渾身會亮個。²³ 爾個眼睛若壞個,渾身會暗個。爾個光若是暗個, 箇個暗啥個有介暗呢?
- ²⁴ "M-yiu ih-go nying neng-keo voh-z liang-go cünying-kô: 'ôh-tsia u-su dông-deo, æ-kying keh-deo; 'ôh-tsia ts'ing-gying dông-deo, k'en-ky'ing keh-deo. Jingming teng dzæ-veh ng feh neng-keo tu voh-z. ²⁵ Keh-lah

Ngô wô hyiang ng-lah dao, M-nao we-leh sing-ming zeomeng, soh-go hao ky'üoh, soh-go hao hah: yia m-nao weleh kyi-sing zeo-meng, soh-go hao c'ün. Sing-ming soh feh-z pi ky'üoh-zih wa kwe-djong; kyi-sing soh feh-z pi c'ün-tsiah wa kwe-djong ma? 26 Ts'ia k'en-k'en keh-sing t'in-li-go tiao; gyi-lah feh 'ô iang, feh siu-keh, yia feh siutsing koh-ts'ông-li, ng-lah-go T'in-Vu yia we iang gyi. Nglah soh feh-z pi gyi kwe-djong ma? ²⁷ Tsæ-wô ng-lah, ziu-z zeo-meng, jü neng-keo to tso ih-k'eh nying? ²⁸ Wa-yiu dzawe læ-tih zeo i-c'ün? Hao ts'eng-ts'eng keh-sing din-li-go tsông-lông hwô, gyi dza do-ky'i-læ; gyi yi feh lao-loh, yi feh tso pu: ²⁹ Ngô wô hyiang ng dao, Ziu-z Sô-lo-meng ting üong-go z-'eo, gyi-go c'ün-tsiah yia feh gyih-jü ih-tô tsônglông hwô. ³⁰ Keh-go yia-ts'ao, kyih-mih wa læ-tong, mingtsiao ziu tiu-leh ho-lu-li, Jing-ming wa we z-ka tsông-pæn gyi; 'o-hwông ng-lah, siao siang-sing go cü-kwu ma? 31 Keh-lah hao-vong zeo-meng, læ-tih wô, Ah-lah yiu soh-go hao ky'üoh, soh-go hao hah, soh-go hao c'ün? 32 (keh-sing

tu z bih-koh-nying sô tang-sön-go:) ing-we keh-sing ihts'ih-go tong-si, ng-lah-go T'in-Vu hyiao-teh tu z ng iao yüong-go. ³³ Ng-lah sin ky'i tang-sön Jing-ming-go koh, teng Gyi-go kong-yi; keh-sing ih-ts'ih tu we kô-ts'eo peh ng. ³⁴ Keh-lah m-nao we-leh ming-tsiao zeo-meng: ming-tsiao we zeo-meng ming-tsiao-go z-ken. Ih-nyih kwun ihnyih-go lao-kw'u keo-de.

24 「嘸有一個人能夠服侍兩個主人家。或者惡愫蕩 頭,愛敬箇頭;或者親近蕩頭,看輕箇頭。神明等財物爾 弗能夠都服侍。²⁵ 箇勒我話向爾拉道, 嘸得好為了性命愁 悶,啥個好喫,啥個好喝。也嘸得好為了肌身愁悶,啥個 好穿。性命啥弗是比喫食還貴重, 肌身啥弗是比穿着還貴 重嗎? 26 且看看箇星天裏個鳥, 其拉弗下秧, 弗收割, 也 弗收進穀倉裏,爾拉個天父也會養其。爾拉啥弗是比其貴 重嗎?²⁷ 再話爾拉,就是愁悶,誰能夠多做一刻人?²⁸ 還 有咋會來的愁衣穿?好忖忖箇星田裏個蟑螂花,其咋大起 來。其又弗勞碌,又弗做布。²⁹ 我話向爾道,就是所羅門 頂勇個時候,其個穿着也弗及如一朵蟑螂花。30 箇個野 草,今末還來東,明朝就丟勒火爐裏,神明還會是介裝扮其,何況爾拉,小相信個主顧嗎?³¹ 箇勒好留愁悶,來的話,阿拉有啥個好喫,啥個好喝,啥個好穿?³² (箇星都是別國人所打算個。)因為箇星一切個東西,爾拉個天父曉得都是爾要用個。³³ 爾拉先起打算神明個國,等其個公義。箇星一切都會加湊撥爾。³⁴ 箇勒嘸得好為了明朝愁悶,明朝會愁悶明朝個事幹。一日管一日個勞苦夠了。

Mt. VII.

"NG-LAH m-nao p'i-bing *nying-kô*, *nying-kô* yia ve læ p'i-bing ng-lah: ² ing-we ng-lah p'i-bing *nying-kô* dza-go, p'i-bing ng-lah yia we dza-go; ng-lah liang peh nying-kô dza-go, liang peh ng-lah yia we dza-go. ³ Ng dza-we k'en-c'ih hyüong-di ngæn-tsing li-hyiang yiu ih-ngæn hwe-dzing, feh ts'eng-tao zi-go ngæn-tsing yiu ih-keng tong-liang læ-tih? ⁴ Ng dza-we hao teng hyüong-di wô, 'Ng-go ngæn-tsing-li keh ih-ngæn hwe-dzing peh ngô i-c'ih-ts;'

ng-zi-go ngæn-tsing tao yiu ih-keng tong-liang læ-tih? ⁵ Kô-hao-nying, sin i-c'ih ng-zi ngæn-tsing-li-go tong-liang; 'eo-deo ng neng-keo k'en ming-bah, ky'i i-c'ih hyüong-di ngæn-tsing-li-go hwe-dzing.

「爾拉嘸得好批評人家,人家也গ來批評爾拉。² 因為爾拉批評人家咋個,批評爾拉也會咋個。爾拉量撥人家咋個,量撥爾拉也會咋個。³ 爾咋會看出兄弟眼睛裏向有一眼灰塵,弗忖到自個眼睛有一根棟樑來的?⁴ 爾咋會好等兄弟話:『爾個眼睛裏箇一眼灰塵撥我拡出仔。』爾自個眼睛倒有一根棟樑來的?⁵ 假好人,先拡出爾自眼睛裏個棟樑,後頭爾能夠看明白,去拡出兄弟眼睛裏個灰塵。

- ⁶ "Tseng-ky'i-go tong-si m-nao peh wun-kyi; ng-lah-go cü-ts yia m-nao tiu læ nyi-cü min-zin; zông-k'ong-p'ô *nyi-cü* kyiah dah-diao-ts, wa iao nyin-cün læ ngao ng.
- ⁶「尊起個東西嘸得好撥黃狗,爾拉個珠子也嘸得好丟 來泥豬面前,尚恐怕泥豬腳踏掉仔,還要扭轉來咬爾。

7 "Ng-lah" ky'i t'ao, tsong we peh ng; ky'i zing, tsong we zing-djôh; ky'i tao meng, tsong we k'æ peh ng. ⁸ Ingwe væn-pah z t'ao-go cü-kwu, tu teh-djôh; z zing-go cü-kwu, tu zing-djôh; z tao meng go cü-kwu, tu we k'æ peh gyi. ⁹ Ng-lah-go cong-nyiang 'ah-li ih-go nying, ziah-z zigo ng-ts læ t'ao ih-go mun-deo, we coh ih-kw'e zah-deo peh gyi? ¹⁰ læ t'ao ih-kwang ng, we coh ih-kwang dzô peh gyi ma? ¹¹ Ng-lah se-tsih z ôh-nying, ziah hyiao-teh pô hao tong-si s-peh ng-nô, 'o-hwông ng-lah t'in-zông Ah-tia feh keng-kô iao pô hao tong-si s-peh gyiu Gyi go cü-kwu ma?

⁷「爾拉去討,總會撥爾;去尋,總會尋着;去搗門,總會開撥爾。⁸因為凡百是討個主顧,都得着;是尋個主顧,都尋着;是搗門個主顧,都會開撥其。⁹爾拉個中央何裏一個人,若是自個兒子來討一個饅頭,會給一塊石頭撥其?¹⁰來討一梗魚,會給一梗蛇撥其嗎?¹¹爾拉雖即是惡人,若曉得把好東西賜撥兒囡,何況爾拉天上阿爹弗更加要把好東西賜撥求其個主顧嗎?

- ¹² "Keh-lah ze-bin ng-lah iao nying-kô dza dæ ng, ng yia iao z-ka ky'i dæ gyi: keh-*kyü* yiu lih-fah teng sin-cünying-go *shih-wô* pao-kweh-tsing dzæ-nen.
- ¹² 「箇勒隨便爾拉要人家咋待爾,爾也要是介去待 其。箇句有律法等先知人個說話包括進在內。
- ¹³ "NG-LAH hao dzong keh ih-deo 'ah-tsah-go meng tseo-tsing-ky'i; ing-we tao mih-vông ky'i, keh-go meng yia kw'eh-ts'iah, keh-go lu yia kw'un-do, dzong gyi ka tseo-tsing-ky'i-go cü-kwu yia to: ¹⁴ dæn-z tao weh-ming ky'i, keh-go meng yia 'ah-tsah, keh-go lu yia gyih-gah, zing-djôh-go cü-kwu yia ky'üih.
- 13 「爾拉好從箇一頭狹窄個門走進去。因為到滅亡去,箇個門也闊綽,箇個路也寬大,從其介走進去個主顧也多。¹⁴ 但是到活命去,箇個門也狹窄,箇個路也及軋,尋着個主顧也缺。
- ¹⁵ "Ng-lah hao kwu-djôh keh-sing kô sin-cü-nying, gyi-lah tao ng-go u-dông læ, *nga-deo* z c'ün-leh yiang bi, li-

deo z hyüong-ôh-go za-lông. ¹⁶ Ng-lah k'en gyi kyih-go kots, hao hyiao-teh gyi. Dzong ts'-bang cong-nyiang nændao yiu tsah ts-bu-dao ma? dzong ts'-hwu cong-nyiang næn-dao *yiu tsah* vu-hwô-ko ma? ¹⁷ Z-ka-go, z hao jü, tsong kyih hao ko-ts; z wa jü, tsong kyih wa ko-ts. ¹⁸ Hao jü feh neng-keo kyih wa ko-ts; wa jü yia feh neng-keo kyih hao ko-ts. ¹⁹ Væn-pah feh kyih hao ko-ts go jü, tu tsôh-tao tiu læ ho-li. ²⁰ Ka-ni k'en gyi-lah ko-ts, hao hyiao-teh gyi.

¹⁵「爾拉好顧着箇星假先知人,其拉到爾個烏蕩來, 外頭是穿勒羊皮,裏頭是兇惡個豺狼。¹⁶ 爾拉看其結個果 子,好曉得其。從刺棚中央難道有摘紫葡萄嗎?從刺虎中 央難道有摘無花果嗎?¹⁷ 是介個,是好樹,總結好果子; 是壞樹,總結壞果子。¹⁸ 好樹弗能夠結壞果子,壞樹也弗 能夠結好果子。¹⁹ 凡百弗結好果子個樹,都斫倒丟來火 裏。²⁰ 介呢看其拉果子,好曉得其。

²¹ "Bing feh-z væn-pah ts'ing-hwu Ngô 'Cü! Cü!' go, tu hao tseo-tsing t'in-koh-li ky'i; tsih-yiu i Ngô t'in-zông Ahtia ts-i tso-go cü-kwu *hao tseo-tsing-ky'i*. ²² Tao keh ih-nyih

yiu hyü-to nying we teng Ngô wô, 'Cü! Cü! ah-lah t'ôh Ng-go ming-deo næn-dao m̆-teh mi-læ z-ken kông-ko ma? t'ôh Ng-go ming-deo næn-dao m̆-teh ôh-kyü ken-c'ih-ko ma? t'ôh Ng-go ming-deo næn-dao m̆-teh hyü-to jing-tsih tso-ko ma?' ²³ Keh-tsao Ngô we ming-ming wô hyiang gyilah dao, Ngô dzong-læ m-neh nying-teh ng-lah; ng-lah tso fi-li z-ken cü-kwu hao li-k'æ Ngô ky'i.'

²¹「並弗是凡百稱呼我『主!主!』個,都好走進天國裏去。只有依我天上阿爹旨意做個主顧好走進去。²²到箇一日有許多人會等我話:『主!主!阿拉託爾個名頭難道嘸得未來事幹講過嗎?託爾個名頭難道嘸得惡鬼趕出過嗎?託爾個名頭難道嘸得許多神蹟做過嗎?』²³箇遭我會明明話向其拉道:『我從來嘸得認得爾拉,爾拉做非禮事幹主顧好離開我去。』

²⁴ "Keh-lah væn-pah t'ing-meng Ngô keh-sing shih-wô, i-leh gyi ky'i tso-go cü-kwu, Ngô pi-fông gyi ziang ih-go ts'ong-ming nying ky'i-zao gyi-go oh læ zah-deo-zông:
²⁵ yü lôh-lôh-læ, kông-shü meh-zông-læ, fong c'ü-ko-læ,

tu djông-djôh keh-tsing oh, gyi m-neh tih-tao; ing-we ziang-kyiah fông læ zah-deo-zông. ²⁶ Væn-pah t'ing-meng Ngô keh-sing shih-wô feh ky'i tso go cü-kwu, hao-pi-ziang ih-go nyü-beng nying, ky'i-zao gyi-go oh læ sô-nyi-zông: ²⁷ yü lôh-lôh-læ, kông-shü meh-zông-læ, fong c'ü-ko-læ, tu djông-djôh keh-tsing oh, gyi ziu tih-tao: gyi-go tih-tao li'æ-go."

²⁴「箇勒凡百聽聞我箇星說話,依勒其去做個主顧, 我比方其像一個聰明人去造其個屋來石頭上。²⁵ 雨落落 來,江水沒上來,風吹過來,都撞着箇進屋,其嘸得跌 倒。因爲像腳放來石頭上。²⁶ 凡百聽聞我箇星說話弗去做 個主顧,好比像一個愚笨人,去造其個屋來沙泥上。²⁷ 雨 落落來,江水沒上來,風吹過來,都撞着箇進屋,其就跌 倒。其個跌倒厲害個。」

²⁸ YIÆ-SU keh-sing shih-wô kông-hao, keh-do-dziao nying tu hyi-gyi Gyi-go kao-hyüing: ²⁹ ing-we kao-hyüing gyi-lah ziang yiu gyün-ping go, feh ziang keh-sing doh-shü-nying ka.

Mt. VIII.

YIÆ-SU tseo-lôh sæn, yiu ih-do-dziao nying kengdjôh Gyi.

耶穌走落山,有一大潮人跟着其。

² Ziu yiu ih-go sang da-mô-fong cü-kwu læ pa Gyi, wô, "Cü, Ng ziah k'eng-go, neng-keo i ngô ken-zing." ³ Yiæ-su siu sing-c'ih-læ, en gyi ih-en, wô, "Ngô k'eng-go, ng hao ken-zing." Da-mô-fong bing lih-k'eh ziu ken-zing-de. ⁴ Yiæ-su teng gyi wô, "Tön m-nao wô hyiang nying-kô dao; tæn-tsih ky'i peh tsi-s k'en ih-k'en, wa-yiu hyin-zông Mo-si sô feng-fu-go foh-li, hao peh gyi-lah tso bing-kyü."

²就有一個生大麻风主顧來拜其,話:「主,爾若肯個,能夠醫我乾淨。」³耶穌手伸出來,按其一按,話:

「我肯個,爾好乾淨。」大麻风病立刻就乾淨了。⁴ <u>耶穌</u>等 其話:「斷嘸得好話向人家道,單只去撥祭司看一看,還 有獻上摩西所吩咐個福禮,好撥其拉做憑據。」

⁵ Yiæ-su tseo-tsing Kyüô-pah-nong go z-'eo, yiu ih-go pah-tsong tseo-læ gyiu-gyiu Gyi, z-ka wô, ⁶ "Cü, ngô-go yüong-nying sang fong-t'æn bing oh-lô kw'eng-kæn, t'ong-leh kw'u-feh-ko." ⁷ Yiæ-su teng gyi wô, "Ngô ky'i i gyi hao." ⁸ Pah-tsong we-teh *Gyi* wô, "Cü, Ng tao ah-lah sôpin læ, ngô feh ken-tông: Ng tsih-siao wô ih-kyü, ngô-go yüong-nying ziu we hao-gyi. ⁹ Ing-we ngô z voh bih-nying kæ-kwun, yia yiu ping voh ngô kæ-kwun: ngô eo ih-go ky'i, ziu ky'i; eo ih-go læ, ziu læ; eo ngô nu-boh ky'i tso ih-yiang z-ken, gyi ziu ky'i tso." 10 Yiæ-su t'ing-meng ziu hyi-gyi, teng keh-sing keng-kæn-go nying wô, "Ngô tsing wô hyiang ng-lah dao, Ka do siang-sing-go sing, ziu-z læ Yi-seh-lih pah-sing cong-nyiang Ngô yia m-neh p'ongkyin-ko. ¹¹ Wa-yiu Ngô wô hyiang ng dao, Dzong tong-pin dzong si-pin yiu hyü-to nying we læ, teng Üô-pah-lah-hen,

Yi-sah, Yüô-kôh, læ t'in-koh-li dô-kô zo-zih: ¹² dæn-z keh-sing *t'in*-koh-go ng-ts iao ken-c'ih tao nga-deo heh-en-go di-fông; keh-deo pih yiu ngao-leh ngô-ts' di-k'oh-go sing-hyiang." ¹³ Yiæ-su yi teng pah-tsong wô, "Hao kyü-ky'i; tsiao ng siang-sing-go sing hao teng ng tso-dzing." Gyi-go yüong-nying k'eo-k'eo keh-go z-'eo ziu hao-de.

5 耶穌走進迦百農個時候,有一個百總走來求求其,是 介話: 6 「主,我個傭人生風癱病屋落睏間,痛勒苦弗 過。」7耶穌等其話:「我去醫其好。」8百總回答其話: 「主,爾到阿拉舍邊來,我弗敢當。爾只消話一句,我個 傭人就會好其。9因為我是服別人該管,也有兵服我該管。 我謳一個去,就去; 謳一個來,就來。謳我奴僕去做一樣 事幹,其就去做。」10 耶穌聽聞就稀奇,等箇星跟問個人 「我眞話向爾拉道, 介大相信個心, 就是來以色列百 話: 姓中央我也嘸得碰見過。11 還有我話向爾道,從東邊從西 邊有許多人會來, 等亞伯拉罕、以撒、雅各, 來天國裏大 家坐席。12 但是箇星天國個兒子要趕出到外頭黑暗個地 方, 箇頭必有咬勒牙齒啼哭個聲響。」¹³ 耶穌又等百總

話:「好歸去,照爾相信個心好等爾做成。」其個傭人扣 扣箇個時候就好了。

¹⁴ YIÆ-SU tseo-tsing Pe-teh-go oh-li, k'en-kyin gyi-go dziang-m fah dziao-nyih kw'eng-kæn: ¹⁵ ziu en-en gyi-go siu, dziao-nyih bing ziu t'e-de: *keh-go nyü-nying* bô-ky'i-læ kong-ing gyi-lah.

14 <u>耶穌</u>走進<u>彼得</u>個屋裏,看見其個丈姆發潮熱睏間。 15 就按按其個手,潮熱病就退了。箇個女人爬起來供應其 拉。

¹⁸ Tao yia-kwʻa yiu nying ta-leh hyü-to jih-mo-go cü-kwu tao Yiæ-su u-dông læ: *Yiæ-su* yüong ih-kyü shih-wô ken-cʻih keh-sing kyü, wa-yiu i-hao keh-sing long-tsong sang-bing-go nying: ¹⁷ s-teh sin-cü Yi-sæ-üô kông-ko-liao shih-wô yiu yiao-nyiæn, z-ka wô, "Ah-lah-go kwʻu-næn Gyi-zi ting-leh-kyʻi; ah-lah-go bing-tʻong *Gyi-zi* tʻiao-leh-kyʻi." [Y. 53. 4.]

16 到夜快有人帶勒許多入魔個主顧到<u>耶穌</u>烏蕩來。<u>耶</u> 無用一句說話趕出箇星鬼,還有醫好箇星攏總生病個人。¹⁷ 使得先知<u>以賽亞</u>講過了說話有效驗,是介話:「阿拉個苦 難其自頂勒去,阿拉個病痛其自挑勒去。」[Y. 53. 4.]

¹⁸ YIÆ-SU k'en-kyin yiu deh-ma-dziao nying Zi-go sing-pin dön-ky'ün læ-tong, ziu feng-fu meng-du tao tengen ky'i. ¹⁹ Yiu ih-go doh-shü-nying tseo-long-læ, teng Gyi wô, "Sin-sang, Ng feh-leng tao 'ah-li ky'i, ngô iao keng-leh-ky'i." ²⁰ Yiæ-su teng gyi wô, "Wu-li yiu dong, t'in-li-go tiao yiu k'o; dæn-z Nying-go Ng-ts m-teh dengsing-ts c'ü." ²¹ Gyi-go meng-du li-hyiang yi yiu ih-go teng Gyi wô, "Cü, peh ngô kyü-ky'i, ah-tia sin en-tsông-hao." ²² Yiæ-su teng gyi wô, "Keng Ngô læ; peh keh-sing si-nying ky'i tsông gyi-zi-go si-nying."

¹⁸ <u>耶穌</u>看見有特買潮人自個身邊團圈來東,就吩咐門 徒到對岸去。¹⁹ 有一個讀書人走攏來,等其話:「先生, 爾弗論到何裏去,我要跟勒去。」²⁰ <u>耶穌</u>等其話:「狐狸 有洞,天裏個鳥有窠,但是人個兒子嘸得咸身之處。」²¹ 其個門徒裏向又有一個等其話:「主,撥我歸去,阿爹先 安葬好。」²² <u>耶穌</u>等其話:「跟我來,撥箇星死人去葬其 自個死人。」

²³ Yiæ-su t'iao-lôh jün, Gyi meng-du keng-leh-ky'i. ²⁴ Hæ-li-go shü long-do hen-ky'i-læ, s-teh jün be lông kæ-djü: Yiæ-su kw'eng-joh-tih. ²⁵ Meng-du tseo-long-ky'i, eo Gyi diao-kao, wô, "Cü, kyiu ah-lah: ah-lah iao tao-meh-de!" ²⁶ Yiæ-su teng gyi-lah wô, "Siao siang-sing go cü-kwu, tæn-ts dza-we ka siao?" Ze-siu bô-ky'i-læ, tsah-vah fong teng hæ; ziu t'a-t'a-bing-bing-de. ²⁷ Keh-sing nying tu hyi-gyi, z-ka wô, "Keh-go nying dza do! lin fong teng hæ tu we i-jing Gyi."

23 <u>耶穌</u>跳落船,其門徒跟勒去。²⁴ 海裏個水弄大揻起來,使得船被浪蓋住。<u>耶穌</u>睏熟的。²⁵ 門徒走攏去,謳其調覺,話:「主,救阿拉。阿拉要倒沒了!」²⁶ <u>耶穌</u>等其拉話:「小相信個主顧,膽子咋會介小?」隨手爬起來,責罰風等海。就太太平平了。²⁷ 箇星人都稀奇,是介話:

「箇個人咋大!連風等海都會依順其。」

²⁸ Yiæ-su ih tao te-ngen Keh-keh-sô di-fông, yiu lianggo jih-mo cü-kwu ting li-'æ, s-teh m-nying ken tseo-ko keh-da lu, dzong veng-k'o-li tseo-c'ih-læ p'ong-djôh Gyi: ²⁹ ziu hyiang-hyiang eo-ky'i-læ, wô, "Jing-ming-go Ng-ts Yiæ-su, ah-lah teng Ng yiu soh-go siang-ken? z-'eo m-neh tao, Ng we dông-deo læ mo-næn ah-lah ma?" 30 Yün-tin udông yiu ih-do-dziao nyi-cü læ-kæn ky'üoh zih. 31 Kehsing kyü gyiu Yiæ-su, z-ka wô, "Ng ziah ken ah-lah c'ih, hao peh ah-lah tseo-tsing nyi-cü de-li ky'i." 32 Yiæ-su teng gyi-lah wô, "Ky'i." Gyi-lah tseo-c'ih, ziu tao nyi-cü de-li ky'i: 'o-dziao nyi-cü ziu dzong sæn-ngæn ts'ön-lôh hæ-li, tsing-sah-de. ³³ K'en nyi-cü go nying peng-leh-ky'i, pô keh-sing ih-ts'ih-go z-ken, lin jih-mo cü-kwu z-ken, tao zing-li ky'i t'ong-cü. 34 'Eh zing-li tu tseo-c'ih-læ, we-we Yiæ-su: ih k'en-kyin, ziu gyiu Gyi li-k'æ gyi-lah-go di-ka.

28 <u>耶穌</u>一到對岸<u>革革沙</u>地方,有兩個入魔主顧頂厲害,使得嘸人敢走過箇埭路,從墳窠裏走出來碰着其。²⁹ 就響響謳起來,話:「神明個兒子耶穌,阿拉等爾有啥個

相干?時候嘸得到,爾會蕩頭來磨難阿拉嗎?」³⁰ 遠點烏蕩有一大潮泥豬來間喫食。³¹ 箇星鬼求<u>耶穌</u>,是介話:「爾若趕阿拉出,好撥阿拉走進泥豬隊裏去。」³² <u>耶穌</u>等 其拉話:「去。」其拉走出,就到泥豬隊裏去。和潮泥豬 就從山岩竄落海裏,浸煞了。³³ 看泥豬個人奔勒去,把箇 星一切個事幹,連入魔主顧事幹,到城裏去通知。³⁴ 合城 裏都走出來,會會<u>耶穌</u>。一看見,就求其離開其拉個地 界。

Mt. IX.

Yiæ-su t'iao-lôh jün, du-ko tao Gyi-zi-go peng-dzing læ.

耶穌跳落船, 渡過到其自個本城來。

² Yiu ih-go fong-t'æn cü-kwu, p'u-pæn kw'eng-ts, nying-kô dæ tao Gyi u-sen læ. Yiæ-su k'en-kyin gyi-lah yiu siang-sing-go sing, teng fong-t'æn cü-kwu wô, "Ngô ng-ts,

hao fông-sing; ng-go ze sô-diao-de." ³ Yiu kyi-go doh-shünying sing-li z-ka wô, "Keh-go Nying læ-tih kông sih-dohgo shih-wô." 4 Yiæ-su hyiao-teh gyi-lah-go i-s, ziu wô, "Nglah sing-li dza-we dzeng wa i-s? ⁵ Wa-z wô, Ng-go ze sôdiao-de, wa-z wô, Bô-ky'i-læ tseo, —tao-ti 'ah-li ih-yiang vüong-yi? ⁶ Næn-kæn peh ng-lah hao hyiao-teh Nying-go Ng-ts læ shü-kæn-zông yiu sô-ze-go gyün-ping, (ziu teng fong-t'æn cü-kwu wô,) Hao bô-ky'i-læ, do-leh p'u-pæn kyü oh-li ky'i." ⁷ Gyi ziu bô-ky'i, kyü oh-li ky'i-de. ⁸ Kehdo-dziao nying k'en-kyin tu hyi-gyi; ziu ts'ing-tsæn Jingming, ing-we Gyi yiu ka do gyün-ping s-peh nying.

「好爬起來,馱勒鋪板歸屋裏去。」⁷其就爬起,歸屋裏去了。⁸ 箇大潮人看見都稀奇,就稱讚神明,因為其有介大權柄賜撥人。

⁹ YIÆ-SU dzong keh u-sen ka ky'i, k'en-kyin ih-go nying, ming-z kyiao-leh Mô-t'a, læ wu-liang-vông zo-kæn, teng gyi wô, "Keng Ngô læ." Gyi ziu bô-ky'i-sing, keng-leh Yiæ-su ky'i-de.

⁹<u>耶穌</u>從箇烏碎介去,看見一個人,名字叫勒<u>馬太</u>,來 戶糧房坐間,等其話:「跟我來。」其就爬起身,跟勒<u>耶</u> 穌去了。

10 Yiæ-su læ gyi oh-lô zo-zih, yiu hyü-to siu-zin-liang nying teng ze-nying tseo-læ, teng Yiæ-su lin meng-du dô-kô zo-lôh. ¹¹ Fah-li-sæ nying k'en-kyin, teng Gyi meng-du wô, "Ng-lah-go Sin-sang dza-we teng siu-zin-liang nying ze-nying dô-kô ky'üoh-væn?" ¹² Yiæ-su t'ing-meng, teng gyi-lah wô, "K'ông-gyin-go nying hao-vong i-sang, yiu-bing-go nying iao-go. ¹³ 'Ngô sô hwun-hyi, feh-z foh-li, z dz-pe-sing,' ['O. 6. 6.] keh-tsih shü dza-go i-s, ng-lah hao

ky'i ts'eng ming-bah: ing-we Ngô læ, feh-z eo tsing-dzihgo nying we-sing-cün-i, z eo ze-nying we-sing-cün-i."

10 <u>耶穌</u>來其屋落坐席,有許多收錢糧人等罪人走來,等<u>耶穌</u>連門徒大家坐落。¹¹ <u>法利賽</u>人看見,等其門徒話:「爾拉個先生咋會等收錢糧人罪人大家喫飯?」¹² <u>耶穌</u>聽聞,等其拉話:「康健個人好留醫生,有病個人要個。¹³ 『我所歡喜,弗是福禮,是慈悲心,』['O. 6. 6.] 箇節書咋個意思,爾拉好去忖明白。因爲我來,弗是謳正直個人回心轉意,是謳罪人回心轉意。」

¹⁴ Keh-go z-'eo Iah-'en-go meng-du tao Yiæ-su u-dông læ, wô, "Ah-lah teng Fah-li-sæ nying peh-djông læ-tih kying-zih, Ng-go meng-du tao feh kying-zih, keh z dza-go?" ¹⁵ Yiæ-su teng gyi-lah wô, "O hao-nyih go nying-k'ah, sing-lông wa teng gyi-lah dô-kô læ-tong, dza hao peshông ni? dæn-z tsiang-læ-go nyih-ts sing-lông we teng gyi-lah li-k'æ, keh-tsao we kying-zih-gyi. ¹⁶ M-yiu nying yüong ih-kw'e ^[1]sing pu ky'i pu gyiu i-zông; ing-we keh-kw'e pu-tih-go iao pang-se keh-gyin i-zông, gyi-go p'o-

dzæn ziu yü-kô do-de. ¹⁷ Yia feh yüong gyiu bi-dæ tsi sing tsiu; k'ong-p'ô bi-dæ pao-k'æ, tsiu yia tao-diao, bi-dæ yia long-wæn: tsong z yüong sing bi-dæ tsi sing tsiu, ka liang-yiang tu pao-djün-de."

- 14 箇個時候約翰個門徒到<u>耶穌</u>烏蕩來,話:「阿拉等 <u>法利賽</u>人不常來的禁食,爾個門徒倒弗禁食,箇是咋 個?」¹⁵ <u>耶穌</u>等其拉話:「賀好日個人客,新郎還等其拉 大家來東,咋好悲傷呢?但是將來個日子新郎會等其拉離 開,箇遭會禁食其。¹⁶ 嘸有人用一塊新^[1]布去補舊衣裳。 因為箇塊補的個要網碎箇件衣裳,其個破綻就愈加大了。¹⁷ 也弗用舊皮袋齒新酒。恐怕皮袋爆開,酒也倒掉,皮袋也 弄環。總是用新皮袋齒新酒,介兩樣都保全了。」
- [1] 'Ôh-tsia wô, ngang-sao-sao, m-neh ngô-kwông-go. 或者話, 硬燥燥, 嘸得砑光個。(原註)
- ¹⁸ YIÆ-SU tsing-hao teng gyi-lah læ-tong kông kehsing shih-wô, yiu ih-go kwun læ pa Gyi, wô, "Ngô-go nön keh-zông z si-kæn-de: tsih-yiu Ng læ, siu en gyi ih-en, we

weh-gyi." ¹⁹ Yiæ-su ziu lih-ky'i-læ, keng-leh gyi ky'i; meng-du yia *dô-kô ky'i*.

¹⁸ <u>耶穌</u>正好等其拉來東講箇星說話,有一個管來拜其,話:「我個囡箇晌是死間了。只有爾來,手按其一按,會活其。」¹⁹ <u>耶穌</u>就立起來,跟勒其去。門徒也大家去。

²⁰ Yiu ih-go nyü-nying hyüih-leo bing yiu jih-nyi nyin de, læ *Yiæ-su* 'eo-pe tseo-long-læ, moh-moh Gyi i-zông ken-den. ²¹ Ing-we gyi sing li-hyiang wô, "Ngô tæn-tsih-siao moh-moh Gyi i-zông, ziu yiu kyiu-sing." ²² Yiæ-su nyin-cün, k'en-kyin gyi, wô, "Nön, ng hao fông-sing; z ng siang-sing-go sing kyiu ng de." Keh-go nyü-nying tông-z ziu hao-de.

20 有一個女人血漏病有十二年了,來<u>耶穌</u>後背走攏來,摸摸其衣裳衦頭。²¹ 因為其心裏向話:「我單只消摸 摸其衣裳,就有救星。」²² <u>耶穌</u>扭轉,看見其,話: 「囡,爾好放心。是爾相信個心救爾了。」箇個女人當時 就好了。 ²³ Yiæ-su ih tao kwun-go oh-lô, k'en-kyin ih-pæn c'ü-'ông wa-yiu ih-do-dziao nying nao-nyih-bang-sang, ²⁴ ziu teng gyi-lah wô, "Tseo-ko-ts; nyiang-ts m-neh si-de, z kw'eng-joh-tih." Gyi-lah ziu lang-siao Gyi. ²⁵ Keh-dziao nying ken-c'ih-ts, *Yiæ-su* tseo-tsing-ky'i nyiah gyi siu, nyiang-ts ziu bô-ky'i-læ. ²⁶ Keh-go fong-sing ziu læ keh-t'ah di-fông tao-c'ü yiang-k'æ-de.

²³ <u>耶穌</u>一到管個屋落,看見一班吹行還有一大潮人鬧 熱彭生,²⁴ 就等其拉話:「走過仔。孃子嘸得死了,是睏 熟的。」其拉就冷笑其。²⁵ 箇潮人趕出仔,<u>耶穌</u>走進去捏 其手,孃子就爬起來。²⁶ 箇個風聲就來箇埭地方到處揚開 了。

²⁷ Yiæ-su dzong keh-deo ka kyʻi, yiu liang-go hah-ts keng-leh Gyi, hyiang-hyiang læ-tih eo, z-ka wô, "Da-bih-go Ng-ts, æ-lin ah-lah." ²⁶ Tseo-tsing ih-tsing oh-li, hah-ts tseo-long Gyi u-sen; Yiæ-su teng gyi-lah wô, "Keh-go z-ken, ng-lah siang-sing Ngô neng-keo tso feh?" Gyi-lah wô, "Cü, ah-lah siang-sing-go." ²⁹ Yiæ-su ziu moh-moh gyi-lah

ngæn-tsing, z-ka wô, "Tsiao ng-lah siang-sing-go sing hao teng ng tso-dzing." ³⁰ Gyi-lah ngæn-tsing ziu k'æ-k'æ-de. Yiæ-su ting-côh gyi-lah, wô, "Ts'in-ding m-nao peh nying-kô teh-cü." ³¹ Dæn-z gyi-lah ih tseo-c'ih, pô Gyi ming-sing læ keh-t'ah di-fông tao-c'ü yiang-k'æ-de.

27 <u>耶穌</u>從箇頭介去,有兩個瞎子跟勒其,響響來的 謳,是介話:「大闢個兒子,哀憐阿拉。」²⁸ 走進一進屋 裏,瞎子走攏其烏碎。<u>耶穌</u>等其拉話:「箇個事幹,爾拉相信我能夠做弗?」其拉話:「主,阿拉相信個。」^{29 <u>耶</u>穌就摸摸其拉眼睛,是介話:「照爾拉相信個心好等爾做成。」³⁰ 其拉眼睛就開開了。<u>耶穌</u>叮囑其拉,話:「千定 嘸得好撥人家得知。」³¹ 但是其拉一走出,把其名聲來箇 埭地方到處揚開了。}

³² Gyi-lah tseo-c'ih-go z-'eo, yiu nying ta-leh ih-go kyü vu-tih-go ô-ts tao Gyi u-sen læ. ³³ Keh-go kyü ih ken-c'ih, ô-ts ziu kông-c'ih shih-wô læ-de: keh-do-dziao nying tu hyi-gyi, z-ka wô, "Læ Yi-seh-lih di-fông dzong m-neh

yiu keh-cü-ka z-ken k'en-kyin-ko." ³⁴ Dæn-z Fah-li-sæ nying wô, "Gyi z k'ao-djôh kwe-wông ken-c'ih kyü."

32 其拉走出個時候,有人帶勒一個鬼附的個啞子到其 烏碎來。³³ 箇個鬼一趕出,啞子就講出說話來了。箇大潮 人都稀奇,是介話:「來<u>以色列</u>地方從嘸得有箇株介事幹 看見過。」³⁴ 但是<u>法利賽</u>人話:「其是靠着鬼王趕出 鬼。」

³⁵ YIÆ-SU tseo-cün kôh zing-li kôh hyiang-ts'eng, læ gyi-lah jü-we-dông-li kông dao-li, yi pô *t'in*-koh-go foh-ing djün-k'æ, wa-yiu i pah-sing-lah yiang-yiang bing-t'ong, yiang-yiang tsing-'eo. ³⁶ K'en-kyin keh-do-dziao nying, ziu fah dz-pe-sing æ-lin gyi-lah, ing-we ^[1]læ-tih t'eh-lih, yi liu-lôh-t'a-hyiang, tsing-ziang m-nying dzing-kwun-go yiang ka. ³⁷ Keh-tsao teng meng-du wô, "Nyin-dzing da-joh, tso-kong-go nying ky'üih: ³⁸ keh-lah ng-lah kæ gyiu siu-keh-go Cü-nying-kô ts'a kong-nying c'ih-læ hao siu-keh."

35 <u>耶穌</u>走轉各城裏各鄉村,來其拉聚會堂裏講道理, 又把天國個福音傳開,還有醫百姓拉樣樣病痛,樣樣症 候。³⁶ 看見箇大潮人,就發慈悲心哀憐其拉,因為來的^[1] 脫力,又流落他鄉,正像嘸人成管個羊介。³⁷ 箇遭等門徒 話:「年成大熟,做工個人缺。³⁸ 箇勒爾拉該求收割個主 人家差工人出來好收割。」

[1] 'Ôh-tsia wô, dziah-lih-de. 或者話,着力了。(原註)

Mt. X.

Ziu eo-long Gyi jih-nyi-go meng-du, s-peh gyi-lah gyün-ping hao ken-c'ih ao-tsao kyü, wa-yiu hao i yiang-yiang bing-t'ong, yiang-yiang tsing-'eo.

就謳攏其十二個門徒,賜撥其拉權柄好趕出鏖糟鬼, 還有好醫樣樣病痛,樣樣症候。

² Keh jih-nyi s-du-go ming-z z ka-go: di-ih, Si-meng kyiao-leh Pe-teh, teng gyi hyüong-di En-teh-lih; Si-pi-t'a-

go *ng-ts* Yüô-kôh, teng gyi hyüong-di Iah-'en; ³ Fi-lih, teng Pô-to-lo-mæ; To-mô, teng siu-zin-liang-go Mô-t'a; Üô-leh-fi-go *ng-ts* Yüô-kôh, teng Leh-pæ, ziu-z ts'ing-hwu Dah-t'a go; ⁴ Kyüô-nô-go Si-meng, teng Kyüô-liah-go Yiu-da, ziu-z ma-diao Yiæ-su go cü-kwu.

² 箇十二使徒個名字是介個:第一,西門叫勒<u>彼得</u>,等 其兄弟<u>安得烈</u>;西庇太個兒子雅各,等其兄弟約翰;³ <u>腓</u> 力,等巴多羅買;多馬,等收錢糧個馬太;亞勒腓個兒子 雅各,等勒拜,就是稱呼達太個;⁴ 迦拿個西門,等加略個 猶大,就是賣掉耶穌個主顧。

⁵ Yiæ-su ts'a keh jih-nyi-go nying c'ih-ky'i, feng-fu gyi-lah, z-ka wô:——

5耶穌差箇十二個人出去,吩咐其拉,是介話:——

"M-nao tao bih-koh-nying di-fông kyʻi, yia m-nao tseo-tsing Sah-mô-li-üô nying-go zing-li: ⁶ neng-s tao Yi-seh-lih keh-dzoh shih-diao-kæn-go yiang u-dông kyʻi. ⁷ Ng-lah i-lu hao djün kyiao, z-ka wô, 'T'in-koh gying-long-

læ-de.' ⁸ Bing-nying, ng-lah hao i gyi hao; da-mô-fong, hao long gyi ken-zing; si-nying, hao weh gyi cün-læ; kyü, hao ken gyi c'ih: ng-lah z bah-bah teh-læ-go, hao bah-bah s-peh nying-kô.

「嘸得好到別國人地方去,也嘸得好走進<u>撒瑪利亞</u>人個城裏。⁶能使到<u>以色列</u>箇族失掉間個羊烏蕩去。⁷爾拉依路好傳教,是介話:『天國近攏來了。』⁸病人,爾拉好醫其好;大麻瘋,好弄其乾淨;死人,好活其轉來;鬼,好趕其出。爾拉是白白得來個,好白白賜撥人家。

9 "Ng-lah-go liao-kyiao-li m-nao ^[1]kyiao kying-ts, nying-ts, dong-din; ¹⁰ lu-zông yüong-go ho-zih, shông-t'ao i-zông, 'a, æ-dziang, *tu m-nao ta*: ing-we kong-nying teh-djôh gyi ky'üoh-yüong z ing-kæ-go. ¹¹ Ng-lah tseo-tsing ze-bin soh-go zing-li, soh-go hyiang-ts'eng, iao tang-t'ing keh-t'ah u-sen jü-lah z k'o-yi-go; ziu hao deng-lôh keh-deo, ih-dzih tao ky'i-go z-'eo. ¹² Tseo-tsing keh-veng nying-kô, iao ts'æn-nyiæn gyi bing-en. ¹³ Keh-veng nying-kô ziah k'o-yi teh-djôh-go, ng-lah *sô ts'æn-nyiæn-go* bing-

en hao ling-djôh gyi: keh-veng nying-kô ziah feh k'o-yi teh-djôh-go, keh-go bing-en dzing-gyiu hao kwe peh ng-lah zi. ¹⁴ Ziah yiu nying feh k'eng tsih-ziu ng-lah, feh k'eng t'ing ng-lah-go shih-wô; tseo-c'ih keh-veng nying-kô, 'ôh-tsia keh-zo zing-li, hao tæn-diao ng kyiah-li-go hwe-dzing. ¹⁵ Ngô tsing wô hyiang ng-lah dao, Tao sing-p'un nyih-ts, Sô-to-mô teng Ngo-mo-lah-go ying-vah pi keh-go zing-li wa ky'ing-k'o.

⁹「爾拉個繚繳裏嘸得好繳^[1]金子、銀子、銅鈿。¹⁰ 路上用個伙食、雙套衣裳、鞋、哀杖,都嘸得好帶。因為工人得着其喫用是應該個。¹¹ 爾拉走進隨便啥個城裏、啥個鄉村,要打聽箇埭烏碎誰拉是可以個。就好庉落箇頭,一直到去個時候。¹² 走進箇份人家,要懺唸其平安。¹³ 箇份人家若可以得着個,爾拉所懺唸個平安好臨着其。箇份人家若可以得着個,箇個平安仍舊好歸撥爾拉自。¹⁴ 若有人弗肯接受爾拉,弗肯聽爾拉個說話。走出箇份人家,或者箇座城裏,好撣掉爾腳裏個灰塵。¹⁵ 我眞話向爾拉道,到審判日子,所多瑪等蛾摩拉個刑罰比箇個城裏還輕可。

¹⁶ "Ngô ts'a ng-lah ky'i, tsing-ziang yiang tseo-tsing za-lông cong-nyiang ka: keh-lah tông-kæ ziang dzô ka ts'ong-ming, ziang beh-keh ka lao-jih. 17 Ng-lah yüong kwu-djôh nying-kô: ing-we gyi-lah we song ng-lah tao ngô-meng-li, læ gyi-lah jü-we-dông-li yia we yüong pin-ts tang ng-lah; ¹⁸ wa-yiu we-leh Ngô-go yün-kwu ng-lah iao k'ô tao keh-sing tsong-toh teng keh-sing wông-ti-go minzin, iao tso te-tsing peh gyi-lah teng bih-koh-nying. ¹⁹ Gyilah tsiang ng-lah song kwun z-'eo, hao-vong zeo soh-go shih-wô hao kông, ôh-tsia dza-go kông-fah; tao keh-go z-'eo, kæ kông go shih-wô, tsong we s-peh ng. ²⁰ Ing-we lætih kông-go, feh-z ng-lah zi, z ng-lah Ah-tia-go Sing-Ling tsia ng-lah cü-pô kông-go. ²¹ Hyüong-di we pô hyüong-di song kwun bæn gyi si-ze; ah-tia we pô ng-ts song kwun bæn gyi si-ze: ng-nô yia we dong-siu long-sah do-nying. ²² Pingts'ia ng-lah we-leh Ngô-go ming-deo we peh cong-nying k'eh-ts'eng: dæn-z jing-næ tao ti go, keh-go cü-kwu hao

teh-djôh kyiu. ²³ Ziah-z dông-deo zing-li gyi-lah pih-næn ng-lah, hao dao tao keh-deo zing-li ky'i: ing-we Ngô tsing wô hyiang ng-lah dao, Ng-lah wa feh-zing ^[1]tseo-pin Yi-seh-lih di-fông-go zing-li, Nying-go Ng-ts iao læ-gyi.

16 「我差爾拉去,正像羊走進豺狼中央介。 箇勒當該 像蛇介聰明,像鵓鴿介老實。¹⁷ 爾拉用顧着人家。因為其 拉會送爾拉到衙門裏,來其拉聚會堂裏也會用鞭子打爾 拉。18 還有爲了我個緣故爾拉要抲到箇星總督等箇星皇帝 個面前,要做對證撥其拉等別國人。¹⁹ 其拉將爾拉送官時 候,好留愁啥個說話好講,或者咋個講法。到箇個時候, 該講個說話,總會賜撥爾。²⁰因爲來的講個,弗是爾拉 自,是爾拉阿爹個聖靈借爾拉嘴巴講個。²¹ 兄弟會把兄弟 送官辦其死罪; 阿爹會把兒子送官辦其死罪。兒囡也會動 手弄煞大人。22 並且爾拉為了我個名頭會撥衆人刻忖。但 是忍耐到底個, 箇個主顧好得着救。23 若是蕩頭城裏其拉 逼難爾拉,好逃到箇頭城裏去。因為我眞話向爾拉道,爾 拉還弗曾走區[1]以色列地方個城裏,人個兒子要來其。

[1] 'Ôh-tsia wô, tseo-wun. 或者話, 走完。(原註)

²⁴ "'Oh-sang-ts m̆-teh ko-ü gyi sin-sang; nu-boh yia m-teh ko-ü gyi cü-nying-kô. ²⁵ 'Ôh-sang-ts ziang gyi sinsang, nu-boh ziang gyi cü-nying-kô, ka keo-de. Kô-cü, nying-kô zông-ts'ia wô Gyi [1]Bih-si-poh, 'o-hwông Gyi-go kô-nying ni! ²⁶ Keh-lah hao-vong p'ô gyi-lah: ing-we m-yiu ih-yiang en-dzông z-ken feh we lu-c'ih-læ; m-yiu ih-yiang s-'ô z-ken feh we peh nying-kô hyiao-teh. ²⁷ Ngô teng nglah læ en-en u-sen sô wô-go, ng-lah læ liang-liang di-fông hao kông-c'ih: ng-lah ng-to keng-deo sô t'ing-meng-go, læ oh-ngô-teng hao djün-k'æ-ky'i. 28 Keh-sing tsih neng-keo sah kyi-sing, feh neng-keo sah weh-ling cü-kwu, hao-vong p'ô gyi: wa-z læ di-nyüoh-li neng-keo mih-diao weh-ling lin kyi-sing, —keh-go Cü-kwu, z ng-lah kæ p'ô go. ²⁹ Liang-tsah mô-tsiang ky'i feh-z ih-feng nying-ts hao made? ziah-z ng-lah-go Ah-tia feh ing-hyü, gyi-cong ih-tsah tu feh we tih-lôh di-yiang-li. 30 Dæn-z ng-lah ni, ziu-z deofah yia keng-keng tu shü-hao-liao. 31 Keh-lah hao-vong p'ô; ng-lah z pi hyü-to mô-tsiang wa kwe-djong. ³² Ka-ni,

væn-pah læ nying-kô min-zin we tsiao-jing Ngô cü-kwu, læ Ngô t'in-zông Ah-tia min-zin Ngô yia we tsiao-jing gyi: ³³ læ nying-kô min-zin feh tsiao-jing Ngô cü-kwu, læ Ngô t'in-zông Ah-tia min-zin Ngô yia feh tsiao-jing gyi.

「學生子嘸得過於其先生; 奴僕也嘸得過於其主人 24 家。²⁵ 學生子像其先生,奴僕像其主人家,介夠了。家 主,人家尚且話其別西卜[1],何況其個家人呢!²⁶ 箇勒好 甮怕其拉。因爲嘸有一樣暗藏事幹弗會露出來; 嘸有一樣 私下事幹弗會撥人家曉得。27 我等爾拉來暗暗烏碎所話 個,爾拉來亮亮地方好講出。爾拉耳朵根頭所聽聞個,來 屋瓦頂好傳開去。28 箇星只能夠殺肌身, 弗能夠殺活靈主 顧,好留怕其。還是來地獄裏能夠滅掉活靈連肌身,——箇 個主顧,是爾拉該怕個。29兩隻麻雀豈弗是一分銀子好買 了?若是爾拉個阿爹弗應許,其中一隻都弗會跌落地垟 裏。30 但是爾拉呢,就是頭髮也根根都數好了。31 箇勒好 留怕。爾拉是比許多麻雀還貴重。³² 介呢,凡百來人家面 前會招認我主顧,來我天上阿爹面前我也會招認其。33來

人家面前弗招認我主顧,來我天上阿爹面前我也弗招認 其。

[1]Ziu-z kwe-wông. 就是鬼王。(原註)

³⁴ "Ng-lah m-nao ts'eng Ngô læ z peh t'in-'ô t'a-bing; Ngô læ, feh-z peh gyi t'a-bing, z peh gyi dong ken-ko. ³⁵ Ing-we Ngô læ, z s-teh ng-ts teng ah-tia, nön teng ahnyiang, sing-vu teng ah-bo, tu we su-sæn-k'æ. 36 Zi-kônying we tso gyi ün-kô. ³⁷ Æ-kying tia-nyiang ko-jü Ngô, feh k'o-yi tso Ngô meng-du: æ-sih ng-nô ko-jü Ngô, feh k'o-yi tso Ngô meng-du. ³⁸ Wa-yiu feh pe zi jih-z-kô keng Ngô læ go, yia feh k'o-yi tso Ngô meng-du. ³⁹ Ziah yiu zing-djôh zi sing-ming cü-kwu, fæn-cün we sông-diao gyi: we-leh Ngô sông-diao zi sing-ming cü-kwu, fæn-cün we zing-djôh gyi.

34 「爾拉嘸得好忖我來是撥天下太平。我來, 弗是撥 其太平, 是撥其動干戈。³⁵ 因為我來, 是使得兒子等阿 爹, 囡等阿孃, 新婦等阿婆, 都會疏散開。³⁶ 自家人會做 其冤家。³⁷ 愛敬爹孃過如我, 弗可以做我門徒。愛惜兒囡 過如我, 弗可以做我門徒。³⁸ 還有弗背自十字架跟我來個, 也弗可以做我門徒。³⁹ 若有尋着自性命主顧, 反轉會喪掉其。為了我喪掉自性命主顧, 反轉會尋着其。

⁴⁰ "Væn-pah tsih-ziu ng-lah, ziu-z tsih-ziu Ngô; tsih-ziu Ngô, ziu-z tsih-ziu ts'a Ngô læ go Cü-kwu. ⁴¹ Ziah yiu nying k'en-kyin gyi z sin-cü-nying, ziu ky'i tsih-ziu keh. sin-cü-nying, gyi we teh-djôh sin-cü-nying-go pao-ing: ziah yiu nying k'en-kyin gyi z tsing-dzih-go nying, ziu ky'i tsih-ziu keh tsing-dzih-go nying, gyi we teh-djôh tsing-dzih nying-go pao-ing. ⁴² Ziah yiu nying k'en-kyin keh-sing siao-nying li-hyiang ih-go z-go meng-du, tæn-tsih coh ih-pe lang-shü peh gyi ky'üoh, Ngô tsing wô hyiang ng-lah dao, gyi tsong feh we shih-diao pao-ing."

⁴⁰「凡百接受爾拉,就是接受我。接受我,就是接受 差我來個主顧。⁴¹ 若有人看見其是先知人,就去接受箇先 知人,其會得着先知人個報應。若有人看見其是正直個 人,就去接受箇正直個人,其會得着正直人個報應。⁴² 若 有人看見箇星小人裏向一個是個門徒,單只給一杯冷水撥 其喫,我眞話向爾拉道,其總弗會失掉報應。」

Mt. XI.

Yiæ-su jih-nyi-go meng-du feng-fu-hao-ts, ziu li-k'æ keh-deo, tao gyi-lah-go zing-li ky'i kông dao-li djün kyiao ky'i.

<u>耶穌</u>十二個門徒吩咐好仔,就離開箇頭,到其拉個城 裏去講道理傳教去。

² IAH-'EN læ lao-kæn-li t'ing-meng Kyi-toh tso-go z-ken, ts'a zi liang-go meng-du ky'i meng Gyi, wô, ³ "Tông-kæ læ go Cü-kwu z Ng feh, wa-z ah-lah tsæ siang-vông bih-nying ni?" ⁴ Yiæ-su we-teh gyi-lah, wô, "Ng-lah sô t'ing-meng-go sô k'en-kyin-go z-ken, hao ky'i pao hyiang Iah-'en dao: ⁵ yiu hah-ts we k'en-kyin, kwa-kyiah we tseo lu, da-mô-fong we ken-zing, long-bang we t'ing-meng, si-

nying weh-cün-læ, yiu foh-ing dao-li djün peh gyüongnying t'ing. ⁶ Wa-yiu væn-pah feh in-tseng ky'i-diao Ngô cü-kwu yiu foh-ky'i."

² <u>約翰</u>來牢監裏聽聞<u>基督</u>做個事幹,差自兩個門徒去問 其,話:³「當該來個主顧是爾弗,還是阿拉再相望別人 呢?」⁴ 耶穌回答其拉,話:「爾拉所聽聞個所看見個事 幹,好去報向<u>約翰</u>道。⁵ 有瞎子會看見,拐腳會走路,大麻 瘋會乾淨,聾聲會聽聞,死人活轉來,有福音道理傳撥窮 人聽。⁶ 還有凡百弗嫌憎棄掉我主顧有福氣。」

⁷ Gyi-lah kyʻi-go z-ʻeo, Yiæ-su teng keh-do-dziao nying kông-kyʻi Iah-ʻen-go z-ken læ, *z-ka wô:——*

⁷ 其拉去個時候,<u>耶穌</u>等箇大潮人講起<u>約翰</u>個事幹來, 是介話:——

"Ng-lah 'æn-tsao tseo-c'ih tao kw'ông-iæ di-fông ky'i k'en soh-si? Wa-z *ky'i k'en* ih-keng be fong c'ü-dong-go lu-ken feh? ⁸ Ng-lah tseo-c'ih, tao-ti ky'i k'en soh-si? Wa-z *ky'i k'en* ih-go c'ün nyün-siang i-zông go nying feh? Keh-

sing c'ün nyün-siang i-zông go z deng læ wông-kong lihyiang. ⁹ Ng-lah tseo-c'ih, tao-ti ky'i k'en soh-si? Wa-z ky'i k'en ih-go sin-cü-nying feh? Ngô wô hyiang ng dao, Z-go sin-cü-nying; ping-ts'ia wa ko-jü sin-cü-nying. ¹⁰ Shü-li sô sia-tih, 'Ngô tang-fah Ngô-go ts'a-s læ Ng-go min-zin, ky'i be-bæn Ng zin-deo-go lu,' [Ml. 3. 1.] ziu-z ts-tin gyi. ¹¹ Ngô tsing wô hyiang ng-lah dao, Z nyü-nying sô sang-go, m-yiu ih-go do-jü 'Ang-si-li-go Iah-'en c'ih-ko: dæn-z læ t'inkoh-li ting siao-go cü-kwu wa pi gyi do. ¹² Z dzong 'Ang-sili-go Iah-'en z-'eo tao næn-kæn, t'in-koh be nying-kô gyiang-deh, z gyiang-go cü-kwu we deh-leh-ky'i. ¹³ Ing-we long-tsong sin-cü-nying teng lih-fah-go shü kông mi-læ zken, tu z ih-dzih tao Iah-'en z-'eo. 14 Ng-lah ziah k'eng tsih-ziu keh-go shih-wô, tông-kæ læ go Yi-li-üô, ziu-z Iah-'en. ⁵ Yiu ng-to we t'ing go cü-kwu, kæ t'ing.

「爾拉閒早走出到曠野地方去看啥西?還是去看一根被風吹動個蘆竿弗?⁸爾拉走出,到底去看啥西?還是去看一個穿軟相衣裳個人弗?箇星穿軟相衣裳個是庉來王宮裏

向。⁹ 爾拉走出,到底去看啥西?還是去看一個先知人弗?我話向爾道,是個先知人。並且還過如先知人。¹⁰ 書裏所寫的: 『我打發我個差使來爾個面前,去備辦爾前頭個路,』[M1. 3. 1.] 就是指點其。¹¹ 我眞話向爾拉道,是女人所生個,嘸有一個大如行洗礼個<u>約翰</u>出過。但是來天國裏頂小個主顧還比其大。¹² 是從行洗礼個<u>約翰</u>時候到難間,天國被人家強奪,是強個主顧會奪勒去。¹³ 因為攏總先知人等律法個書講未來事幹,都是一直到<u>約翰</u>時候。¹⁴ 爾拉若肯接受箇個說話,當該來個<u>以利亞</u>,就是<u>約翰</u>。¹⁵ 有耳朵會聽個主顧,該聽。

¹⁶ "Dæn-z Ngô yüong soh-si hao pi yin-dzæ keh-dæ *nying*? K'o-pi-ziang siao-w̃æn zo læ z-min-zông, eo gyi-lah de-ho, z-ka wô, ¹⁷ 'Ah-lah teng ng c'ü dih-ts, ng-lah m̃-teh t'iao-vu; ah-lah teng ng di-k'oh, ng-lah m̃-teh pe-shông.' ¹⁸ Ing-we Iah-'en læ, yi feh ky'üoh yi feh hah; gyi-lah wô, 'Gyi z jih-mo-go:' Nying-go Ng-ts læ, yi ky'üoh yi hah; gyi-lah wô, 'Gyi z t'en-zih t'en-tsiu-go nying, yia z Siu-zin-

liang-go teng ze-nying-go beng-yiu.' Dæn-z ts'ong-minggo nying we bin-c'ih ts'ong-ming *Cü-kwu-go* dao-yi læ."

¹⁶「但是我用啥西好比現在箇代人?可比像小娃坐來市面上,謳其拉隊夥,是介話: ¹⁷ 『阿拉等爾吹笛子,爾拉嘸得跳舞;阿拉等爾啼哭,爾拉嘸得悲傷。』 ¹⁸ 因為<u>约</u>翰來,又弗喫又弗喝。其拉話: 『其是入魔個。』人個兒子來,又喫又喝。其拉話: 『其是貪食貪酒個人,也是收錢糧個等罪人個朋友。』但是聰明個人會辨出聰明主顧個道義來。』

²⁰ YIÆ-SU yiu ting to jing-tsih tso-kæn keh-sing zing-li, ing-we wa m-neh we-sing-cün-i, keh-tsao tsah-vah gyi, z-ka wô: ²¹ "Ng K'o-lah-sing yiu 'o-se! Ng Pih-sæ-da yiu 'o-se! ing-we læ ng-lah cong-nyiang sô tso-go jing-tsih ziah tso læ T'e-lo Si-teng, gyi-lah lao-tsao c'ün-leh mô-i tsao-leh hwe-dzing we-sing-cün-i-de. ²² Dæn-z Ngô wô hyiang ng-lah dao, Tao sing-p'un nyih-ts, T'e-lo Si-teng-go ying-vah pi ng-lah ky'ing-k'o. ²³ Wa-yiu ng Kyüô-pah-nong, yi-kying kyü-zông ih-dzih tao t'in *ka*, tsiang-læ iao t'e ng lôh

ih-dzih tao ing-s-li ka: ing-we læ ng-go cong-nyiang sô tso-go jing-tsih, ziah tso læ Sô-to-mô, gyi tao jü-kying wa lætong-de. ²⁴ Dæn-z Ngô wô hyiang ng-lah dao, Tao sing-p'un nyih-ts, Sô-to-mô di-fông-go ying-vah pi ng ky'ing-k'o."

20 <u>耶穌</u>有頂多神蹟做問箇星城裏,因為還嘸得回心轉意,箇遭責罰其,是介話: ²¹ 「爾<u>可拉汎</u>有禍祟!爾必賽 大有禍祟!因為來爾拉中央所做個神蹟若做來推羅、西 頓,其拉老早穿勒麻衣遭勒灰塵回心轉意了。 ²² 但是我話 向爾拉道,到審判日子,推羅、西頓個刑罰比爾拉輕可。 ²³ 還有爾<u>迦百農</u>,已經舉上一直到天介,將來要推爾落一直 到陰司裏介。因為來爾個中央所做個神蹟,若做來<u>所多</u> 瑪,其到如今還來東了。 ²⁴ 但是我話向爾拉道,到審判日 子,所多瑪地方個刑罰比爾輕可。」

²⁵ Keh-go z-'eo Yiæ-su k'æ k'eo, z-ka wô, "Ah-tia, t'in teng di-go Cü-tsæ, Ngô zia-zia Ng, ing-we Ng tsô-djü keh-sing z-ken feh peh ts'ong-ming dzæ-neng-go cü-kwu

hyiao-teh, fæn-cün hyin-c'ih peh na-hwun ming-bah. ²⁶ Ah-tia, z-go; ing-we Ng-go ts-i, hwun-hyi z-ka-go.

²⁵ 箇個時候<u>耶穌</u>開口,是介話:「阿爹,天等地個主宰,我謝謝爾,因為爾遮住箇星事幹弗撥聰明才能個主顧曉得,反轉顯出撥奶花明白。²⁶ 阿爹,是個。因為爾個旨意,歡喜是介個。

²⁷ "Væn-veh tu z Ngô Ah-tia kao-dæ Ngô go. Djü-leh Ah-tia ts-nga, m-nying hyiao-teh Ng-ts; djü-leh Ng-ts teng Ng-ts k'eng hyin-c'ih *Ah-tia* peh gyi cü-kwu ts-nga, yia m-nying hyiao-teh Ah-tia.

²⁷「萬物都是我阿爹交代我個。除了阿爹之外,嘸人 曉得兒子。除了兒子等兒子肯顯出阿爹撥其主顧之外,也 嘸人曉得阿爹。

²⁸ "Ng-lah væn-pah lao-k'wu t'iao djong-tæn cü-kwu, hao tao Ngô u-dông læ; Ngô we peh ng-lah en-tæn. ²⁹ Ngô yiu wĕng-ziu ky'in-hyü-go sing; hao læ ziu Ngô-go ah, dzong Ngô tso sin-sang; ng-lah ziu we teh-djôh weh-ling-

go en-tæn. ³⁰ Ing-we Ngô-go ah z yüong-yi-go; Ngô-go tæn-deo z ky'ing-go."

²⁸「爾拉凡百勞苦挑重擔主顧,好到我烏蕩來。我會 撥爾拉安耽。²⁹ 我有溫柔謙虛個心。好來就我個軛,從我 做先生。爾拉就會得着活靈個安耽。³⁰ 因為我個軛是容易 個,我個擔頭是輕個。」

Mt. XII.

Keh-go z-'eo Yiæ-su en-sih-nyih tseo-ko mah-din-li; Gyi-go meng-du du-kyi, ky'i tsah-leh mah-be ky'üoh-ky'üoh. ² Fah-li-sæ nying k'en-kyin, teng Gyi wô, "Nô! Nggo meng-du læ-kæn tso en-sih-nyih feh ing-kæ tso go z-ken." ³ Yiæ-su teng gyi-lah wô, "Da-bih teng gyi dong-de nying du-kyi z-'eo, Da-bih sô tso-go z-ken, ng-lah soh m-neh doh-ko ma? ⁴ ziu-z tseo-tsing Jing-ming-go oh-lô, ky'üoh pa-kæn-go ping; keh-go ping gyi-zi teng dong-de-

go nying tu feh ing-kæ ky'üoh, tsih-yiu tsi-s keh-sing hao ky'üoh. ⁵ Wa-yiu lih-fah-li *sô wô*, en-sih-nyih tsi-s læ sing-din-li væn-djôh en-sih-nyih, yia m-kao ze;—— ng-lah soh m-neh doh-ko ma? ⁸ Ngô wô hyiang ng-lah dao, Dông-deo læ-tong yiu *Ih-go* pi sing-din wa do. ⁷ 'Ngô iao dz-pe feh iao foh-li,' ['O. 6. 6.] *keh-kyü shih-wô* dza-go i-s, ng-lah ziah-z ming-bah, m-ze-go nying ng-lah tsæ-ve ky'i ding gyi ze. ⁸ Ing-we Nying-go Ng-ts yia z en-sih-nyih-go Cü."

箇個時候<u>耶穌</u>安息日走過麥田裏。其個門徒肚飢,去摘勒麥佩喫喫。²法利賽人看見,等其話:「喏!爾個門徒來間做安息日弗應該做個事幹。」³耶穌等其拉話:「大闢等其同隊人肚飢時候,大闢所做個事幹,爾拉哈嘸得讀過嗎?⁴就是走進神明個屋落,喫擺間個餅。箇個餅其自等同隊個人都弗應該喫,只有祭司箇星好喫。⁵還有律法裏所話,安息日祭司來聖殿裏犯着安息日,也嘸告罪。——爾拉哈嘸得讀過嗎?⁶我話向爾拉道,蕩頭來東有一個比聖殿還大。⁷『我要慈悲弗要福禮,』['O. 6. 6.] 箇句說話咋個意

思,爾拉若是明白,嘸罪個人爾拉再繪去定其罪。⁸ 因為人個兒子也是安息日個主。」

⁹ Yiæ-su li-k'æ keh-deo, tseo tao gyi-lah-go jü-wedông-li; ¹⁰ yiu ih-go nying læ-kæn, gyi ih-tsah siu fong-de. Gyi-lah ziu meng Yiæ-su, z-ka wô, "En-sih-nyih i bing, tsôh-hying feh tsôh-hying?" gyi-lah-go i-s iao-siang kao Gyi zông. ¹¹ Yiæ-su teng gyi-lah wô, "Ng-lah cong-nyiang jünoh yiu ih-tsah yiang, keh-tsah en-sih-nyih tih-lôh dik'ang-li, feh iao ky'i cô-leh gyi liao-zông-læ ma? 12 Nying teng yiang kwe-zin ts'ô to-siao ni! Ka k'en-ky'i-læ, en-sihnyih tso hao z-ken z tsôh-hying-go." 13 Keh-tsao Yiæ-su teng keh-go nying wô, "Ng-go siu sing-tæn-c'ih-læ." Gyi sing-c'ih-læ; siu ziu djün-yü, ziang bih-tsah ka-go. Fah-lisæ nying ziu tseo-c'ih-ky'i, dô-kô siang-liang dza-go hao long-sah Yiæ-su.

⁹ 耶穌離開箇頭,走到其拉個聚會堂裏。¹⁰ 有一個人來間,其一隻手風了。其拉就問<u>耶穌</u>,是介話:「安息日醫病,作興弗作興?」其拉個意思要想告其上。¹¹ 耶穌等其

拉話:「爾拉中央誰儂有一隻羊,箇隻安息日跌落地坑裏,弗要去揸勒其撩上來嗎?¹²人等羊貴賤差多少呢!介看起來,安息日做好事幹是作興個。」¹³箇遭<u>耶穌</u>等箇個人話:「爾個手伸帶出來。」其伸出來。手就痊癒,像別隻介個。法利賽人就走出去,大家商量咋個好弄煞耶穌。

¹⁵ Yiæ-su hyiao-teh, ziu li-k'æ keh-deo: yiu ih-dodziao nying keng-leh Gyi ky'i, Gyi ziu i-hao gyi-lah longtsong; ¹⁶ yi ting-côh gyi-lah m-nao yiang Gyi-go mingsing: ¹⁷ hao s-teh sin-cü Yi-sæ-üô kông-ko-liao-shih-wô yiu yiao-nyiæn, z-ka wô, ¹⁸ "Ts'ia-k'en Ngô Nu-boh, z Ngô sô t'iao-shün-go; Ngô ts'ing-æ-go Cü-kwu, z Ngô sing-li sô hwun-hyi-go: Ngô we s-peh Gyi Ngô-go Ling, Gyi ziu we djün tsing-dzih-go dao-li tao bih-koh ky'i. ¹⁹ Gyi feh we tsang-zao, feh we wu-long hyiang-liang; læ do-ka-zông nying-kô yia feh we t'ing-meng Gyi-go sing-hyiang. ²⁰ Ihkeng sông-seng-liao-go lu-ken, Gyi feh we dön gyi k'æ; wa læ-tih in-go lah-coh-sing, feh we meng gyi u; dzih-tengtao s-teh tsing-dzih-go dao-li teh-sing. ²¹ Wa-yiu bih-kohnying we nyiang-vông Gyi-go ming-deo." [Y. 42. 1.]

15 <u>耶穌</u>曉得,就離開箇頭。有一大潮人跟勒其去,其就醫好其拉攏總。¹⁶ 又叮囑其拉嘸得好揚其個名聲。¹⁷ 好使得先知<u>以賽亞</u>講過了說話有效驗,是介話:¹⁸ 「且看我奴僕,是我所挑選個。我親愛個主顧,是我心裏所歡喜個。我會賜撥其我個靈,其就會傳正直個道理到別國去。¹⁹ 其弗會爭造,弗會胡嚨響亮。來大街上人家也弗會聽聞其個聲響。²⁰ 一根喪生了個蘆竿,其弗會斷其開。還來的煙個蠟燭芯,弗會捫其鴆。直等到使得正直個道理得勝。²¹ 還有別國人會仰望其個名頭。」[Y. 42. 1.]

²² KEH-GO z-'eo yiu ih-go jih-mo-go nying, yi z hahngæn yi z ô-ts, ta tao Yiæ-su u-sen læ: *Yiæ-su* ziu i gyi hao, s-teh hah-ngæn we k'en, ô-ts we kông. ²³ Cong-nying tu kying-hyiæ, z-ka wô, "Keh ky'i feh-z Da-bih-go 'Eo-dæ?" ²⁴ Fah-li-sæ nying ih t'ing-meng wô, "Keh-go Cü-kwu ken-c'ih kyü, peh-ko z k'ao-djôh kwe-wông Bih-si-poh go."

22 箇個時候有一個入魔個人,又是瞎眼又是啞子,帶到<u>耶穌</u>烏碎來。<u>耶穌</u>就醫其好,使得瞎眼會看,啞子會講。²³ 衆人都驚駭,是介話:「箇豈弗是<u>大闢</u>個後代?」 24 <u>法利賽</u>人一聽聞話:「箇個主顧趕出鬼,不過是靠着鬼王別西卜個。」

²⁵ Yiæ-su hyiao-teh gyi-lah sing-siang, teng gyi-lah wô, "Væn-pah ih-koh li-deo feng-lih-k'æ læ-tih zi tang zi, tsong we pin tso hwông-di: væn-pah ih-go zing-li, 'ôh-tsia ih-kô li-deo, feng-lih-k'æ zi tang zi, tsong lih-feh-lao. ²⁶ Ziah-z Sah-dæn ken-c'ih Sah-dæn, keh ziu-z feng-k'æ zi tang zi; ka-ni, gyi-go koh dza-we lih-leh-lao ni? ²⁷ Ngô kenc'ih kyü ziah-z k'ao-djôh Bih-si-poh, ng-lah-go meng-du ken-c'ih kyü z k'ao-djôh jü ni? sô-yi gyi-lah we ding nglah-go ze. ²⁸ Ngô ken-c'ih kyü ziah-z k'ao-djôh Jing-minggo Ling, keh-meh Jing-ming-go koh yi-kying tao ng-lah-go sing-pin læ-tong-de. ²⁹ Ôh-tsia jü neng-keo tseo-tsing haolao-go oh-lô, ts'iang-deh gyi dzæ-veh? ky'i feh iao sin bodjü keh-go hao-lao, 'eo-deo hao ts'iang-deh gyi oh-lô-go

tong-si? ³⁰ Feh teng Ngô dong-de cü-kwu, ziu-z; Ngô tedeo: feh teng Ngô siu-long cü-kwu, ziu-z sæn-diao.

25 <u>耶穌</u>曉得其拉心想,等其拉話:「凡百一國裏頭分裂開來的自打自,總會變做荒地。凡百一個城裏,或者一家裏頭,分裂開自打自,總立弗牢。²⁶ 若是<u>撒但</u>趕出<u>撒但</u>,箇就是分開自打自。介呢,其個國咋會立勒牢呢?²⁷ 我趕出鬼若是靠着<u>別西卜</u>,爾拉個門徒趕出鬼是靠着誰呢?所以其拉會定爾拉個罪。²⁸ 我趕出鬼若是靠着神明個靈,箇末神明個國已經到爾拉個身邊來東了。²⁹ 或者誰能夠走進好佬個屋落,搶奪其財物?豈弗要先縛住箇個好佬,後頭好搶奪其屋落個東西?³⁰ 弗等我同隊主顧,就是,我對頭。弗等我收攏主顧,就是散掉。

³¹ "Sô-yi Ngô wô hyiang ng-lah dao, Nying-go pah-yiang ze-ôh teng sih-doh-go shih-wô, tu hao sô-diao; tsih-yiu nying sih-doh *Sing*-Ling go shih-wô sô-feh-diao-go. ³² Væn-pah kông shih-wô teh-ze Nying-go Ng-ts, hao sô gyi diao; tsih-yiu kông *shih-wô* teh-ze Sing-Ling cü-kwu, kying-si 'ô-si tu sô-feh-diao. ³³ Ih-cü jü, ng-lah ziah sön

gyi hao-go, gyi ko-ts yia z hao-go; ih-cü jü, ziah sön gyi wa-go, gyi ko-ts yia z wa-go: ing-we k'en gyi ko-ts, hao sihteh gyi jü. ³⁴ Doh-dzô-go cong-tông! ng-lah kyi-jün z ôhgo, dza neng-keo kông hao shih-wô? ing-we cü-pô kông-go, z dzong sing-li kah-c'ih-læ-go to-deo. ³⁵ Hao-nying, dzong gyi sing li-hyiang k'ông-tih-go hao-c'ü, fah-c'ih hao z-ken læ; wa-nying, dzong gyi sing li-hyiang k'ông-tih-go wa-c'ü, fah-c'ih wa z-ken læ. ³⁶ Ngô wô hyiang ng-lah dao, Nying sô kông-go hyü-wô, tao sing-p'un nyih-ts sön tsiang, kyütang-kyü tu iao sön-tsing. ³⁷ Ing-we iao sön ng tsing-dzihgo, z dzong ng-go shih-wô; iao ding ng-go ze, yia z dzong ng-go shih-wô."

31 「所以我話向爾拉道,人個百樣罪惡等褻瀆個說話,都好赦掉。只有人褻瀆聖靈個說話赦弗掉個。32 凡百講說話得罪人個兒子,好赦其掉。只有講說話得罪聖靈主顧,今世下世都赦弗掉。33 一株樹,爾拉若算其好個,其果子也是好個。一株樹,若算其壞個,其果子也是壞個。因爲看其果子,好識得其樹。34 毒蛇個種黨!爾拉既然是

惡個,咋能夠講好說話?因為嘴巴講個,是從心裏溢出來個多頭。³⁵ 好人,從其心裏向囥的個好處,發出好事幹來。壞人,從其心裏向囥的個壞處,發出壞事幹來。³⁶ 我話向爾拉道,人所講個虛話,到審判日子算賬,句打句都要算進。³⁷ 因為要算爾正直個,是從爾個說話。要定爾個罪,也是從爾個說話。」

³⁸ KEH-TSAO yiu kyi-go doh-shü-nying teng Fah-li-sæ nying k'æ k'eo, wô, "Sin-sang, ah-lah iao Ng hyin-c'ih ihgo ziao-deo peh ah-lah k'en-k'en." 39 Yiæ-su we-teh gyilah, wô, "Keh-go hyüong-ôh" kæn-ying-go shü-dæ iaosiang gyiu ziao-deo: djü-leh sin-cü Iah-nô-go ziao-deo tsnga, tsong feh peh gyi k'en soh-go ziao-deo. 40 Ing-we tsing-ziang Iah-nô sæn nyih sæn yia læ gying-ng du-bi lihyiang; Nying-go Ng-ts yia z-ka we sæn nyih sæn yia læ diyiang cong-nyiang. ⁴¹ Nyi-nyi-vi nying tao sing-p'un *nyih*ts we teng yin-dzæ keh-dæ nying dô-kô bô-ky'i-læ, Nyi-nyivi nying yia we ding keh-dæ nying-go ze: ing-we gyi-lah t'ing Iah-nô-go kao-hyüing ziu we-sing-cün-i; hwông-ts'ia dông-deo yiu pi Iah-nô wa do-go læ-tong. ⁴² Nen-pin-go nyü-wông tao sing-p'un nyih-ts we teng yin-dzæ keh-dæ nying dô-kô bô-ky'i-læ, keh-go nyü-wông yia we ding gyi-lah ze: ing-we gyi dzong di-go zing-deo tseo-læ t'ing Sô-lo-meng ts'ong-ming-go shih-wô; hwông-ts'ia dông-deo yiu pi Sô-lo-meng wa do-go læ-tong.

38 筒遭有幾個讀書人等法利賽人開口,話:「先生, 阿拉要爾顯出一個兆頭撥阿拉看看。」39 耶穌回答其拉, 話:「箇個兇惡姦淫個世代要想求兆頭。除了先知約拿個 兆頭之外,總弗撥其看啥個兆頭。⁴⁰ 因為正像約拿三日三 夜來鯨魚肚皮裏向。人個兒子也是介會三日三夜來地垟中 央。41 尼尼微人到審判日子會等現在箇代人大家爬起來, 尼尼微人也會定箇代人個罪。因爲其拉聽約拿個教訓就回 心轉意。況且蕩頭有比約拿還大個來東。⁴² 南邊個女皇到 審判日子會等現在箇代人大家爬起來, 箇個女皇也會定其 拉罪。因爲其從地個盡頭走來聽所羅門聰明個說話。況且 蕩頭有比所羅門還大個來東。

- ⁴³ "Ao-tsao kyü dzong nying-go sing-zông ka tseo-c'ih, ziu læ hwông-'en di-fông tseo-læ-tseo-ky'i læ-tih zing en-tæn *u-dông*, zing-feh-djôh; ⁴⁴ keh-tsao wô, "Ngô we tseo-cün tao zin-deo tseo-c'ih-go oh-lô ky'i.' Ih tseo-tao, k'en-kyin pih-zing-ts'ing, sao ken-zing, tsông-sih-hao-de. ⁴⁵ Ziu ky'i, yi ta-ling ts'ih-go kyü pi gyi-zi wa ôh-go, tseo-tsing keh-deo ky'i deng-lôh: keh-go nying kyih-sah-go z-ken pi gyi ky'i-deo keng-kô w̆a-de. Yin-dzæ-go ôh shü-dæ tsiang-læ yia z-ka-go."
- ⁴⁶ "YIÆ-SU teng cong-nying wa læ-tih kông-go z-'eo, k'eo-k'eo Gyi-go ah-nyiang teng hyüong-di læ nga-deo lih-kæn, iao-siang teng Gyi kông. ⁴⁷ Yiu ih-go nying teng Gyi

wô, "Ts'ia-k'en, Ng-go ah-nyiang teng hyüong-di nga-deo lih-kæn, iao-siang teng Ng kông." ⁴⁸ Yiæ-su we-teh t'ong-cü Gyi go cü-kwu, wô, "Ngô ah-nyiang z jü? Ngô hyüong-di z jü?" ⁴⁹ Ziu sing-c'ih siu tin-tin meng-du, wô, "Ts'ia-k'en Ngô ah-nyiang, teng Ngô hyüong-di! ⁵⁰ Ing-we væn-pah i Ngô t'in-zông Ah-tia ts-i tso-go cü-kwu, keh ziu-z Ngô hyüong-di, tsi-me, teng ah-nyiang."

46 「<u>耶穌</u>等衆人還來的講個時候,扣扣其個阿孃等兄弟來外頭立間,要想等其講。⁴⁷ 有一個人等其話:「且看,爾個阿孃等兄弟外頭立間,要想等爾講。」⁴⁸ <u>耶穌</u>回答通知其個主顧,話:「我阿孃是誰?我兄弟是誰?」⁴⁹ 就伸出手點點門徒,話:「且看我阿孃,等我兄弟!⁵⁰ 因為凡百依我天上阿爹旨意做個主顧,箇就是我兄弟,姊妹,等阿孃。」

Mt. XIII.

Keh ih-nyih Yiæ-su dzong oh-lô tseo-c'ih, zo læ hæ pin-yin. ² Yiu ih-do-dziao nying tseo-long Gyi u-sen læ; s-teh Gyi *tsih hao* t'iao-lôh jün-li zo: 'o-dziao nying tu lih læ hæ-du-zông. ³ *Yiæ-su* ziu yüong pi-fông shih-wô kông hyüto z-ken peh gyi-lah t'ing, z-ka wô:——

箇一日<u>耶穌</u>從屋落走出,坐來海邊沿。² 有一大潮人走 攏其烏碎來,使得其只好跳落船裏坐。和潮人都立來海塗 上。³ <u>耶穌</u>就用比方說話講許多事幹撥其拉聽,是介話:

"TS'IA-T'ING, yiu ih-go tsah iang-ts cü-kwu tseo-c'ih tsah iang-ts ky'i. Gyi tsah-k'æ-ky'i, yiu-sing tih-lôh lu pin-yin; tiao ziu fi-læ ky'üoh-diao-de. ⁵ Yiu-sing tih-lôh yiu zah-deo u-dông, na-nyi feh to: we-leh na-nyi feh sing go yün-kwu, ze-siu ts'iu-c'ih-læ; ⁶ nyih-deo ih c'ih, ziu sa-pih, ing-we m-neh keng-deo, keh-lah kw'u-lôh-de. ⁷ Yiu-sing tih-lôh ts'-bang vong-li; ts' hying-ky'i-læ tsô-sah gyi. ⁸ Yiu-sing tih-lôh hao nyi-nyüoh-li; ziu kyih-jih, yiu-teh-go

kyih ih-pah *be*, yiu-teh-go loh-jih *be*, yiu-teh-go sæn-jih be.

⁹ Yiu ng-to we t'ing go cü-kwu, kæ t'ing."

「且聽,有一個扎秧子主顧走出扎秧子去。其扎開去,有星跌落路邊沿,鳥就飛來喫掉了。⁵ 有星跌落有石頭鳥蕩,淖泥弗多。為了淖泥弗深個緣故,隨手抽出來,⁶ 日頭一出,就曬癟,因為嘸得根頭,箇勒枯落了。⁷ 有星跌落刺棚縫裏,刺興起來遮煞其。⁸ 有星跌落好泥浴裏,就結實,有得個結一百倍,有得個六十倍,有得個三十倍。⁹ 有耳朵會聽個主顧,該聽。」

Meng-du tseo-long-ky'i, teng Gyi wô, "Ng kông peh gyi-lah t'ing, dza-we yüong pi-fông shih-wô?" ¹¹ Yiæ-su we-teh gyi-lah wô, "Ing-we t'in-koh-go ao-miao z-ken z peh ng-lah hyiao-teh, feh peh gyi-lah hyiao-teh-go. ¹² Væn-pah yiu-go cü-kwu, wa iao kô-ts'eo peh gyi, s-teh gyi yiu-yü; væn-pah m-teh-go cü-kwu, lin gyi sô yiu-go yia iao teng gyi deh-leh-ky'i. ¹³ Ngô sô-yi yüong pi-fông shih-wô kông peh gyi-lah t'ing; ing-we gyi-lah k'en-k'en k'en-feh-c'ih, t'ing-t'ing t'ing-feh-tsing, yia feh ming-bah. ¹⁴ Wa-

yiu Yi-sæ-üô yü-sin kông-go shih-wô ing-djôh gyi-lah singzông, z-ka wô, 'Ng-lah t'ing z we t'ing-meng-gyi, tsih-z feh we hyiao-teh; k'en z we k'en-kyin-gyi, tsih-z feh we mingbah. ¹⁵ Ing-we keh-go pah-sing, gyi sing ngang-de, gyi-lah ng-to læn-teh t'ing, gyi-lah ngæn-tsing pi-tih; k'ong-p'ô ngæn-tsing k'en-kyin, ng-to t'ing-meng, sing-li ming-bah, ziu we-sing-cün-i, peh Ngô i gyi-lah hao.' [Y. 6. 9, 10.] 16 Dæn-z ng-lah-go ngæn-tsing yiu foh-ky'i, ing-we z k'enkyin-go: ng-lah-go ng-to yiu foh-ky'i, ing-we z t'ing-menggo. ¹⁷ Ngô tsing wô hyiang ng-lah dao, Yiu hyü-to sin-cünying teng tsing-dzih nying iao-siang k'en ng-lah sô k'enkyin-go, m-neh k'en-kyin-ko; iao-siang t'ing ng-lah sô t'ing-meng-go, m-neh t'ing-meng-ko.

¹⁰ 門徒走攏去,等其話:「爾講撥其拉聽,咋會用比方說話?」¹¹ 耶穌回答其拉話:「因為天國個奧妙事幹是撥爾拉曉得,弗撥其拉曉得個。¹² 凡百有個主顧,還要加湊撥其,使得其有餘;凡百嘸得個主顧,連其所有個也要等其奪勒去。¹³ 我所以用比方說話講撥其拉聽,因為其拉

看看看弗出,聽聽聽弗進,也弗明白。¹⁴ 還有<u>以賽亞</u>預先 講個說話應着其拉身上,是介話:『爾拉聽是會聽聞其, 只是弗會曉得;看是會看見其,只是弗會明白。¹⁵ 因為箇 個百姓,其心硬了,其拉耳朵懶得聽,其拉眼睛閉的,恐 怕眼睛看見,耳朵聽聞,心裏明白,就回心轉意,撥我醫 其拉好。』[Y. 6. 9, 10.] ¹⁶ 但是爾拉個眼睛有福氣,因為是 看見個;爾拉個耳朵有福氣,因為是聽聞個。¹⁷ 我真話向 爾拉道,有許多先知人等正直人要想看爾拉所看見個,嘸 得看見過,要想聽爾拉所聽聞個,嘸得聽聞過。

18 "Ka-ni, keh-go tsah iang-ts go pi-fông ng-lah hao t'ing: ¹⁹ væn-pah t'ing-meng *t'in*-koh-go" dao-li feh mingbah-go nying, keh ôh-go cü-kwu ziu læ, bah-diao gyi singli tsah-tih-go iang-ts: keh ziu-z tsah læ lu pin-yin go. ²⁰ Tsah læ yiu zah-deo u-dông go, ziu-z t'ing-meng keh-go dao-li, lih-k'eh hwun-hwun-hyi-hyi tsih-ziu-go cü-kwu: ²¹ dæn-z sing-li m-neh keng-deo, peh-ko z dzæn-z-go; we-leh keh-go dao-li p'ong-djôh yiu we-ky'üoh pih-næn-go z-ken, lih-k'eh ziu pæn-tih. ²² Tsah læ ts'-bang vong-li go, ziu-z

t'ing-meng keh-go dao-li cü-kwu; gyi kying-si-go zeo-meng, teng dzæ-veh-go hong-p'in, tsô-djü keh-go dao-li, ziu m-dao-dzing-de. ²³ Tsah læ hao nyi-nyüoh-li go, ziu-z t'ing-meng ming-bah keh-go dao-li cü-kwu; gyi tao kyih-jih, yiu-teh-go kyih ih-pah *be*, yiu-teh-go loh-jih *be*, yiu-teh-go sæn-jih *be*."

18 「介呢,箇個扎秧子個比方爾拉好聽。¹⁹ 凡百聽聞 天國個道理弗明白個人,箇惡個主顧就來,拔掉其心裏扎 的個秧子。箇就是扎來路邊沿個。²⁰ 扎來有石頭烏蕩個, 就是聽聞箇個道理,立刻歡歡喜喜接受個主顧。²¹ 但是心 裏嘸得根頭,不過是暫時個。為了箇個道理碰着有委曲逼 難個事幹,立刻就班跌。²² 扎來刺棚縫裏個,就是聽聞箇 個道理主顧。其今世個愁悶,等財物個哄騙,遮住箇個道 理,就嘸陶成了。²³ 扎來好泥浴裏個,就是聽聞明白箇個 道理主顧。其倒結實,有得個結一百倍,有得個六十倍, 有得個三十倍。」

²⁴ YIÆ-SU tsæ di-ky'i ih-go pi-fông peh gyi-lah t'ing, z-ka wô: "T'in-koh k'o-pi ih-go nying tsah hao-hao iang-ts

læ gyi-go din-li: ²⁵ nying-kô tu kw'eng-joh-go z-'eo, cünying-kô-go ün-kô læ tsah bô-ts'ao læ mah-go congnyiang, ziu ky'i-de. ²⁶ Teng-tao mah ts'iu-miao sang-be-go z-'eo, bô-ts'ao yia k'en-c'ih-de. ²⁷ Cü-nying-kô-go nu-boh ziu tseo-læ, wô, 'Cü! Ng soh feh-z hao iang-ts tsah læ ng-go din-li ma? ka-ni, 'ah-li-læ yiu keh-sing bô-ts'ao?' 28 Cünying-kô teng gyi-lah wô, 'Keh z ün-kô tso-go.'? Nu-boh. wô, "Ng iao ah-lah ky'i siu-jih gyi feh?' 29 Gyi wô, 'Haovong; k'ong-p'ô ng-lah siu-jih bô-ts'ao, lin mah yia iao bah-diao. ³⁰ Ts'ia peh liang-yiang dô-kô do-ky'i-læ ih-dzih tao siu-keh. Siu-keh-go z-'eo ngô we teng siu-keh-go cükwu wô, Ng-lah sin siu-jih bô-ts'ao, pô-tang-pô bo-tænlong hao siao ho: dæn-z mah hao siu-tsing ngô kohts'ông-li."

²⁴ <u>耶穌</u>再提起一個比方撥其拉聽,是介話:「天國可 比一個人扎好好秧子來其個田裏。²⁵ 人家都睏熟個時候, 主人家個冤家來扎稗草來麥個中央,就去了。²⁶ 等到麥抽 苗生佩個時候,稗草也看出了。²⁷ 主人家個奴僕就走來, 話:『主!爾啥弗是好秧子扎來爾個田裏嗎?介呢,何裏來有箇星稗草?』²⁸ 主人家等其拉話:『箇是冤家做個。』奴僕話:『爾要阿拉去收拾其弗?』²⁹ 其話:『好留。恐怕爾拉收拾稗草,連麥也要拔掉。³⁰ 且撥兩樣大家大起來一直到收割。收割個時候我會等收割個主顧話,爾拉先收拾稗草,把打把縛帶攏好燒火。但是麥好收進我穀倉裏。』」

³¹ Tsæ di-ky'i ih-go pi-fông peh gyi-lah t'ing, z-ka wô: "T'in-koh k'o-pi-ziang ih-lih ka-ts'æ-ts, nying-kô do-leh 'ô læ gyi din-li. ³² "Væn-pah iang-ts li-deo z ka-ts'æ-ts ting siao; dziang-ky'i-læ, ts'æ-su cong-nyiang z gyi ting do, dzing-leh ih-cü jü, s-teh t'in-li-go tiao læ deng-leh gyi ô-ts-li."

31 再提起一個比方撥其拉聽,是介話:「天國可比像一粒芥菜子,人家馱勒下來其田裏。32 凡百秧子裏頭是芥菜子頂小。長起來,菜蔬中央是其頂大,成勒一株樹,使得天裏個鳥來庵勒其椏枝裏。」

³³ Yi kông ih-go pi-fông peh gyi-lah t'ing, z-ka wô: "T'in-koh" k'o-pi-ziang kao-shü, nyü-nying do-læ k'ông-leh sæn-teo min-feng cong-nyiang, teng-tao long-tsong fah-kao."

33 又講一個比方撥其拉聽,是介話:「天國可比像酵水,女人馱來囥勒三斗麪粉中央,等到攏總發酵。」

³⁴ Yiæ-su kông keh-sing ih-ts'ih-go z-ken peh congnying t'ing, tu z yüong pi-fông shih-wô; feh-z pi-fông, feh teng gyi-lah kông: ³⁵ hao s-teh sin-cü-nying kông-ko-liao shih-wô yiu yiao-nyiæn, z-ka wô, "Ngô we yüong pi-fông shih-wô k'æ k'eo; z dzong k'æ-bih t'in-di yi-læ k'ông-tih-go z-ken, Ngô we wô-c'ih-læ." [S. 78. 2.]

34 <u>耶穌</u>講箇星一切個事幹撥衆人聽,都是用比方說話。弗是比方,弗等其拉講。35 好使得先知人講過了說話有效驗,是介話:「我會用比方說話開口。是從開闢天地以來囥的個事幹,我會話出來。」[S. 78. 2.]

³⁶ KEH-TSAO Yiæ-su sæn-k'æ keh-do-dziao nying, tseo-tsing oh-lô: Gyi meng-du tseo-long-læ, wô, "Keh dinli bô-ts'ao-go pi-fông wô-wô hyiang ah-lah dao." ³⁷ Yiæ-su we-teh gyi-lah, wô: "Tsah hao iang-ts go, ziu-z Nying-go Ng-ts; ³⁸ din, ziu-z shü-ka; hao iang-ts, ziu-z t'in-koh-go ng-ts; bô-ts'ao, ziu-z keh ôh-go cü-kwu ng-ts; ³⁹ tsah bôts'ao go ün-kô, ziu-z mo-kwe; siu-keh, ziu-z z-shü mah-go z-'eo; siu-keh-go cü-kwu, ziu-z t'in-s. 40 Ka-ni, tsing-ziang bô-ts'ao siu-jih-long ho-li siao-diao, tao keh z-shü mah-go z-'eo yia we z-ka-go: ⁴¹ Nying-go Ng-ts we ts'a Gyi-go t'ins, dzong Gyi koh li-hyiang kyʻi siu-jih væn-pah [1]ta-li nying væn-ze go, teng tso fi-li z-ken cü-kwu; ⁴² pô gyi-lah tiu læ ho-lu-li: læ keh-deo yiu ngao-leh ngô-ts', di-k'oh-go sing-hyiang. ⁴³ Keh-go z-'eo tsing-dzih nying læ gyi-lah Ah-tia koh li-hyiang we ziang nyih-deo ka kwông-liang. Yiu ng-to we t'ing go cü-kwu, kæ t'ing.

36 箇遭<u>耶穌</u>散開箇大潮人,走進屋落。其門徒走攏來,話:「箇田裏稗草個比方話話向阿拉道。」³⁷ 耶穌回

答其拉,話:「扎好秧子個,就是人個兒子。³⁸ 田,就是世界;好秧子,就是天國個兒子;稗草,就是箇惡個主顧兒子。³⁹ 扎稗草個冤家,就是魔鬼;收割,就是時世末個時候;收割個主顧,就是天使。⁴⁰ 介呢,正像稗草收拾攏火裹燒掉,到箇時世末個時候也會是介個。⁴¹ 人個兒子會差其個天使,從其國裏向去收拾凡百帶累^[1]人犯罪個,等做非禮事幹主顧。⁴² 把其拉丟來火爐裏。來箇頭有咬勒牙齒啼哭個聲響。⁴³ 箇個時候正直人來其拉阿爹國裏向會像日頭介光亮。有耳朵會聽個主顧,該聽。

[1] 'Ôh-tsia wô, s-teh nying pæn-tih. 或者話, 使得人班跌。

⁴⁴ "T'in-koh yi k'o-pi-ziang din-li k'ông-tih-go wang-dzæ; ih-go nying zing-djôh ziu kæ-sah-ts, we-leh hwun-hyi ziu kyü-ky'i ma-diao gyi long-tsong kô-kyi, ky'i ma keh-go din læ.

44 「天國又可比像田裏园的個橫財。一個人尋着就蓋 煞仔,為了歡喜就歸去賣掉其攏總家計,去買箇個田來。

- ⁴⁵ "T'in-koh yi k'o-pi-ziang ih-go k'ah-shông, læ-tih zing hao-go cü-ts; ⁴⁶ zing-djôh ih-lih ting dzih-din-go, ziu kyü-ky'i ma-diao long-tsong kô-kyi, ky'i ma keh-lih cü-ts læ.
- 45 「天國又可比像一個客商,來的尋好個珠子。46 尋 着一粒頂值鈿個,就歸去賣掉攏總家計,去買箇粒珠子 來。
- ⁴⁷ "T'in-koh yi k'o-pi-ziang ih-ting mông, 'ô læ hæ-li, teo-tsing pah-yiang ng: ⁴⁸ yi-kying mun-de, ziu t'o-zông ngen, zo-lôh, hao-go kæn-tsing shü-dong-li, w̃a-go tiu-diao. ¹⁹ Z-shü mah-go z-'eo yia z-ka: keh-sing t'in-s we c'ih-læ, dzong tsing-dzih nying-go: cong-nyiang feng-c'ih ôh-nying, ⁵⁰ pô gyi-lah tiu-leh ho-lu-li: læ keh-deo; yiu ngao-leh-ngô-ts' di-k'oh-go sing-hyiang."
- ⁴⁷「天國又可比像一頂網,下來海裏,兜進百樣魚。 ⁴⁸已經滿了,就拖上岸,坐落,好個揀進水桶裏,壞個丟 掉。⁴⁹時世末個時候也是介。箇星天使會出來,從正直人

個中央分出惡人, ⁵⁰ 把其拉丟勒火爐裏。來箇頭有咬勒牙 齒啼哭個聲響。」

⁵¹ Yiæ-su teng gyi-lah wô, "Keh-sing long-tsong *shih-wô* ng-lah ming-bah feh?" Gyi-lah wô, "Cü, ming-bah-go." ⁵² Yiæ-su teng gyi-lah wô, "Sô-yi væn-pah doh-shü-nying t'in-koh-go dao-li 'ôh-we-de, k'o-pi-ziang ih-go kô-cü, dzong gyi ts'ông-kw'u li-hyiang sing tong-si gyiu tong-si tu do-c'ih-læ."

51 <u>耶穌</u>等其拉話:「箇星攏總說話爾拉明白弗?」其 拉話:「主,明白個。」⁵² <u>耶穌</u>等其拉話:「所以凡百讀 書人天國個道理學會了,可比像一個家主,從其倉庫裏向 新東西舊東西都馱出來。」

⁵³ YIÆ-SU kông-hao keh-sing pi-fông shih-wô, ziu li-k'æ keh-deo; ⁵⁴ tseo tao Zi-go peng di-fông, læ gyi-lah jü-we-dông-li kông dao-li peh gyi-lah t'ing; s-teh gyi-lah ky'ih-hoh, z-ka wô, "Keh-go Nying dzong 'ah-li ka teh-djôh keh-go ts'ong-ming, teng keh-sing jing-tsih? ⁵⁵ Gyi ky'i feh-z keh moh-ziang s-vu-go Ng-ts? Gyi ah-nyiang ky'i

feh-z kyiao-leh Mô-li-üô? Gyi hyüong-di *ky'i feh-z kyiao-leh* Yüô-kôh, Iah-si, Si-meng, Yiu-da? ⁵⁶ Gyi tsi-me ky'i feh-z long-tsong teng ah-lah tso di-fông djü-tong? Ka-ni, Gyi dzong 'ah-li teh-djôh keh-sing long-tsong z-ken?" ⁵⁷ Ziu in-tseng ky'i-diao Gyi. Yiæ-su teng gyi-lah wô, "Sin-cünying, ziah feh-z læ gyi-zi-go di-fông zi-go oh-lô, tsæ-ve mt'i-min-go." ⁵⁸ We-leh gyi-lah feh siang-sing go yün-kwu, Gyi læ keh-deo m-teh tso to-siao jing-tsih.

53 耶穌講好箇星比方說話,就離開箇頭。54 走到自個本地方,來其拉聚會堂裏講道理撥其拉聽。使得其拉喫惟,是介話:「箇個人從何裏介得着箇個聰明,等箇星神蹟?55 其豈弗是箇木匠師父個兒子?其阿孃豈弗是叫勒馬利亞?其兄弟豈弗是叫勒雅各、約西、西門、猶大?56 其姊妹豈弗是攏總等阿拉做地方住東?介呢,其從何裏得着箇星攏總事幹?」57 就嫌憎棄掉其。耶穌等其拉話:「先知人,若弗是來其自個地方自個屋落,再গ嘸體面個。」58 為了其拉弗相信個緣故,其來箇頭嘸得做多少神蹟。

Mt. XIV.

KEH-GO z-'eo ^[1]væn-wông Hyi-lih t'ing-meng Yiæsu-go ming-sing, ² ziu teng dzing-ts wô, "Keh z 'Ang-si-ligo Iah-'en: gyi z dzong si-nying cong-nyiang weh-cün-lægo; keh-lah we hyin-c'ih keh-sing jing-tsih læ."

箇個時候藩王^[1]希律聽聞<u>耶穌</u>個名聲,²就等臣子話: 「箇是行洗禮個約翰。其是從死人中央活轉來個,箇勒會 顯出箇星神蹟來。」

[1] Y. 'E. 32. 耶 (穌)後(頭)32 (年)。(原註)

(³ Keh-go Hyi-lih *zin-deo* ^[1]we-leh gyi hyüong-di Filih-go lao-nyüing Hyi-lo-ti-go z-ken, k'ô Iah-'en bo-ts, kwæn læ lao-kæn-li. ⁴ Ing-we Iah-'en teng Hyi-lih wô, "Ng feh ing-kæ c'ü gyi." ⁵ *Hyi-lih* tang-tsiang sah Iah-'en, *tsih-z* p'ô pah-sing, ing-we gyi-lah sön gyi z sin-cü-nying. ⁶ Hyi-lih ^[2]tso-sang z-'eo, Hyi-lo-ti-go nön læ ^[3]tông-min-zin t'iao-vu, peh Hyi-lih hwun-hyi. ⁷ Keh-lah vah-tsiu, ing-hyü peh nyiang-ts ze-bin iao soh-go tong-si. ⁸ Nyiang-ts be ah-

nyiang t'iao-so, ziu wô, "'Ang-si-li Iah-'en-go deo, bun-li tsi-ts, dông-deo peh ngô." ⁹ Koh-wông ziu iu-meng: tsih-z we-leh vah-ko-tsiu, yi we-leh dong-zih-go nying-k'ah lætong, keh-lah feng-fu peh gyi. ¹⁰ Ziu ts'a nying tao lao-kæn-li ky'i tsæn Iah-'en-go deo. ¹¹ Gyi-go deo bun-li tsi-ts do-læ, ziu kao-fu nyiang-ts; *nyiang-ts* do-ky'i peh ah-nyiang. Iah-'en-go meng-du tseo-læ, tsiang gyi s-siu entsông-hao; ziu ky'i kao-su Yiæ-su.)

(³ 箇個<u>希律</u>前頭為了^[1]其兄弟<u>腓力</u>個老孃<u>希羅底</u>個事幹, 河約翰縛仔,關來牢監裏。⁴ 因為約翰等希律話:「爾弗應該娶其。」⁵ <u>希</u>律打賬殺<u>約翰</u>,只是怕百姓,因為其拉算其是先知人。⁶ <u>希</u>律做生^[2]時候,<u>希羅底</u>個囡來當面前^[3] 跳舞,撥<u>希</u>律歡喜。⁷ 箇勒罰咒,應許撥孃子隨便要啥個東西。⁸ 孃子被阿孃挑唆,就話:「行洗禮約翰個頭,盤裏齒仔,蕩頭撥我。」⁹ 國王就憂悶。只是為了罰過咒,又為了同席個人客來東,箇勒吩咐撥其。¹⁰ 就差人到牢監裏去斬約翰個頭。¹¹ 其個頭盤裏齒仔馱來,就交付孃子。孃子馱

去撥阿孃。<u>約翰</u>個門徒走來,將其屍首安葬好,就去告訴耶穌。)

- [1] Y. 'E. 30. 耶(穌)後(頭)30(年)。(原註)
- [2] Y. 'E. 32. 耶 (穌)後(頭)32 (年)。(原註)
- [2] Peng-veng, tông-cong-nyiang. 本文, 當中央。(原註)
- ¹³ Yiæ-su t'ing-meng ziu li-k'æ keh-deo, lôh jün, s-'ô tao ih-t'ah kw'ông-iæ di-fông ky'i. Yiu ih-do-dziao nying teh-cü, ziu dzong kôh zing-li bu-'ang keng-leh Gyi ky'i. ¹⁴ Yiæ-su tseo-c'ih-læ, k'en-kyin yiu ih-do-dziao nying, ziu æ-lin gyi-lah, i-hao gyi-lah cong-nyiang yiu-bing-go cü-kwu.
- 13 <u>耶穌</u>聽聞就離開箇頭,落船,私下到一埭曠野地方去。有一大潮人得知,就從各城裏步行跟勒其去。¹⁴ <u>耶穌</u>走出來,看見有一大潮人,就哀憐其拉,醫好其拉中央有病個主顧。
- ¹⁵ Tao yia-kwʻa, meng-du tseo-long-læ, teng Gyi wô, "Dông-deo z kwʻông-iæ di-fông, z-'eo yi-kying dzi-de; hao

sæn-k'æ keh-do-dziao nying, peh gyi-lah tao keh-sing hyiang-ts'eng zi ky'i ma ky'üoh-zih ky'i." 16 Yiæ-su teng meng-du wô, "Gyi-lah peh-pih ky'i; ng-lah hao peh gyi ky'üoh." ¹⁷ Meng-du teng Gyi wô, "Ah-lah dông-deo tsih yiu ng-go mun-deo liang-kwang ng læ-tong." ¹⁸ Gyi wô, "Do-læ peh Ngô." 19 Yiæ-su ziu feng-fu keh-do-dziao nying ts'ing-ts'ao di-zông zo-tæn-lôh; do-leh keh ng-go mun-deo liang-kwang ng, deo dæ-ky'i hyiang t'in ts'æn-nyiæn-kyi; ziu p'ah-k'æ mun-deo, kao-fu meng-du; meng-du feng peh keh-do-dziao nying. ²⁰ Long-tsong tu ky'üoh-ko, yi ky'üoh-pao-de: ky'üoh-dzing-go ling-se siu-jih-long, yiu mun-mun jih-nyi læn. ²¹ ky'üoh-go cü-kwu, nen iah-læ yiu ng-ts'in, nyü-nying siao-nying dzæ-nga.

15 到夜快,門徒走攏來,等其話:「蕩頭是曠野地方,時候已經遲了,好散開箇大潮人,撥其拉到箇星鄉村自去買喫食去。」¹⁶ <u>耶穌</u>等門徒話:「其拉不必去,爾拉好撥其喫。」¹⁷ 門徒等其話:「阿拉蕩頭只有五個饅頭兩梗魚來東。」¹⁸ 其話:「馱來撥我。」¹⁹ 耶穌就吩咐箇大

潮人青草地上坐帶落。馱勒箇五個饅頭兩梗魚,頭抬起向 天懺唸記。就脈開饅頭,交付門徒。門徒分撥箇大潮人。²⁰ 攏總都喫過,又喫飽了。喫剩個零碎收拾攏,有滿滿十二 籃。²¹ 喫個主顧,男約來有五千,女人小人在外。

²² Yiæ-su ze-siu ts'e meng-du lôh jün, sin tao te-ngen ky'i; *Zi iao teng* tao sæn-k'æ keh-do-dziao nying. ²³ Keh-do-dziao nying sæn-k'æ-ts, tseo-zông sæn-teng, s-'ô ky'i tao-kao. Yi-kying yia-kw'a, Gyi doh-zi læ-kæn: ²⁴ dæn-z jün læ hæ cong-nyiang læ-kæn, be lông dông-læ-dông-ky'i; ing-we teo-fong yün-kwu.

22 <u>耶穌</u>隨手催門徒落船,先到對岸去。自要等到散開 箇大潮人。²³ 箇大潮人散開仔,走上山頂,私下去禱告。 已經夜快,其獨自來間。²⁴ 但是船來海中央來間,被浪盪 來盪去,因爲鬥風緣故。

²⁵ Tông-yia s-kang z-'eo, Yiæ-su tao meng-du u-dông læ; z hæ min-teng ka tseo-leh-læ. ²⁶ Meng-du k'en-kyin Gyi hæ min-teng læ-kæn tseo, ky'ih-hoh, wô, "Keh z ih-go hyin-ling:" we-leh p'ô, ziu wæ ih-sing eo-ky'i-læ. ²⁷ Yiæ-

su lih-k'eh teng gyi-lah kông ih-sing, z-ka wô, "Fông-sing; z Ngô; hao-vong p'ô." ²⁸ Pe-teh we-teh Gyi, wô, "Cü, ziah z Ng, hao eo ngô shü min-teng tao Ng u-sen læ." ²⁹ Gyi wô, "Hao læ." Pe-teh ziu dzong jün-li t'iao-lôh, shü min-teng ka tseo, iao tao Yiæ-su u-sen ky'i. 30 K'en-kyin fong mang, p'ô-ky'i-læ-de; iao dzing-lôh-ky'i, ziu wæ-sing eo-ky'i-læ, wô, "Cü, kyiu ngô." 31 Yiæ-su lih-k'eh sing-c'ih siu cô gyi, teng gyi wô, "Ng siao siang-sing go cü-kwu, dza-we nyising?" ³² Gyi-lah tseo-tsing jün-li, fong ziu sih-de. ³³ Jün-ligo nying tu læ pa Gyi, z-ka wô, "Ng tsing-tsing z Jingming-go Ng-ts."

²⁵ 當夜四更時候,<u>耶穌</u>到門徒烏蕩來,是海面頂介走勒來。²⁶ 門徒看見其海面頂來間走,喫惟,話:「箇是一個顯靈。」為了怕,就懷一聲謳起來。²⁷ <u>耶穌</u>立刻等其拉講一聲,是介話:「放心,是我,好甮怕。」²⁸ <u>彼得</u>回答其,話:「主,若是爾,好謳我水面頂到爾烏碎來。」²⁹ 其話:「好來。」<u>彼得</u>就從船裏跳落,水面頂介走,要到<u>耶穌</u>烏碎去。³⁰ 看見風猛,怕起來了,要沉落去,就懷聲

謳起來,話:「主,救我。」³¹ <u>耶穌</u>立刻伸出手揸其,等 其話:「爾小相信個主顧,咋會疑心?」³² 其拉走進船 裏,風就息了。³³ 船裏個人都來拜其,是介話:「爾眞眞 是神明個兒子。」

³⁴ Gyi-lah du-ko tao Keh-nyi-sah-leh di-fông. ³⁵ Keh-t'ah di-fông-go nying nying-teh Gyi, ziu ts'a nying s-deh-lön-ky'ün ky'i *t'ong-cü*, long-tsong yiu-bing-go cü-kwu tu ta tao Gyi u-sen læ-de; ³⁶ gyiu-gyiu Gyi tæn-tsih peh gyi-lah en-en Gyi i-zông ken-den: z en-go cü-kwu tu hao-de.

34 其拉渡過到<u>革尼撒勒</u>地方。35 箇埭地方個人認得其,就差人四凸亂圈去通知,攏總有病個主顧都帶到其烏碎來了。36 求求其單只撥其拉按按其衣裳秆頭,是按個主顧都好了。

Mt. XV.

KEH-GO z-'eo Yiæ-lu-sah-leng-go doh-shü-nying teng Fah-li-sæ nying tseo tao Yiæ-su u-sen læ, wô, ² "Ng-go meng-du soh z-ken we-be tsu-tsong djün-lôh-læ-go kwutin, ky'üoh-væn z-'eo feh tsôh gyiang siu?" ³ Yiæ-su weteh gyi-lah, wô, "Ng-lah soh z-ken, we-leh ng-lah djün-lôhlæ-go kwu-tin, ky'i we-be Jing-ming-go lih-fah ni? ⁴ Jingming feng-fu, z-ka wô, 'Yüong kying-djong ng-go vu-meo;' [C. 2. 12.] yi wô, 'Zôh-mô ah-tia 'ôh-tsia ah-nyiang cü-kwu, pih iao bæn gyi si-ze.' [C. 21. 17.] ⁵ Dæn-z ng-lah wô, 'Ziah yiu nying teng gyi ah-tia ôh-tsia ah-nyiang wô, Ngô ingtông tao ng go hao-c'ü, tu tseng-ky'i peh Jing-ming de; ⁶ gyi ziu hao-vong kying-djong gyi ah-tia teng ah-nyiang.' Z-ka, we-leh ng-lah djün-lôh-læ-go kwu-tin fi-diao Jing-ming-go lih-fah. ⁷ Kô-hao-nying! Yi-sæ-üô ts-tin ng-lah yü-sin kông-go shih-wô jih-dzæ z-go; gyi wô, ⁸ 'Keh-go pah-sing k'eo-li ts'ing-gying Ngô, cü-pô kying-djong Ngô; tsih-z gyilah-go sing teng Ngô li-yün. ⁹ Gyi-lah yüong nying-go

feng-fu tông *Jing-ming-go* kao-hyüing, z bah-lih-lih voh-z Ngô.' [Y. 29.13.]"

箇個時候耶路撒冷個讀書人等法利賽人走到耶穌烏碎 來,話: 2 「爾個門徒啥事幹違背祖宗傳落來個古典, 喫飯 時候弗作滰手?」3耶穌回答其拉,話:「爾拉啥事幹,為 了爾拉傳落來個古典,去違背神明個律法呢?4神明吩咐, 是介話: 『用敬重爾個父母; 』[C. 2. 12.] 又話: 『警罵阿 爹或者阿孃主顧,必要辦其死罪。』[C. 21. 17.] ⁵ 但是爾拉 『若有人等其阿爹或者阿孃話,我應當到爾個好處, 話: 都尊起撥神明了。6其就好甮敬重其阿爹等阿孃。』是介, 為了爾拉傳落來個古典廢掉神明個律法。⁷ 假好人!以賽亞 指點爾拉預先講個說話實在是個,其話:8『箇個百姓口裏 親近我,嘴巴敬重我,只是其拉個心等我離遠。9 其拉用人 個吩咐當神明個教訓,是白力力服侍我。』[Y. 29.13.]」

¹⁰ Yiæ-su ziu eo-long keh-dziao nying, teng gyi-lah wô, "Ng-lah kæ t'ing, yia yüong ming-bah: ¹¹ feh-z tseo-tsing cü-pô-li go tong-si we long nying ao-tsao; tsih-yiu dzong cü-pô-li c'ih-læ-go, keh z we long gyi ao-tsao."

- 10 <u>耶穌</u>就謳攏箇潮人,等其拉話:「爾拉該聽,也用明白。¹¹ 弗是走進嘴巴裏個東西會弄人鏖糟,只有從嘴巴裏出來個,箇是會弄其鏖糟。」
- ¹² Keh-tsao Gyi meng-du tseo-long-læ, teng Gyi wô, "Fah-li-sæ nying t'ing-meng keh-kyü shih-wô ông-de, Ng teh-cü feh?" ¹³ Yiæ-su we-teh wô, "Væn-pah feh-z Ngô t'in-zông Ah-tia cong-tih-go jü, tsong we lin keng bah-diao. ¹⁴ Ng-lah vong ky'i kwun gyi: gyi-lah z hah-ts læ-tih ling hah-ts-go lu. Ziah-z hah-ts ling hah-ts, liang-'ô tu we tih-lôh den-li."
- 12 箇遭其門徒走攏來,等其話: 「<u>法利賽</u>人聽聞箇句 說話快了,爾得知弗?」¹³ <u>耶穌</u>回答話: 「凡百弗是我天 上阿爹種的個樹,總會連根拔掉。¹⁴ 爾拉留去管其。其拉 是瞎子來的領瞎子個路。若是瞎子領瞎子,兩下都會跌落 窞裏。」
- ¹⁵ Pe-teh k'æ k'eo teng Gyi wô, "Keh-go pi-fông wô-wô hyiang ah-lah dao." ¹⁶ Yiæ-su wô, "Lin ng-lah tao jü-kying wa we feh ming-bah! ¹⁷ Soh wa feh hyiao-teh, væn-

pah tseo-tsing cü-pô-li go tong-si z 'ang-lôh du-bi, ziu ka-c'ih k'ang-ts-li de? ¹⁸ dæn-z cü-pô-li tseo-c'ih-læ-go, z dzong sing-li ka fah-c'ih-læ; keh z we long gyi ao-tsao go. ¹⁹ Ing-we ôh-go ts'eng-deo, tso hyüong-siu, t'eo lao-nyüing, biao piao-ts, tso dao-zeh, tso kô te-tsing, teng pông-hwe shih-wô, tu z dzong sing-li ka fah-c'ih-læ: ²⁰ keh-sing z we long nying ao-tsao go: dæn-z feh gyiang siu ky'üoh-væn feh we long nying ao-tsao."

15 <u>彼得</u>開口等其話:「箇個比方話話向阿拉道。」¹⁶ <u>耶穌</u>話:「連爾拉到如今還會弗明白!¹⁷ 啥還弗曉得,凡百走進嘴巴裏個東西是行落肚皮,就介出坑子裏了?¹⁸ 但是嘴巴裏走出來個,是從心裏介發出來,箇是會弄其鏖糟個。¹⁹ 因為惡個忖頭,做兇手,偷老嬝,嫖婊子,做盗賊,做假對證,等謗毀說話,都是從心裏介發出來。²⁰ 箇星是會弄人鏖糟個。但是弗灠手喫飯弗會弄人鏖糟。」

²¹ YIÆ-SU li-k'æ keh-deo, tsæn tao T'e-lo Si-teng siang-gying-go di-fông. ²² K'eo-k'eo yiu ih-go Kyüô-nengo nyü-nying dzong keh-go di-ka tseo-c'ih-læ, hyiang-

hyiang eo Gyi, z-ka wô, "Cü, Da-bih-go 'Eo-dæ, æ-lin ngô: ngô-go nön zia-bing sang-leh li-'æ-go." ²³ Yiæ-su ih-kyü tu feh we-teh gyi. Meng-du ziu tseo-long-læ, ts'ing-meng Gyi, wô, "Hao peh gyi ky'i; ing-we ah-lah 'eo-pe gyi wæwæ læ-tih hyiang." ²⁴ Yiæ-su we-teh, z-ka wô, "Ngô z tæntsih vong-ts'a tao Yi-seh-lih keh-dzoh shih-diao-kæn-go yiang u-dông læ-go." ²⁵ Keh-go nyü-nying tseo-long, pa-pa Gyi, wô, "Cü, pông-dzu ngô." Yiæ-su we-teh gyi, wô, "Mneh hao do ng-nô-go ky 'üoh-zih tiu peh wun-kyi." Gyi wô, "Cü, z-go: ing-we wun-kyi yia ky'üoh cü-nying-kô cohteng-'ô tih-lôh-go ling-se." ²⁸ Keh-tsao Yiæ-su we-teh gyi, wô, "Nyü-nying, ng siang-sing-go sing do-go: hao i ng-go sing-nyün ka tso." Gyi-go nön tông-z ziu hao-de.

21 <u>耶穌</u>離開箇頭,趲到<u>推羅、西頓</u>相近個地方。²² 扣 扣有一個迦南個女人從箇個地界走出來,響響謳其,是介 話:「主,大闢個後代,哀憐我。我個囡邪病生勒厲害 個。」²³ <u>耶穌</u>一句都弗回答其。門徒就走攏來,請問其, 話:「好撥其去,因爲阿拉後背其懷懷來的響。」²⁴ 耶穌 回答,是介話:「我是單只奉差到<u>以色列</u>箇族失掉間個羊島蕩來個。」²⁵ 箇個女人走攏,拜拜其,話:「主,幫助我。」<u>耶穌</u>回答其,話:「嘸得好馱兒囡個喫食丟撥黃狗。」其話:「主,是個。因為黃狗也喫主人家桌凳下跌落個零碎。」²⁸ 箇遭<u>耶穌</u>回答其,話:「女人,爾相信個心大個。好依爾個心願介做。」其個囡當時就好了。

²⁹ YIÆ-SU li-k'æ keh-deo, tang Kyüô-li-li hæ pin-yin ka ky'i; tseo-zông ih-zo sæn-teng, zo-kæn. ³⁰ Yiu ih-dodziao nying ta-ling kwa-kyiah, hah-ngæn, ô-ts, dzæn-ky'üih-peh-djün-go, teng hyü-to bih-go *bing-nying*, tseolong Yiæ-su u-sen læ, fông læ Gyi-go kyiah-'ô; Gyi ziu teng gyi-lah i-hao-de: ³¹ s-teh keh-do-dziao nying k'en-kyin ô-ts læ-tih kông, dzæn-ky'üih-go wun-djün, kwa-kyiah-go lætih tseo, hah-ngæn læ-tih k'en, tu hyi-gyi; ziu tsæn-me keh-we Yi-seh-lih-go Jing-ming.

29 <u>耶穌</u>離開箇頭,打<u>加利利</u>海邊沿介去。走上一座山頂,坐間。³⁰ 有一大潮人帶領拐腳,瞎眼,啞子,殘缺不全個,等許多別個病人,走攏耶穌烏碎來,放來其個腳

下。其就等其拉醫好了。³¹ 使得箇大潮人看見啞子來的講,殘缺個完全,拐腳個來的走,瞎眼來的看,都稀奇。 就讚美箇位以色列個神明。

³² Yiæ-su eo-long Gyi meng-du, wô, "Ngô æ-lin kehdziao nying, ing-we teng Ngô dô-kô læ-tong yi-kying sæn nyih de, næn-kæn m-kao hao ky'üoh: Ngô yia feh iao peh gyi-lah ngo-leh ky'i, k'ong-p'ô lu-li iao t'eh-lih." 33 Mengdu teng Gyi wô, "Ah-lah læ kw'ông-iæ di-fông 'ah-li-læ yiu keh-tang ky'üoh-zih, hao peh ka ih-do-dziao nying ky'üoh-pao ni?" ³⁴ Yiæ-su teng gyi-lah wô, "Ng-lah yiu kyigo mun-deo læ-tong?" Gyi-lah wô, "Ts'ih-go; wa-yiu kyikwang siao-siao ng." 35 Yiæ-su ziu feng-fu keh-dziao nying di-yiang-li zo-tæn-lôh: ³⁶ do-leh keh ts'ih-go mun-deo teng keh-sing ng, zia-hao-ts, p'ah-k'æ, kao-fu meng-du; meng-du feng peh keh-dziao nying. 37 Long-tsong tu ky'üoh-ko, yi ky'üoh-pao-de: siu-jih ky'üoh-dzing-go lingse, yiu mun-mun ts'ih læn. 38 Ky'üoh-go cü-kwu, nen yiu s-ts'in, nyü-nying siao-nying dzæ-nga.

32 <u>耶穌</u>謳攏其門徒,話:「我哀憐箇潮人,因為等我大家來東已經三日了,難間嘸告好喫。我也弗要撥其拉餓勒去,恐怕路裏要脫力。」³³ 門徒等其話:「阿拉來曠野地方何裏來有箇打喫食,好撥介一大潮人喫飽呢?」³⁴ <u>耶</u>蘇等其拉話:「爾拉有幾個饅頭來東?」其拉話:「七個,還有幾梗小小魚。」³⁵ <u>耶穌</u>就吩咐箇潮人地垟裏坐帶落。³⁶ 馱勒箇七個饅頭等箇星魚,謝好仔,脈開,交付門徒。門徒分撥箇潮人。³⁷ 攏總都喫過,又喫飽了。收拾喫剩個零碎,有滿滿七籃。³⁸ 喫個主顧,男有四千,女人小人在外。

³⁹ *Yiæ-su* sæn-k'æ keh-do-dziao nying, ziu lôh jün, tao Meh-da-lah-go di-ka læ.

39 耶穌散開箇大潮人,就落船,到抹大拉個地界來。

Mt. XVI.

Keh-tsao Fah-li-sæ nying teng Sah-t'u-kæ nying tseolong-læ s-s Yiæ-su, ts'ing Gyi hyin-c'ih ih-go t'in-li-go ziao-deo peh gyi-lah k'en. ² Yiæ-su we-teh gyi-lah, wô, "Yia-kw'a z-'eo ng-lah wô, 'Yiu hao t'in-kô; ing-we t'in yiu 'ong-ngô:' 3 tsao t'in-nyiang yi wô, 'Kyih-mih yiu fong-yü; ing-we t'in yiu 'ong-ngô teng heh-ky'i.' Kô-hao-nying! ky'i bin-pih t'in-li-go siang-mao, ng-lah tao hyiao-teh-go; yindzæ z-shü-go ziao-deo, dza-we bin-feh-c'ih ni? 4 Keh-go hyüong-ôh kæn-ying-go shü-dæ iao-siang gyiu ziao-deo: djü-leh sin-cü Iah-nô-go ziao-deo ts-nga, tsong feh peh gyi k'en soh-go ziao-deo." Ziu li-k'æ gyi-lah ky'i-de.

箇遭法利賽人等撒土該人走攏來試試<u>耶穌</u>,請其顯出一個天裏個兆頭撥其拉看。² <u>耶穌</u>回答其拉,話:「夜快時候爾拉話: 『有好天家,因為天有紅牙。』³ 早天亮又話:『今末有風雨,因為天有紅牙等黑氣。』假好人!去辨別天裏個相貌,爾拉倒曉得個,現在時世個兆頭,咋會辨弗出呢?⁴ 箇個兇惡姦淫個世代要想求兆頭。除了先知<u>約拿</u>個兆頭之外,總弗撥其看啥個兆頭。」就離開其拉去了。

⁵ Meng-du du-ko keh-ngen, mông-kyi ta ky'üoh-zih. ⁶ Yiæ-su teng gyi-lah wô, "Yüong siao-sing kwu-djôh Fah-lisæ nying teng Sah-t'u-kæ nying-go kao-shü." ⁷ Meng-du ziu dô-kô nyi-leng, z-ka wô, "Keh z we-leh ah-lah feh ta mun-deo go yün-kwu." ⁸ Yiæ-su hyiao-teh, ziu teng gyi-lah wô, "Siao siang-sing go cü-kwu, ng-lah dza-we-we-leh feh ta mun-deo læ-tih nyi-leng? ⁹ Soh wa feh ming-bah, soh feh kyi-teh keh ng-ts'in nying ng-go mun-deo z-ken, ng-lah siu-jih *ling-se* yiu kyi læn? ¹⁰ Wa-yiu keh s-ts'in nying ts'ihgo mun-deo z-ken, siu-jih ling-se yiu kyi læn? 11 Ng-lah dza-we feh ming-bah, Ngô eo ng-lah kwu-djôh Fah-li-sæ nying teng Sah-t'u-kæ nying-go kao-shü, bing feh-z ts-tin mun-deo?" 12 Keh-tsao gyi-lah hyiao-teh Yiæ-su feh-z eo kwu-djôh mun-deo-go kao-shü; z iao gyi kwu-djôh Fah-lisæ teng Sah-t'u-kæ nying-go dao-li.

⁵ 門徒渡過箇岸,忘記帶喫食。⁶ <u>耶穌</u>等其拉話: 「用小心顧着<u>法利賽</u>人等<u>撒土該</u>人個酵水。」 ⁷ 門徒就大家議論,是介話: 「箇是為了阿拉弗帶饅頭個緣故。」 ⁸ <u>耶穌</u>曉

得,就等其拉話:「小相信個主顧,爾拉咋會為了弗帶饅頭來的議論?⁹啥還弗明白,啥弗記得箇五千人五個饅頭事幹,爾拉收拾零碎有幾籃?¹⁰還有箇四千人七個饅頭事幹,收拾零碎有幾籃?¹¹爾拉咋會弗明白,我謳爾拉顧着 <u>法利賽</u>人等<u>撒土該</u>人個酵水,並弗是指點饅頭?」¹² 箇遭 其拉曉得<u>耶穌</u>弗是謳顧着饅頭個酵水,是要其顧着<u>法利賽</u> 等撒土該人個道理。

 13 YIÆ-SU tseo tao Fi-lih-go Kæ-sah-li-üô di-fông, ziu meng Gyi meng-du, z-ka wô, "Ngô, Nying-go Ng-ts, nying-kô wô Ngô z jü?" 14 Gyi-lah wô, "Yiu-teh wô z 'Ang-si-li-go Iah-'en; yiu-teh wô z Yi-li-üô; wa-yiu wô z Yiæ-li-mi, 'ôh-tsia sin-cü-nying nen-cong ih-go." 15 Yiæ-su teng gyi-lah wô, "Ng-lah wô Ngô z jü?" 16 Si-meng Pe-teh we-teh, z-ka wô, "Ng z keh-we Kyi-toh, keh weh-go Jing-ming-go Ng-ts."

13 <u>耶穌走到腓力個該撒利亞</u>地方,就問其門徒,是介話:「我,人個兒子,人家話我是誰?」¹⁴ 其拉話:「有得話是行洗禮個<u>約翰</u>,有得話是<u>以利亞</u>,還有話是<u>耶利</u>米,或者先知人內中一個。」¹⁵ <u>耶穌</u>等其拉話:「爾拉話

我是誰?」¹⁶ 西門彼得回答,是介話:「爾是箇位<u>基督</u>, 箇活個神明個兒子。」

¹⁷ Yiæ-su we-teh gyi, wô, "Si-meng Pô-Iah-nô, ng yiu foh-ky'i: ing-we *keh-go z-ken* feh-z nyüoh-sing teng hyüih-ky'i hyin-c'ih-læ peh ng hyiao-teh, z Ngô t'in-zông-go Ahtia *hyin-c'ih-læ-go*. ¹⁸ Wa-yiu Ngô wô hyiang ng dao, Ng z ^[1]Pe-teh; læ keh-kw'e zah-deo-zông Ngô iao ky'i-zao Ngôgo kong-we; ing-s-go shü-dao yia long gyi feh-ko. ¹⁹ T'in-koh-go yiah-z Ngô we kao-dæ ng: væn-pah læ di-'ô ng sô bo-djü-go, læ t'in-zông yia we bo-djü gyi; læ di-'ô ng sô sih-fông-go, læ t'in-zông yia we sih-fông gyi."

17 <u>耶穌</u>回答其,話:「<u>西門巴約拿</u>,爾有福氣。因為 箇個事幹弗是肉身等血氣顯出來撥爾曉得,是我天上個阿 爹顯出來個。¹⁸ 還有我話向爾道,爾是<u>彼得</u>^[1],來箇塊石 頭上我要去造我個公會,陰司個勢道也弄其弗過。¹⁹ 天國 個鑰匙我會交代爾。凡百來地下爾所縛住個,來天上也會 縛住其;來地下爾所釋放個,來天上也會釋放其。」

- [1] Pe-teh *go ka-shih ziu-z*, zah-deo. <u>彼得</u>個解說就是石頭。(原 註)
- ²⁰ Keh-tsao ting-côh Gyi meng-du, m-nao teng nyingkô wô Gyi z Yiæ-su keh-we Kyi-toh.
- ²⁰ 窗遭叮囑其門徒,嘸得好等人家話其是<u>耶穌</u>箇位<u>基</u>督。
- ³¹ DZONG-TS'-YI-'EO Yiæ-su t'ong-cü meng-du, Gyi-zi pih iao tao Yiæ-lu-sah-leng ky'i, læ tsiang-lao tsi-s-deo doh-shü-nying siu-li ziu hyü-to kw'u-næn, peh gyi-lah long-sah, tao di-sæn nyih yi weh-cün-læ. ²² Pe-teh te-te Gyi, læn-tsu Gyi, z-ka wô, "Cü! hao-sing shih-wô! Ng tsong feh we p'ong-djôh keh-go *kw'u-næn*." ²³ Yiæ-su nyin-cün, teng Pe-teh wô, "Sah-dæn, tseo-ko; ng z Ngô-go tsu-kah-sing: ing-we ng feh liu-sing Jing-ming-go z-ken, tæn *liu-sing* nying-go z-ken."
- ²¹ 從此以後<u>耶穌</u>通知門徒,其自必要到<u>耶路撒冷</u>去, 來長老祭司頭讀書人手裏受許多苦難,撥其拉弄煞,到第

三日又活轉來。²² <u>彼得</u>助助其,攔阻其,是介話:「主!好心說話!爾總弗會碰着箇個苦難。」²³ <u>耶穌</u>扭轉,等<u>彼</u>得話:「<u>撒但</u>,走過。爾是我個阻隔心。因為爾弗留心神明個事幹,單留心人個事幹。」

²⁴ Keh-tsao Yiæ-su teng meng-du wô, "Ziah yiu nying iao keng-djôh Ngô, pih iao p'ih-diao zi-go sing-siang, peleh zi jih-z-kô ka læ keng Ngô. ²⁵ Væn-pah iao pao-djün zi [1]sing-ming cü-kwu, fæn-cün we sông-diao gyi; we-leh Ngô k'eng sông-diao sing-ming cü-kwu, fæn-cün we zingdjôh gyi. ²⁶ Ziah yiu nying teh-djôh pin-t'in-'ô-go dzæ-veh, shih-diao zi-go ^[2]weh-ling, ka yiu soh-go ih-c'ü ni? 'Ôhtsia ih-go nying hao pô soh-go tong-si ky'i c'ü-joh gyi wehling ma? ²⁷ Ing-we Nying-go Ng-ts ziu-leh Gyi Ah-tia-go yüong-wô, we teng Gyi t'in-s dô-kô læ-gyi: keh-go z-'eo pih-ding tsiao kôh-nying-go 'ang-we pao-ing gyi-lah. ²⁸ Ngô tsing wô hyiang ng-lah dao, Dông-deo lih-tong-go yiu nying, feh-zing si-go zin-deo, we k'en-kyin Nying-go Ng-ts tsih-công Gyi koh-kô-go gyün-ping ka læ."

²⁴ 箇遭<u>耶穌</u>等門徒話:「若有人要跟着我,必要撇掉自個心想,背勒自十字架介來跟我。²⁵ 凡百要保全自性命主顧,反轉會喪掉其。為了我肯喪掉性命主顧,反轉會尋着其。²⁶ 若有人得着遍天下個財物,失掉自個活靈,介有啥個益處呢?或者一個人好把啥個東西去取贖其活靈嗎?²⁷ 因為人個兒子受勒其阿爹個榮華,會等其天使大家來其。箇個時候必定照各人個行為報應其拉。²⁸ 我眞話向爾拉道,蕩頭立東個有人,弗曾死個前頭,會看見人個兒子執掌其國家個權柄介來。」

Mt. XVII.

KO-LEH loh nyih, Yiæ-su ta-leh Pe-teh, Yüô-kôh, teng Yüô-kôh-go hyüong-di Iah-'en, ling gyi-lah tseo-zông ih-zo kao-kao sæn-li, tao s-'ô u-dông. ² Læ gyi-lah min-zin pin-c'ih kôh-yiang siang-mao: Gyi-go min-k'ong ziang nyih-deo ka t'eo-kwông-go; Gyi-go i-zông ziang liang-kwông ka bah-go. ³ Gyi-lah k'en-kyin Mo-si teng Yi-li-üô yin-c'ih-

tong, teng Yiæ-su læ-tih kông. ⁴ Pe-teh ziu k'æ k'eo teng Yiæ-su wô, "Cü, ah-lah dông-deo læ-tong tao hao-go: Ng ziah k'eng shih-wô, ah-lah dông-deo hao tah sæn-ting tsiang-bong; ih-ting peh ng, ih-ting peh Mo-si, ih-ting peh Yi-li-üô." ⁵ Gyi tsing-hao læ-tong kông-go z-'eo, yiu ih-tô shih-kwah-liang-go yüing kæ-djü gyi-lah: yüing li-hyiang yiu sing-ing c'ih-læ, z-ka wô, "Keh z Ngô ts'ing-æ-go Ng-ts, Ngô ting teh-i-go: ng-lah yüong t'ing Gyi." 6 Meng-du ih t'ing-meng ziu p'oh-tao di-yiang, do-nyiang p'ô-ky'i-læde. ⁷ Yiæ-su tseo-læ, en gyi-lah ih-en, z-ka wô, "Bô-ky'i-læ, hao-vong p'ô." ⁸ Gyi-lah ngæn-tsing dæ-ky'i, m-neh k'enkyin bih-nying, tsih-yiu Yiæ-su Zi læ-tong.

過了六日,<u>耶穌</u>帶勒<u>彼得、雅各</u>、等<u>雅各</u>個兄弟約翰,領其拉走上一座高高山裏,到私下烏蕩。²來其拉面前變出各樣相貌。其個面孔像日頭介透光個,其個衣裳像亮光介白個。³其拉看見<u>摩西</u>等以利亞現出東,等<u>耶穌</u>來的講。⁴彼得就開口等<u>耶穌</u>話:「主,阿拉蕩頭來東倒好個。爾若肯說話,阿拉蕩頭好搭三頂帳篷。一頂撥爾,一頂撥

<u>摩西</u>,一頂撥<u>以利亞</u>。」⁵其正好來東講個時候,有一朵雪 刮亮個雲蓋住其拉。雲裏向有聲音出來,是介話:「箇是 我親愛個兒子,我頂得意個。爾拉用聽其。」⁶門徒一聽聞 就撲倒地垟,大樣怕起來了。⁷<u>耶穌</u>走來,按其拉一按,是 介話:「爬起來,好甮怕。」⁸其拉眼睛抬起,嘸得看見別人,只有耶穌自來東。

⁹ Tseo-lôh sæn z-'eo, Yiæ-su feng-fu gyi-lah, wô, "Keh k'en-kyin-go z-ken m-nao wô hyiang nying-kô dao, dzihteng-tao Nying-go Ng-ts dzong si-nying cong-nyiang wehcün-læ." 10 Meng-du ziu ts'ing-meng Gyi, z-ka wô, "Ka-ni, doh-shü-nying dza-we wô Yi-li-üô pih iao sin læ?" 11 Yiæsu we-teh gyi-lah, wô, "Yi-li-üô z-jün sin læ, yia iao wænwe væn-pah z-ken. ¹² Dæn-z Ngô wô hyiang ng-lah dao, Yi-li-üô z yi-kying læ-ko-de, nying-kô yia feh nying-teh gyi, 'eo zi-go sing-siang ka dæ gyi. Nying-go Ng-ts læ gyilah siu-li yia we z-ka ziu kw'u-næn." ¹³ Keh-tsao meng-du ming-bah, Yiæ-su teng gyi-lah kông-go z ts-tin 'Ang-si-li-go Iah-'en.

9 走落山時候,<u>耶穌</u>吩咐其拉,話:「箇看見個事幹嘸得好話向人家道,直等到人個兒子從死人中央活轉來。」¹⁰門徒就請問其,是介話:「介呢,讀書人咋會話<u>以利亞</u>必要先來?」¹¹ <u>耶穌</u>回答其拉,話:「<u>以利亞</u>自然先來,也要挽回凡百事幹。¹² 但是我話向爾拉道,<u>以利亞</u>是已經來過了,人家也弗認得其,候自個心想介待其。人個兒子來其拉手裏也會是介受苦難。」¹³ 箇遭門徒明白,<u>耶穌</u>等其拉講個是指點行洗禮個約翰。

¹⁴ Gyi-lah tseo tao cong-nying jü-long-kæn u-sen, yiu ih-go nying tseo-long Yiæ-su-go sing-pin, gyü-lôh Gyi min-zin, z-ka wô, ¹⁵ "Cü, æ-lin ngô ng-ts; ing-we gyi yiu tin-bing, do-nyiang ky'üoh-kw'u; gyi peh-djông tih-lôh ho-li, yia peh-djông tih-lôh shü-li. ¹⁶ Ngô yi-kying ta gyi tao Ng-go meng-du u-sen, gyi-lah feh neng-keo i gyi hao."
¹⁷ Yiæ-su we-teh wô, "E! feh siang-sing wang-pang-hyüing-liu-go shü-dæ! Ngô wa iao teng ng-lah dô-kô lætong tao kyi-z? wa iao jing-næ ng-lah tao kyi-z? Hao ta gyi

tao Ngô dông-deo læ." ¹⁸ Yiæ-su heng keh-go kyü; kyü ziu tseo-c'ih, siao-nying tông-z hao-de.

¹⁴ 其拉走到衆人聚攏問烏碎,有一個人走攏<u>耶穌</u>個身邊,跪落其面前,是介話: ¹⁵ 「主,哀憐我兒子。因爲其有癲病,大樣喫苦。其不常跌落火裏,也不常跌落水裏。 ¹⁶ 我已經帶其到爾個門徒烏碎,其拉弗能夠醫其好。」 ¹⁷ 耶 穌回答話: 「哎!弗相信橫綳勛流個世代!我還要等爾拉 大家來東到幾時?還要忍耐爾拉到幾時?好帶其到我蕩頭來。」 ¹⁸ 耶穌狠箇個鬼,鬼就走出,小人當時好了。

¹⁹ Keh-tsao meng-du s-'ô tseo tao Yiæ-su u-sen, wô, "Ah-lah dza-we feh neng-keo ken gyi c'ih ni?" ²⁰ Yia-su teng gyi-lah wô, "We-leh ng-lah feh siang-sing-go sing. Ngô tsing wô hyiang ng dao, Ng-lah ziah yiu siang-sing-go sing ziang ih-lih ka-ts'æ-ts, ziu hao eo keh-zo sæn dzong dông-deo tsæn tao keh-deo, gyi ziu we tsæn-ko-ky'i: ping-ts'ia m-neh ih-yiang z ng-lah tso-feh-tao-go. ²¹ Dæn-z keh-cong-ka *kyü*, ziah feh yüong tao-kao teng kying-zih, tsong feh we tseo-c'ih-læ."

¹⁹ 箇遭門徒私下走到<u>耶穌</u>烏碎,話:「阿拉咋會弗能夠趕其出呢?」²⁰ <u>耶穌</u>等其拉話:「為了爾拉弗相信個心。我眞話向爾道,爾拉若有相信個心像一粒芥菜子,就好謳箇座山從蕩頭趲到箇頭,其就會趲過去。並且嘸得一樣是爾拉做弗到個。²¹ 但是箇種介鬼,若弗用禱告等禁食,總弗會走出來。」

²² GYI-LAH læ Kyüô-li-li tseo-læ-tseo-ky'i z-'eo, Yiæ-su teng-meng-du wô, "Nying-go Ng-ts we song peh nying-go siu-li, ²³ peh gyi-lah long-sah, tao di-sæn nyih yi we weh-cün-læ." Gyi-lah ziu long-do iu-meng-de.

22 其拉來<u>加利利</u>走來走去時候,<u>耶穌</u>等門徒話:「人個兒子會送撥人個手裏,²³ 撥其拉弄煞,到第三日又會活轉來。」其拉就弄大憂悶了。

 24 Gyi-lah tseo tao Kyüô-pah-nong, ziu yiu siu $^{[1]}$ diting nying-ts go cü-kwu tao Pe-teh u-sen læ, wô, "Ng-lah-go Sin-sang di-ting nying-ts do-c'ih feh do-c'ih?" 25 Gyi wô, "Do-c'ih-go." Ih tseo-tsing oh-lô, Yiæ-su sin k'æ k'eo teng gyi wô, "Si-meng, ng-go i-s dza-go? Shü-kæn-zông-go

cong koh-wông hyiang jü-lah siu zin-liang teng se-din? wa-z hyiang zi-go ng-nô ni, wa-z hyiang bih-nying ni?" ²⁶ Pe-teh teng Gyi wô, "Z hyiang bih-nying." Yiæ-su wô, "Ka-ni, feh-z ng-nô-go meng-veng. ²⁷ Dæn-z sæn-leh ah-lah s-teh gyi-lah pæn-tih, ng hao tao hæ-li ky'i, 'ô-lôh ih-me tiao-ng-keo; tiao-zông-læ-go deo-ih-kwang ng hao do-læ, cü-pô weh-k'æ-ts, ziu we teh-djôh ^[2]ih-kw'e nying-ts: keh hao do-ky'i peh gyi-lah, sön Ngô teng ng-go di-ting nying-ts."

24 其拉走到<u>迦百農</u>,就有收地丁銀子^[1]個主顧到<u>彼得</u> 烏碎來,話:「爾拉個先生地丁銀子馱出弗馱出?」²⁵ 其話:「馱出個。」一走進屋落,<u>耶穌</u>先開口等其話:「西門,爾個意思咋個?世間上個衆國王向誰拉收錢糧等稅 鈿?還是向自個兒囡呢,還是向別人呢?」²⁶ <u>彼得</u>等其話:「是向別人。」<u>耶穌</u>話:「介呢,弗是兒囡個門份。²⁷ 但是省勒阿拉使得其拉班跌,爾好到海裏去,下落一枚釣魚鈎。釣上來個頭一梗爾好馱來,嘴巴挖開仔,就會得着一塊銀子^[2]。箇好馱去撥其拉,算我等爾個地丁銀子。」

- [1] Di-ting nying-ts, kôh-nying do-c'ih liang-din nying-ts. 地丁銀子,各人馱出兩鈿銀子。(原註)
- [2] Keh-kw'e nying-ts, yiu s-din djong. 該塊銀子有四鈿重。(原註)

Mt. XVIII.

KEH-GO z-'eo meng-du tseo-long Yiæ-su-go sing-pin, z-ka wô, "Læ t'in-koh-li z jü do?" ² Yiæ-su ziu eo ih-go siao-nying læ, peh gyi lih læ tông-cong-nyiang, z-ka wô, ³ "Ngô tsing wô hyiang ng-lah dao, Ng-lah ziah feh ling-sing-coh-cün tso ziang siao-nying ka, tön feh neng-keo tseo-tsing t'in-koh-li ky'i. ⁴ Keh-lah keng ti-sing-siao-i ziang keh-go siao-nying ka, læ t'in-koh-li z gyi ting do. ⁵ Ziah yiu nying we-leh Ngô-go ming-deo tsih-ziu keh-cü-ka ih-go siao-nying, ziu-z tsih-ziu Ngô. ⁶ Ziah yiu nying ta-li ih-go siang-sing Ngô go siao meng-du ky'i væn-ze, wa-z

yüong mo-zông-zeng kwô læ gyi deo-kying, dzing-lôh sing-sing hæ-li, ka-go ying-vah ky'ing-k'o.

箇個時候門徒走攏<u>耶穌</u>個身邊,是介話:「來天國裏是誰大?」²<u>耶穌</u>就謳一個小人來,撥其立來當中央,是介話:³「我眞話向爾拉道,爾拉若弗靈性折轉做像小人介,斷弗能夠走進天國裏去。⁴箇勒跟低心小意像箇個小人介,來天國裏是其頂大。⁵若有人為了我個名頭接受箇株介一個小人,就是接受我。⁶若有人帶累一個相信我個小門徒去犯罪,還是用磨上層掛來其頭頭,沉落深深海裏,介個刑罰輕可。

⁷ "We-leh ta-li nying væn-ze go z-ken, shü-kæn-zông yiu 'o-se! Keh-sing ta-li væn-ze go z-ken. pih iao læ-go; tsih-z long gyi c'ih-læ keh-go nying yiu 'o-se! ⁸ Ziah-z ng ih-tsah siu, ôh-tsia ih-tsah kyiah, ta-li ng væn-ze, hao tsæn-lôh tiu-diao-ts: ng neng-s kwa-kyiah teng dzæn-dzih tseo-tsing weh-ming ky'i, feh iao liang-tsah siu liang-tsah kyiah tiu-lôh üong-yün ho-li ky'i. ⁹ Ziah-z ng ih-tsah ngæn-tsing ta-li ng væn-ze, hao leo-c'ih tiu-diao-ts: ng

neng-s doh-ngæn tseo-tsing weh-ming, feh iao shôngngæn tiu-lôh di-nyüoh-go ho-li.

⁷「為了帶累人犯罪個事幹,世間上有禍祟!箇星帶累犯罪個事幹,必要來個。只是弄其出來箇個人有禍祟!⁸若是爾一隻手,或者一隻腳,帶累爾犯罪,好斬落丟掉仔。爾能使拐腳等殘疾走進活命去,弗要兩隻手兩隻腳丟落永遠火裏去。⁹若是爾一隻眼睛帶累爾犯罪,好數出丟掉仔。爾能使獨眼走進活命,弗要雙眼丟落地獄個火裏。

10 "Ng-lah yüong kwu-djôh, keh-sing siao meng-du ihgo m-nao k'en gyi feh-ky'i: Ngô wô hyiang ng-lah dao, gyilah-go t'in-s læ tin-zông dziang-t'ong k'en-kyin Ngô t'inzông Ah-tia-go min-k'ong. ¹¹ Ing-we Nying-go Ng-ts z dehwe læ kyiu keh-sing shih-diao-kæn-go. ¹² Ng-lah-go i-s dza-go? ih-go nying yiu ih-pah-tsah yiang, nen-cong ziah yiu ih-tsah mi-lu, gyi næn-dao feh tiu-ky'i keh kyiu-jih kyiu tsah, tao sæn-li ky'i zing keh-tsah mi-lu-go ma? ¹³ Ziah-z zing-djôh-de, Ngô tsing wô hyiang ng-lah dao, gyi ziu we-leh keh ih-tsah, pi kyiu-jih kyiu tsah m-neh mi-lu-

go yü-kô hwun-hyi. 14 Ng-lah T'in-Vu-go ts-i yia z-ka; keh-sing siao meng-du ih-go tu feh iao peh gyi shih-diao.

10 「爾拉用顧着,箇星小門徒一個嘸得好看其弗起。 我話向爾拉道,其拉個天使來殿上長通看見我天上阿爹個 面孔。¹¹ 因為人個兒子是特為來救箇星失掉間個。¹² 爾拉 個意思咋個?一個人有一百隻羊,內中若有一隻迷路,其 難道弗丟棄箇九十九隻,到山裏去尋箇隻迷路個嗎?¹³ 若 是尋着了,我眞話向爾拉道,其就為了箇一隻,比九十九 隻嘸得迷路個愈加歡喜。¹⁴ 爾拉天父個旨意也是介。箇星 小門徒一個都弗要撥其失掉。

¹⁵ "Ng-go hyüong-di ziah yiu teh-ze ng, hao ky'i, tæntsih ng-zi teng gyi dô-kô læ-tong z-'eo p'i-bing gyi: ziah-z t'ing ng, keh z ng-go hyüong-di peh ng teh-djôh-de. ¹⁶ Ziah-z feh t'ing, lin zi tsæ kô ih-liang-go nying; s-teh yiu liang-sæn-go nying tso te-tsing, kyü-tang-kyü shih-wô hao k'ao-jih-de. ¹⁷ Ziah-z feh t'ing gyi-lah, hao kao-su kongwe: ziah-z feh t'ing kong-we, ng hao tông gyi ziang bih-koh-nying teng siu-zin-liang nying ka k'en-dæ. ¹⁸ Ngô

tsing wô hyiang ng-lah dao, Væn-pah læ di-'ô z ng-lah sô bo-djü-go, læ t'in-zông yia we bo-djü gyi; væn-pah læ di-'ô z ng-lah sô sih-fông-go, læ t'in-zông yia we sih-fông gyi. ¹⁹ Ngô tsæ wô hyiang ng dao, Ng-lah cong-nyiang ziah yiu liang-go nying læ di-'ô 'eh-k'eo-zi-dong iao gyiu ze-bin soh-go z-ken, Ngô t'in-zông-go Ah-tia pih-ding teng gyilah tso-dzing. ²⁰ Ing-we feh-leng soh-go u-sen, ziah yiu liang-sæn-go nying we-leh Ngô-go ming-deo jü-long-kæn, Ngô læ keh-deo dô-kô læ-kæn."

15 「爾個兄弟若有得罪爾,好去,單只爾自等其大家來東時候批評其。若是聽爾,箇是爾個兄弟撥爾得着了。¹⁶ 若是弗聽,連自再加一兩個人,使得有兩三個人做對證,句打句說話好靠實了。¹⁷ 若是弗聽其拉,好告訴公會。若是弗聽公會,爾好當其像別國人等收錢糧人介看待。¹⁸ 我真話向爾拉道,凡百來地下是爾拉所縛住個,來天上也會縛住其;凡百來地下是爾拉所釋放個,來天上也會釋放其。¹⁹ 我再話向爾道,爾拉中央若有兩個人來地下合口齊動要求隨便啥個事幹,我天上個阿爹必定等其拉做成。²⁰

因為弗論啥個烏碎,若有兩三個人為了我個名頭聚攏間, 我來箇頭大家來間。」

²¹ Keh-tsao Pe-teh tseo-long Yiæ-su sing-pin, wô, "Cü, hyüong-di teh-ze ngô, yiu to-siao we-su hao nyün-liang gyi? tao ts'ih-tsao feh?" ²² Yiæ-su teng gyi wô, "Ngô feh teng ng wô, Ts'ih-tsao; z wô, Ts'ih-jih-go ts'ih-tsao. ²³ Sôyi t'in-koh k'o-pi ih-go wông-ti, iao teng gyi nu-boh sön tsiang. ²⁴ Gyi kông-kông sön ky'i-deo, yiu ih-go nying talæ, z ky'in wông-ti ts'in-væn-liang nying-ts go. ²⁵ Gyi mkao hao wæn; cü ziu feng-fu tsiang gyi nying, lin lao-bo ng-nô teng væn-pah sô yiu-go, tu hao ma-diao, wæn tsa. ²⁶ Keh-go nu-boh ziu p'oh-tao pa gyi, wô, 'Cü, kw'un-'æn ngô, ngô we long-tsong wæn ng gyi.' ²⁷ Keh nu-boh-go cü fah dz-pe-sing fông gyi c'ih, wa-yiu sô-diao gyi tsa. ²⁸ Kehgo nu-boh ih tseo-c'ih, p'ong-djôh ih-go dong-de nu-boh, z ky'in gyi jih-liang nying-ts go; ziu cô gyi, k'ah gyi wulong, z-ka wô, 'Ng ky'in ngô go, hao wæn ngô.' ²⁹ Gyi-go dong-de nu-boh ziu p'oh-tao gyi kyiah-'ô, gyiu gyi, z-ka

wô, 'Kw'un-'æn ngô, ngô we long-tsong wæn ng gyi.' 30 Gyi feh k'eng; ziu ky'i ky'ih gyi lôh lao-kæn, teng-tao tsa wæn-wun. 31 Yü-to dong-de nu-boh k'en-kyin keh-ky'i zken long-do iu-meng; ziu pô keh-go en-gyin long-tsong læ kao-su gyi-lah-go cü. ³² Keh-tsao keh nu-boh-go cü eo gyi læ, teng gyi wô, 'Ôh nu-boh! Ng keh-go tsa, kyi-jün gyiu ngô, ngô long-tsong sô-diao ng de: ³³ ng soh feh ing-kæ ælin ng-go dong-de nu-boh, ziang ngô æ-lin ng ka-go?' 34 Gyi-go cü ziu fah-gyih, pô gyi nying kao-dæ zao-li ky'i bæn gyi, teng-tao kyʻin gyi go tsa long-tsong wæn-wun. ³⁵ Ziahz ng-lah kôh-nying feh dzing-nyün sô-diao hyüong-di-go ko-tön, Ngô t'in-zông-go Ah-tia yia we z-ka dæ ng-lah."

²¹ 箇遭<u>彼得</u>走攏<u>耶穌</u>身邊,話:「主,兄弟得罪我,有多少回數好原諒其?到七遭弗?」²² <u>耶穌</u>等其話:「我 弗等爾話,七遭。是話,七十個七遭。²³ 所以天國可比一個皇帝,要等其奴僕算賬。²⁴ 其剛剛算起頭,有一個人帶來,是欠皇帝千萬兩銀子個。²⁵ 其嘸告好還,主就吩咐將其人,連老婆兒囡等凡百所有個,都好賣掉,還債。²⁶ 箇

個奴僕就撲倒拜其,話:『主,寬限我,我會攏總還爾 其。』²⁷ 箇奴僕個主發慈悲心放其出,還有赦掉其債。²⁸ 箇個奴僕一走出,碰着一個同隊奴僕,是欠其十兩銀子 個。就揸其,掐其胡嚨,是介話:『爾欠我個,好還 我。』29 其個同隊奴僕就撲倒其腳下,求其,是介話: 『寬限我,我會攏總還爾其。』30 其弗肯,就去挈其落牢 監, 等到債還完。³¹ 餘多同隊奴僕看見箇起事幹弄大憂 問,就把箇個案件攏總來告訴其拉個主。³² 箇遭箇奴僕個 主謳其來,等其話:『惡奴僕!爾箇個債,既然求我,我 攏總赦掉爾了。³³ 爾啥弗應該哀憐爾個同隊奴僕, 像我哀 憐爾介個?』³⁴ 其個主就發極, 把其人交代皂吏去辦其, 等到欠其個債攏總還完。³⁵ 若是爾拉各人弗情願赦掉兄弟 個果斷,我天上個阿爹也會是介待爾拉。」

Mt. XIX.

^[1]YIÆ-SU kông-hao keh-sing shih-wô, ziu li-k'æ Kyüô-li-li, tang Iah-dæn 'o-nga ka tseo tao Yiu-t'a-go di-ka læ. ² Yiu ih-do-dziao nying keng-djôh Gyi; Gyi ziu læ kehdeo i gyi-lah bing.

<u>耶穌</u>講好箇星說話^[1],就離開<u>加利利</u>,打<u>約但</u>河外介 走到<u>猶太</u>個地界來。² 有一大潮人跟着其,其就來箇頭醫其 拉病。

[1] Y 'E. 33. 耶 (穌)後(頭)33 (年)。(原註)

³ Yiu Fah-li-sæ nying tseo-long Gyi sing-pin, s-s Gyi, z-ka wô, "Ih-go nying we-leh ze-bin soh-go yün-kwu lidiao lao-nyüing, tsôh-hying feh tsôh-hying?" ⁴ Gyi we-teh gyi-lah, wô, "Ky'i-ts'u zao nying go Cü-kwu z 'zao gyi-lah ih-nen ih-nyü;' [Ts. 1. 27.] yi wô, ⁵ 'Sô-yi ih-go nying hao lik'æ gyi tia-nyiang, ts'ing-gying gyi lao-nyüing; keh lianggo dzing we ih-t'i:' [Ts. 2. 24.] keh-go shih-wô ng-lah soh mneh doh-ko ma? ⁶ Z-ka-go, gyi-lah feh tsæ sön liang-go, tsih sön ih-t'i. Keh-lah Jing-ming sô p'e-long-go, nying mneh hao feng gyi k'æ." ⁷ Gyi-lah teng Gyi wô, "Ka-ni, Mo-si dza-we feng-fu sia li-shü hao li-diao lao-nyüing?" ⁸ Yiæ-su teng gyi-lah wô, "Mo-si ing-hyü ng-lah li-diao lao-nyüing,

z we-leh ng-lah sing-dziang ngang go yün-kwu: dæn-z ky'i-ts'u feh-z ka-go. ⁹ Ngô yia wô hyiang ng-lah dao, Ziah yiu nying, feh-z we-leh tso wॅa-nying go yün-kwu li-diao *lao-nyüing*, ky'i c'ü bih-go *lao-nyüing*, keh z tso kæn-ying z-ken: c'ü li-diao-go *lao-nyüing* cü-kwu yia z tso kæn-ying."

3有法利賽人走攏其身邊,試試其,是介話:「一個人 為了隨便啥個緣故離掉老檂,作興弗作興?」4其回答其 拉,話:「起初造人個主顧是『造其拉一男一女。』[Ts. 1. 27.1 又話: 5 『所以一個人好離開其爹孃, 親近其老嬝; 箇 兩個成為一體。』[Ts. 2. 24.] 箇個說話爾拉啥嘸得讀過嗎? 6是介個,其拉弗再算兩個,只算一體。箇勒神明所配攏 個,人嘸得好分其開。」⁷其拉等其話:「介呢,摩西咋會 吩咐寫離書好離掉老檂?」8耶穌等其拉話:「摩西應許爾 拉離掉老嶩,是爲了爾拉心腸硬個緣故。但是起初弗是介 個。9我也話向爾拉道,若有人,弗是爲了做壞人個緣故離 掉老檂,去娶別個老檂,箇是做姦淫事幹。娶離掉個老檂 主顧也是做姦淫。」

¹⁰ Meng-du teng Gyi wô, "Nen-nyüing teng lao-nyüing z-ken ziah-z ka-go, wa-z feh c'ü hao." ¹¹ Yiæ-su teng gyilah wô, "Keh-go z-ken feh-z long-tsong nying neng-keo tso; z tæn-tsih *Jing-ming* peh gyi tso go cü-kwu *hao tso*. ¹² Ing-we yiu-sing dzong c'ih nyiang-t'æ ziu tso t'a-kæn go: yiu-sing z nying-kô peh gyi tso t'a-kæn go: yiu-sing z weleh t'in-koh zi tso t'a-kæn go. Neng-keo tso go cü-kwu hao tso."

¹⁰ 門徒等其話:「男嬝等老嬝事幹若是介個,還是弗娶好。」¹¹ <u>耶穌</u>等其拉話:「箇個事幹弗是攏總人能夠做,是單只神明撥其做個主顧好做。¹² 因為有星從出孃胎就做太監個,有星是人家撥其做太監個,有星是為了天國自做太監個。能夠做個主顧好做。」

¹³ KEH-GO z-'eo yiu siao-nying ling tao Yiæ-su u-sen læ, iao Gyi siu en-en gyi-lah, tao-kao-kyi: meng-du heng gyi-lah. ¹⁴ Yiæ-su wô, "Hao peh keh-sing siao-nying tao Ngô u-sen læ, m-nao tsu-djü gyi-lah; ing-we keh-cong-ka

nying, t'in-koh z gyi-lah-go." ¹⁵ Gyi ziu siu en-en gyi-lah, li-k'æ keh-deo ky'i-de.

¹³ 箇個時候有小人領到<u>耶穌</u>烏碎來,要其手按按其 拉,禱告記。門徒狠其拉。¹⁴ <u>耶穌</u>話:「好撥箇星小人到 我烏碎來,嘸得好阻住其拉,因爲箇種介人,天國是其拉 個。」¹⁵ 其就手按按其拉,離開箇頭去了。

¹⁶ YIU ih-go nying tseo-long-læ, teng Gyi wô, "Hao Sin-sang, ngô kæ tso soh-go hao z-ken, hao teh-djôh üongyün weh-ming?" ¹⁷ Yiæ-su teng gyi wô, "Dza-we ts'inghwu Ngô z hao ni? hao-go cü-kwu z m-neh-go; tsih-yiu Ihwe, ziu-z Jing-ming. Ng ziah iao tseo-tsing weh-ming ky'i, yüong pao-siu keh-sing lih-fah." 18 Gyi wô, "Ah-li kyidiao?" Yiæ-su wô, "Ziu-z, 'Ng feh-k'o sah nying,' 'Feh-k'o kæn-ying,' 'Feh-k'o t'eo-dao,' 'Feh-k'o hwông-kao nying $k\hat{o}$, '19 'Yüong kying-djong ng-go vu-meo;' [C. 2. 12—16.] wa-yiu, 'Æ-sih-ng-go ling-sô-kô ziang zi ih-yiang-go.' [Lv. 19. 18.]" ²⁰ Keh 'eo-sang teng Gyi wô, "Keh-sing ngô longtsong dzong siao kwu-djôh-go: wa-yiu soh-go feh tao-kô?" ²¹ Yiæ-su teng gyi wô, "Ng ziah iao djün-be, hao ky'i madiao ng-go kô-kyi, feng peh gyüong-nying; ka-ni, ng yiu dzæ-veh læ t'in-zông: ping-ts'ia hao læ keng Ngô." ²² Keh 'eo-sang ih t'ing-meng keh-go shih-wô, ziu iu-meng-siang ky'i-de: ing-we yiu do-do kô-kyi.

16 有一個人走攏來,等其話:「好先生,我該做啥個 好事幹,好得着永遠活命?」17耶穌等其話:「咋會稱呼 我是好呢?好個主顧是嘸得個。只有一位,就是神明。爾 若要走進活命去,用保守箇星律法。」¹⁸ 其話:「何裏幾 條?」耶穌話:「就是,『爾弗可殺人』,『弗可姦 淫』, 『弗可偷盜』, 『弗可謊告人家』, ¹⁹ 『用敬重爾 個父母』[C. 2. 12-16.];還有,『愛惜爾個鄰舍家像自一 樣個。』[Lv. 19. 18.]」²⁰ 箇後生等其話: 「箇星我攏總從 小顧着個,還有啥個弗到家?」²¹ 耶穌等其話:「爾若要 全備,好去賣掉爾個家計,分撥窮人。介呢,爾有財物來 天上,並且好來跟我。」22 箇後生一聽聞箇個說話,就憂 悶相去了, 因為有大大家計。

²³ Yiæ-su teng meng-du wô, "Ngô tsing wô hyiang ng-lah dao, Yiu-lao tseo-tsing t'in-koh-li, næn-leh-kying! ²⁴ Ngô tsæ wô hyiang ng-lah dao, Loh-do c'ün-ko tsingngæn, pi yiu-lao tseo-tsing Jing-ming-go koh, wa-z gyi yüong-yi." ²⁵ Meng-du t'ing-meng, ziu long-do ky'ih-hoh, wô, "Ka-ni, jü neng-keo teh-djôh kyiu?" ²⁶ Yiæ-su k'en-k'en gyi-lah, z-ka wô, "Ziah-z nying, z feh neng-keo-go: ziah-z Jing-ming, yiang-yiang tu neng-keo-go."

²³ <u>耶穌</u>等門徒話:「我眞話向爾拉道,有佬走進天國裏,難勒緊!²⁴ 我再話向爾拉道,駱駝穿過針眼,比有佬走進神明個國,還是其容易。」²⁵ 門徒聽聞,就弄大喫惟,話:「介呢,誰能夠得着救?」²⁶ <u>耶穌</u>看看其拉,是介話:「若是人,是弗能夠個,若是神明,樣樣都能夠個。」

 27 Keh-tsao Pe-teh k'æ k'eo teng Gyi wô, "Ah-lah z yiang-yiang ky'i-diao-ts keng-leh Ng: ka-ni, ah-lah hao teh-djôh soh-si?" 28 Yiæ-su teng gyi-lah wô, "Ngô tsing wô hyiang ng-lah dao, Tao-leh keh djong-sin hying-ky'i-læ z-

'eo, Nying-go Ng-ts zo-leh Gyi yüong-wô-go zo-we, ng-lah keng-djôh Ngô cü-kwu yia we zo jih-nyi-go zo-we, p'untön Yi-seh-lih jih-nyi-go ts-p'a. ²⁹ Wa-yiu væn-pah we-leh Ngô-go ming-deo ky'i-diao oh-yü, hyüong-di, tsi-me, tianyiang, lao-bo, ng-nô, din-di *keh-sing*, tsiang-læ hao tehdjôh ih-pah be, wa-yiu üong-yün weh-ming peh gyi tso ts'æn-nyih. ³⁰ Dæn-z hyü-to dzæ-zin-go we lôh-'eo; hyü-to dzæ-'eo-go we zông-zin."

27 箇遭<u>彼得</u>開口等其話:「阿拉是樣樣棄掉仔跟勒爾。介呢,阿拉好得着啥西?」²⁸ <u>耶穌</u>等其拉話:「我真話向爾拉道,到了箇重先興起來時候,人個兒子坐勒其榮華個座位,爾拉跟着我主顧也會坐十二個座位,判斷<u>以色</u>列十二個支派。²⁹ 還有凡百為了我個名頭棄掉屋宇,兄弟,姊妹,爹孃,老婆,兒囡,田地箇星,將來好得着一百倍,還有永遠活命撥其做產業。³⁰ 但是許多在前個會落後,許多在後個會上前。」

Mt. XX.

"Ing-we t'in-koh k'o-pi-ziang ih-go kô-cü, tsao t'innyiang tseo-c'ih-ky'i kwu kong-nying tao gyi bu-dao-yünli ky'i. ² Teng kong-nying kông-k'æ ih-din nying-ts ihnyih, ziu eo gyi-lah tao gyi bu-dao-yün-li ky'i. ³ Mao kyiu tin-cong tseo-c'ih-ky'i, k'en-kyin bih-nying læ z-min-zông k'ong-deo lih-kæn, ziu teng gyi-lah wô, 4 'Ng-lah yia hao tao bu-dao-yün-li ky'i; ngô we peh ng-lah bing-dzih-go kong-din.' Gyi-lah ziu ky'i-de. ⁵ Mao jih-nyi tin-cong teng 'ô-pun-nyih sæn tin-cong yi tseo-c'ih-ky'i; yia z-ka tsofah. Mao ng tin-cong tseo-c'ih-ky'i, yi k'en-kyin yiu nying k'ong-deo lih-kæn, ziu teng gyi-lah wô, 'Ng-lah dza-we zing-nyih k'ong-deo lih-tong ni?' ⁷ Gyi-lah wô, 'Ing-we mnying kwu ah-lah.' Gyi wô, 'Ng-lah yia hao tao bu-dao-yünli ky'i; z bing-dzih-go kong-din, hao do-go.' 8 Tao yia-kw'a, yün-cü teng pô-tsiang sin-sang wô, 'Eo keh-sing kongnying læ; dzong kyih-sah-go ky'i-deo, ih-dzih tao deo-ihvah zông-kong-go we-ts, fah kong-din peh gyi-lah.' 9 Mao ng tin-cong zông-kong-go cü-kwu tseo-læ, kôh-nying tu do ih-din nying-ts. 10 Deo-ih-vah zông-kong-go cü-kwu læ, dao-z gyi-zi hao do-leh to: gyi-lah kôh-nying yia do-leh ihdin nying-ts. ¹¹ Gyi-lah do-ts ziu mao-ün kô-cü, z-ka wô, ¹² 'Keh-sing kyih-sah zông-kong-go tsih tso ih tin-cong kongfu, ah-lah zing-nyih ho-nyih-t'ih-t'ah lao-loh; ng tao we dæ gyi-lah teng ah-lah ih-yiang ma!' 13 Kô-cü we-teh gyilah ih-go nying, wô, 'Beng-yiu, ngô m-kao we-ky'üoh ng: ng teng ngô kông-k'æ soh feh-z ih-din nying-ts ma? 14 Ngzi-go kong-din do-leh tseo: ngô cü-sing iao peh keh kyihsah-go teng ng ih-yiang-go. ¹⁵ Ngô yüong zi-go tong-si, næn-dao feh hao zi tso cü-i ma? We-leh ngô hao, ng sang tu-gyi-sing ma? 16 Z-ka ni, dzæ-'eo-go we zông-zin; dzæzin-go we lôh-'eo: ing-we dziao-læ-go to, t'iao-shün-go ky'üih."

「因為天國可比像一個家主,早天亮走出去僱工人到 其葡萄園裏去。²等工人講開一鈿銀子一日,就謳其拉到其

葡萄園裏去。3毛九點鐘走出去,看見別人來市面上空頭立 間,就等其拉話: ⁴ 『爾拉也好到葡萄園裏去,我會撥爾拉 平直個工鈿。』其拉就去了。5毛十二點鐘等下半日三點鐘 又走出去, 也是介做法。毛五點鐘走出去, 又看見有人空 頭立間,就等其拉話:『爾拉咋會淨日空頭立東呢?』7其 拉話: 『因為嘸人僱阿拉。』其話: 『爾拉也好到葡萄園 裏去,是平直個工鈿,好馱個。』8到夜快,園主等把賬先 生話:『謳箇星工人來,從結煞個起頭,一直到頭一伐上 工個爲止,發工鈿撥其拉。』9毛五點鐘上工個主顧走來, 各人都馱一鈿銀子。10頭一伐上工個主顧來, 道是其自好 馱勒多。其拉各人也馱勒一鈿銀子。¹¹ 其拉馱仔就娼怨家 主,是介話: 12 『箇星結煞上工個只做一點鐘工夫,阿拉 淨日火熱鐵場勞碌,爾倒會待其拉等阿拉一樣嗎!』¹³家 主回答其拉一個人,話:『朋友,我嘸告委曲爾。爾等我 講開啥弗是一鈿銀子嗎? 14 爾自個工鈿馱勒走,我注心要 撥箇結煞個等爾一樣個。¹⁵ 我用自個東西, 難道弗好自做 主意嗎?為了我好,爾生妒忌心嗎?16是介呢,在後個會 上前,在前個會落後。因爲召來個多,挑選個缺。」

¹⁷ YIÆ-SU zông Yiæ-lu-sah-leng z-'eo, lu-zông ta-leh jih-nyi-go meng-du, s-'ô teng gyi-lah wô, ¹⁸ "Ah-lah kehtsao zông Yiæ-lu-sah-leng ky'i; Nying-go Ng-ts iao song peh keh-sing tsi-s-deo teng doh-shü-nying; gyi-lah we ding Gyi si-ze, ¹⁹ yi ka-ky'i peh bih-koh-nying ky'i tsao-t'ah Gyi, pin-ts tang Gyi, jih-z-kô-zông ting-sah Gyi; tao di-sæn nyih yi we weh-cün-læ."

17 <u>耶穌上耶路撒冷</u>時候,路上帶勒十二個門徒,私下等其拉話: ¹⁸ 「阿拉箇遭上<u>耶路撒冷</u>去,人個兒子要送撥箇星祭司頭等讀書人,其拉會定其死罪,¹⁹ 又解去撥別國人去遭蹋其,鞭子打其,十字架上釘煞其。到第三日又會活轉來。」

²⁰ Keh-go z-'eo Si-pi-t'a ng-ts-go ah-nyiang ta-ling gyi *liang-go* ng-ts, tseo tao Yiæ-su sing-pin pa Gyi, gyiu Gyi ih-yiang z-ken. ²¹ Yiæ-su teng gyi wô, "Ng iao soh-si?" Gyi wô, "Iao Ng feng-fu peh ngô keh liang ng-ts zo læ Ng-go koh li-hyiang, ih-go læ Ng jing-siu-pin, ih-go læ Ng tsia-siu-pin." ²² Yiæ-su we-teh wô, "Ng-lah sô gyiu-go z ng-lah

feh hyiao-teh-go. Ngô tsiang-læ ky'üoh-go? pe-ts, ng-lah neng-keo ky'üoh feh? Ngô sô ziu-go si-li, ng-lah neng-keo ziu feh?" Gyi-lah wô, "Neng-keo-go." ²³ Yiæ-su teng gyi-lah wô, "Ngô keh-go pe-ts z ng-lah pih-ding ky'üoh-go; Ngô sô ziu-go si-li z ng-lah pih-ding ziu-go: dæn-z zo læ Ngô jing-siu-pin tsia-siu-pin, z tæn-tsih Ngô Ah-tia we-leh gyi-lah yü-be-hao-kæn-go keh-sing nying, Ngô hao peh gyi-lah go."

20 箇個時候西庇太兒子個阿孃帶領其兩個兒子,走到 耶穌身邊拜其,求其一樣事幹。²¹ 耶穌等其話:「爾要啥 西?」其話:「要爾吩咐撥我箇兩兒子坐來爾個國裏向, 一個來爾順手邊,一個來爾借手邊。」²² 耶穌回答話: 「爾拉所求個是爾拉弗曉得個。我將來喫個杯子,爾拉能 夠喫弗?我所受個洗禮,爾拉能夠受弗?」其拉話:「能 夠個。」²³ 耶穌等其拉話:「我箇個杯子是爾拉必定喫 個,我所受個洗禮是爾拉必定受個。但是坐來我順手邊借 手邊,是單只我阿爹為了其拉預備好問個箇星人,我好撥 其拉個。」 ²⁴ Keh jih-go meng-du ih t'ing-meng, we-leh keh liang hyüong-di ziu ông-de. ²⁵ Yiæ-su eo gyi-lah læ, wô, "Keh-sing bih-koh-nying-go wông-ti ah-jih pah-sing, gyi-lah do-go cü-kwu tsih-công gyün-ping kwun-djü gyi-lah; keh z ng-lah hyiao-teh-go. ²⁶ Dæn-z ng-lah m-nao z-ka-go: ziah yiu nying siang tso ng-lah do-go, gyi kæ tso ng-lah yüong-nying; ²⁷ ziah yiu nying siang tso ng-lah deo-go, gyi kæ tso ng-lah nu-boh: ²⁸ tsing-ziang Nying-go Ng-ts læ, feh-z iao nying-kô voh-z Gyi, z læ voh-z nying-kô, wa-yiu sô-c'ih Zi-go sing-ming tso hyü-to nying-go t'i-dæ."

²⁴ 箇十個門徒一聽聞,為了箇兩兄弟就快了。²⁵ <u>耶穌</u> 謳其拉來,話:「箇星別國人個皇帝壓實百姓,其拉大個 主顧執掌權柄管住其拉,箇是爾拉曉得個。²⁶ 但是爾拉嘸 得好是介個。若有人想做爾拉大個,其該做爾拉傭人;²⁷ 若有人想做爾拉頭個,其該做爾拉奴僕。²⁸ 正像人個兒子 來,弗是要人家服侍其,是來服侍人家,還有捨出自個性 命做許多人個替代。」

²⁹ GYI-LAH tseo-c'ih Yiæ-li-ko z-'eo, yiu ih-do-dziao nying keng-djôh Gyi. K'eo-k'eo yiu liang-go hah-ts lu pinyin zo-kæn, t'ing-meng z Yiæ-su tseo-ko, ziu hyianghyiang eo-ky'i-læ, wô, "Cü, Da-bih-go 'Eo-dæ, k'o-lin ahlah." ³¹ Keh-dziao nying heng gyi-lah, eo gyi m-nao hyiang: gyi-lah fæn-cün yü-kô eo-leh hyiang, wô, "Cü, Dabih-go 'Eo-dæ, k'o-lin ah-lah." ³² Yiæ-su lih-lôh, eo gyi-lah læ, z-ka wô, "Iao Ngô teng ng-lah tso soh-si?" ³³ Gyi-lah wô, "Cü, iao k'æ ah-lah ngæn-tsing." 34 Yiæ-su fah dz-pesing, siu en-en gyi-lah ngæn-tsing: ngæn-tsing lih-k'eh k'en-kyin-de, gyi-lah ziu keng-leh Gyi ky'i-de.

29 其拉走出<u>耶利哥</u>時候,有一大潮人跟着其。扣扣有兩個瞎子路邊沿坐間,聽聞是<u>耶穌</u>走過,就響響謳起來,話:「主,大闢個後代,可憐阿拉。」³¹ 箇潮人狠其拉,謳其嘸得好響,其拉反轉愈加謳勒響,話:「主,大闢個後代,可憐阿拉。」³² <u>耶穌</u>立落,謳其拉來,是介話:「要我等爾拉做啥西?」³³ 其拉話:「主,要開阿拉眼

睛。」³⁴ <u>耶穌</u>發慈悲心,手按按其拉眼睛。眼睛立刻看見了,其拉就跟勒其去了。

Mt. XXI.

GYI-LAH gying-long Yiæ-lu-sah-leng, yi-kying tao Pah-fah-kyi læ Ken-læn sæn pin-yin, keh-tsao Yiæ-su ts'a liang-go meng-du, teng gyi-lah wô, ² "Ng-lah hao tao tedeo-go hyiang-ts'eng ky'i, ziu we p'ong-djôh ih-p'ih ts'-li công-kæn, wa-yiu ih-p'ih siao-li dô-kô læ-kæn: hao ka-ts, teng Ngô ky'in-læ. ³ Ziah yiu nying teng ng-lah kông shihwô, hao wô, 'Z Cü iao yüong-djôh gyi-lah;' gyi ziu we peh gyi-lah læ." ⁴ Keh ih-ts'ih-go z-ken tu z-ka tso-fah, hao steh sin-cü-nying kông-ko-liao-go shih-wô yiu yiao-nyiæn, z-ka wô, ⁵ "Hao ky'i wô hyiang Shing-go nön dao, 'Ng-go Wông-ti ti-sing-siao-i, gyi-leh ih-p'ih li-ts teng ih-p'ih siaoli, tao ng u-sen læ-de." [Sk. 9. 9.]

其拉近攏<u>耶路撒冷</u>,已經到<u>伯法基</u>來橄欖山邊沿,箇 遭<u>耶穌</u>差兩個門徒,等其拉話:²「爾拉好到對頭個鄉村 去,就會碰着一匹雌驢椿間,還有一匹小驢大家來間。好 解仔,等我牽來。³若有人等爾拉講說話,好話:『是主要 用着其拉。』其就會撥其拉來。」⁴箇一切個事幹都是介做 法,好使得先知人講過了個說話有效驗,是介話:⁵「好去 話向<u>郇</u>個囡道:『爾個皇帝低心小意,騎勒一匹驢子等一 匹小驢,到爾烏碎來了。』」[Sk. 9. 9.]

⁶ Meng-du ziu kyʻi, i Yiæ-su feng-fu ka tso; ⁷ kyʻin-leh tsʻ-li teng siao-li læ, pô zi-go i-zông fông læ gyi-lah zông-deo, *Yiæ-su* ziu gyi-zông-kyʻi. ⁸ Yiu ih-do-dziao nying do-leh gyi i-zông pʻu lu; wa-yiu-sing tsôh-leh jü ô-ts pʻu læ lu-li. ⁹ Zin-ʻeo keh liang-dziao nying hyiang-hyiang eo-kyʻi-læ, wô, "'O-sæn-nah kwe peh Da-bih-go 'Eo-dæ! Kʻao-djôh Cü ming-deo læ-go Cü-kwu z ing-kæ coh-tsæn-go. Læ ting kao *u-dông* 'O-sæn-nah!"

⁶ 門徒就去,依<u>耶穌</u>吩咐介做,⁷ 牽勒雌驢等小驢來, 把自個衣裳放來其拉上頭,<u>耶穌</u>就騎上去。⁸ 有一大潮人馱 勒其衣裳鋪路。還有星斫勒樹椏枝鋪來路裏。⁹ 前後箇兩潮 人響響謳起來,話:「<u>和散那</u>歸撥<u>大闢</u>個後代!靠着主名 頭來個主顧是應該祝讚個。來頂高烏蕩和散那!」

- ¹⁰ Yiæ-su ih tseo-tsing Yiæ-lu-sah-leng, 'eh-zing-li *nying-sing* tu yiao-dong, z-ka wô, "Keh z soh-go nying?" ¹¹ Keh-dziao nying wô, "Keh ziu-z Kyüô-li-li Nô-sah-leh-go Sin-cü Yiæ-su."
- 10 <u>耶穌</u>一走進<u>耶路撒冷</u>, 合城裏人聲都搖動, 是介話: 「箇是啥個人?」¹¹ 箇潮人話: 「箇就是<u>加利利拿撒</u>勒個先知耶穌。」
- ¹² Yiæ-su tseo-tsing Jing-ming-go sing-din-li, ken-c'ih sing-din-li long-tsong tso ma-ma go cü-kwu, wa-yiu t'e-tao de dong-din cü-kwü-go gyü-deo, teng ma beh-keh cü-kwu-go ü-ts; ¹³ teng gyi-lah wô, "*Shü-li* yiu sia-tih, wô, 'Ngô-go oh-lô iao ts'ing-hwu z tao-kao-go oh-lô:' [Y. 56. 7.] ng-lah tao peh gyi tso zeh-k'o de." ¹⁴ Læ sing-din-li yiu hah-ts teng kwa-kyiah tseo-long Yiæ-su-go sing-pin; Gyi ziu i gyi-lah hao. ¹⁵ Keh-sing tsi-s-deo teng doh-shü-nying, k'en-

kyin Gyi tso-c'ih-læ-go hyi-gyi z-ken, wa-yiu keh-sing siaonying læ sing-din-li wæ-wæ-hyiang læ-kæn wô, "'O-sænnah kwe peh Da-bih-go 'Eo-dæ;" gyi-lah ziu ông-de, teng Yiæ-su wô, ¹⁶ "Gyi-lah læ-tih wô-go Ng t'ing-meng feh?" Yiæ-su wô, "T'ing-meng-go: *Shü-li sô wô*, 'Dzong siaonying teng na-hwun-go k'eo-li Ng hyin-c'ih tsæn-me læ," [S. 8. 2.] *keh-kyü shih-wô* ng-lah soh m-neh doh-ko ma?" ¹⁷ Ziu li-k'æ gyi-lah, tseo-c'ih zing-nga tao Pah-da-nyi; kehdeo soh-ko yia.

12 耶穌走進神明個聖殿裏,趕出聖殿裏攏總做買賣個主顧,還有推倒兌銅鈿主顧個櫃頭,等賣鵓鴿主顧個椅子,13 等其拉話:「書裏有寫的,話:『我個屋落要稱呼是禱告個屋落。』[Y. 56. 7.] 爾拉倒撥其做賊窠了。」¹⁴來聖殿裏有瞎子等拐腳走攏耶穌個身邊,其就醫其拉好。¹⁵ 箇星祭司頭等讀書人,看見其做出來個稀奇事幹,還有箇星小人來聖殿裏懷懷響來問話:「和散那歸撥大闢個後代。」其拉就快了,等耶穌話: ¹⁶ 「其拉來的話個爾聽聞弗?」耶穌話:「聽聞個。書裏所話:『從小人等奶花個

口裏爾顯出讚美來,』[S. 8. 2.] 箇句說話爾拉啥嘸得讀過嗎?」¹⁷ 就離開其拉,走出城外到伯大尼,箇頭宿過夜。

¹⁸ TSAO t'in-nyiang cün-læ tao zing-li ky'i z-'eo, du-kyi-de. ¹⁹ Lu pin-yin k'en-kyin ih-cü vu-hwô-ko jü, ziu tseo-long-ky'i, tsih k'en-kyin yih, m-teh bih-nyiang-kao læ-tih; ziu dziao-leh keh-cü jü wô, "Ng yi-'eo üong feh kyih ko-ts." Vu-hwô-ko jü lih-k'eh ziu kw'u-de.

18 早天亮轉來到城裏去時候,肚飢了。¹⁹ 路邊沿看見一株無花果樹,就走攏去,只看見葉,嘸得別樣告來的,就朝勒箇株樹話:「爾以後永弗結果子。」無花果樹立刻就枯了。

²⁰ Meng-du k'en-kyin, hyi-gyi, z-ka wô, "Vu-hwô-ko jü kw'u-leh dza kw'a!" ²¹ Yiæ-su we-teh gyi-lah, wô, "Ngô tsing wô hyiang ng-lah dao, Ng-lah ziah yiu siang-sing-go sing, ih-ngæn feh nyi-'ôh, fi-dæn we tso keh vu-hwô-ko jü-go z-ken, ziu-z dziao-leh keh-zo sæn wô, 'Hao yi-ko-ky'i deo-lôh hæ-li,' keh yia we tso-dzing. ²² Wa-yiu tao-kao z-

'eo ng-lah væn-pah sô gyiu-go, *tsih iao* siang-sing, ziu we teh-djôh."

²⁰ 門徒看見,稀奇,是介話:「無花果樹枯勒咋快!」²¹ <u>耶穌</u>回答其拉,話:「我眞話向爾拉道,爾拉若有相信個心,一眼弗疑惑,非但會做箇無花果樹個事幹,就是朝勒箇座山話:『好移過去投落海裏,』箇也會做成。²² 還有禱告時候爾拉凡百所求個,只要相信,就會得着。」

²³ YIÆ-SU tseo-tsing sing-din-li, k'eo-k'eo læ-kæn kông dao-li, keh-pæn tsi-s-deo teng pah-sing-go tsiang-lao tseo-long-læ, z-ka wô, "Ng yüong soh-go gyün-ping tso keh-sing z-ken? z jü peh Ng keh-go gyün-ping?" ²⁴ Yiæ-su we-teh gyi-lah, wô, "Ngô yia iao meng ng-lah ih-kyü; keh ih-kyü ziah wô hyiang Ngô dao, Ngô yüong soh-go gyün-ping tso keh-sing z-ken, yia we wô hyiang ng-lah dao. ²⁵ Iah-'en-go si-li 'ah-li læ? wa-z dzong t'in læ? wa-z dzong nying læ?" Gyi-lah s-'ô siang-liang, z-ka wô, "Ziah wô, Z dzong t'in læ-go, Gyi ziu we teng ah-lah wô, 'Ka-ni, ng-lah

dza-we feh siang-sing gyi?' ²⁶ Ziah wô, Z dzong nying *lægo*, ah-lah z p'ô pah-sing; ing-we gyi-lah tu sön Iah-'en zgo sin-cü-nying." ²⁷ Ziu we-teh Yiæ-su, wô, "Ah-lah feh hyiao-teh." Yiæ-su teng gyi-lah wô, "Ngô yüong soh-go gyün-ping tso keh-sing z-ken, yia feh wô hyiang ng-lah dao.

23 耶穌走進聖殿裏, 扣扣來間講道理, 箇班祭司頭等 百姓個長老走攏來,是介話:「爾用啥個權柄做箇星事 幹?是誰撥爾箇個權柄?」24耶穌回答其拉,話:「我也 要問爾拉一句, 箇一句若話向我道, 我用啥個權柄做箇星 事幹,也會話向爾拉道。²⁵約翰個洗禮何裏來?還是從天 來?還是從人來?」其拉私下商量,是介話:「若話,是 從天來個,其就會等阿拉話: 『介呢,爾拉咋會弗相信 其?』²⁶ 若話,是從人來個,阿拉是怕百姓,因爲其拉都 算約翰是個先知人。」27 就回答耶穌,話:「阿拉弗曉 得。」耶穌等其拉話:「我用啥個權柄做箇星事幹,也弗 話向爾拉道。

²⁸ "Ng-lah-go i-s dza-go? Yiu ih-go nying yiu liang-go ng-ts; tseo-læ, teng gyi do-go wô, 'Ng-ts, kyih-mih tao Ngô bu-dao-yün-li tso sang-weh ky'i.' ²⁹ Gyi we-teh wô, 'Ngô ve ky'i:' 'eo-deo ao-hwe, ziu ky'i-de. ³⁰ Ah-tia yi tseo-læ, teng di-nyi-go yia z-ka kông-fah. Gyi we-teh wô, 'Cü, ngô ky 'ide: 'tsih-z m-neh ky'i. ³¹ Keh liang-go, 'ah-li ih-go z i ah-tia sing-siang tso-go?" Gyi-lah wô, "Keh do-go." Yiæ-su teng gyi-lah wô, "Ngô tsing wô hyiang ng-lah dao, Siu-zin-liang nying teng piao-ts wa sin-jü ng-lah we tseo-tsing Jing-kohli kyʻi. ³² Ing-we Iah-ʻen tso tsing-dzih-go z-ken tao ng-lah u-sen læ, ng-lah feh siang-sing gyi; keh-sing siu-zin-liang nying teng piao-ts fæn-cün siang-sing gyi: ng-lah k'enkyin ts-'eo, yia m-neh ao-hwe ky'i siang-sing gyi.

²⁸「爾拉個意思咋個?有一個人有兩個兒子。走來,等其大個話:『兒子,今末到我葡萄園裏做生活去。』²⁹ 其回答話:『我鱠去。』後頭懊悔,就去了。³⁰阿爹又走來,等第二個也是介講法。其回答話:『主,我去了。』 只是嘸得去。³¹ 箇兩個,何裏一個是依阿爹心想做個?」 其拉話:「箇大個。」<u>耶穌</u>等其拉話:「我眞話向爾拉道,收錢糧人等婊子還先如爾拉會走進神國裏去。³² 因為約翰做正直個事幹到爾拉烏碎來,爾拉弗相信其,箇星收錢糧人等婊子反轉相信其。爾拉看見之後,也嘸得懊悔去相信其。

³³ "Wa-yiu ih-go pi-fông ng-lah hao t'ing: yiu ih-go kô-cü cong ih-yün ts-bu-dao, dön-ky'ün tang-leh ts'iangpô, yün-li gyüih ih-go tsiu-tsô-den, zao ih-go kao-leo, tsuc'ih peh cong-din-nying, ziu" c'ih-meng ky'i-de. ³⁴ Ko-ts joh-go z-'eo kw'a tao, ts'a gyi-go nu-boh tao cong-dinnying u-sen læ siu yün-li-go ko-ts. ³⁵ Cong-din-nying ziu k'ô gyi nu-boh, tang ih-go, sah ih-go, zah-deo k'ang-sah ih-go. 36 $K\hat{o}$ - $c\ddot{u}$ yi ts'a bih-go nu-boh læ, pi zin-deo wa to: cong-din-nying yia z-ka long gyi-lah. ³⁷ 'Eo-deo ts'a zi-go ng-ts læ, z-ka wô, 'Gyi-lah pih-ding kying-djong ngô ng-ts.' ³⁸ Cong-din-nying ih k'en-kyin *gyi* ng-ts, ziu dô-kô z-ka wô, 'Keh z tsih-djôh ts'æn-nyih go cü-kwu; ah-lah ts'ia sah-leh gyi, deh gyi-go ts'æn-nyih.' 39 Ziu k'ô-leh gyi, t'ec'ih yün-nga, sah-diao. ⁴⁰ Ka-ni, ke-yün-go cü-nying-kô kyü-læ, we dza bæn keh-pæn cong-din-nying?" ⁴¹ Gyi-lah teng Gyi wô, "We sah-k'eo ts'ao-mih keh-pæn ôh-nying, pô bu-dao-yün tsu-c'ih peh bih-go cong-din-nying, tao ko-ts *joh-go* z-'eo we do-c'ih peh gyi go."

33 「還有一個比方爾拉好聽。有一個家主種一園紫葡 萄, 團圈打勒槍笆, 園裏掘一個酒榨窞, 造一個高樓, 租 出撥種田人,就出門去了。34 果子熟個時候快到,差其個 奴僕到種田人烏碎來收園裏個果子。35種田人就抲其奴 僕,打一個,殺一個,石頭揞煞一個。³⁶ 家主又差別個奴 僕來,比前頭還多。種田人也是介弄其拉。³⁷ 後頭差自個 兒子來,是介話:『其拉必定敬重我兒子。』³⁸ 種田人一 看見其兒子,就大家是介話:『箇是接着產業個主顧,阿 拉且殺勒其,奪其個產業。』39 就抲勒其,推出園外,殺 掉。40介呢,箇園個主人家歸來,會咋辦箇班種田人?」 41 其拉等其話:「會煞扣抄滅箇班惡人,把葡萄園租出撥 別個種田人,到果子熟個時候會馱出撥其個。」

⁴² Yiæ-su teng gyi-lah wô, "Sing-shü-li *sia-tih*, 'Ky'i-oh-go s-vu sô ky'i-diao keh-kw'e zah-deo, z tso-leh *oh* kôh-lôh-den deo-ih-kw'e zah-deo; keh z Cü sô tso-go, dziu ah-lah k'en-læ z hyi-gyi-go:' [S. 118. 22, 23.] *keh-go shih-wô* ng-lah soh m-neh doh-ko ma? ⁴³ Keh-lah Ngô wô hyiang ng-lah dao, Jing-ming-go koh pih iao dzong ng-lah-go siu-li deh-leh-ky'i, s-peh ih-pæn we kyih Jing-koh-go ko-ts go pah-sing. ⁴⁴ Wa-yiu tih-lôh keh-kw'e zah-deo-zông cü-kwu, pih-ding tih-wu; *keh-kw'e zah-deo* tih-lôh gyi zông-deo, keh-go cü-kwu pih-ding ah-leh feng-se."

42 <u>耶穌</u>等其拉話:「聖書裏寫的:『起屋個師父所棄掉箇塊石頭,是做勒屋角落頭頭一塊石頭。箇是主所做個,就阿拉看來是稀奇個。』[S. 118. 22, 23.] 箇個說話爾拉啥嘸得讀過嗎? 43 箇勒我話向爾拉道,神明個國必要從爾拉個手裏奪勒去,賜撥一班會結神國個果子個百姓。44 還有跌落箇塊石頭上主顧,必定跌糊。箇塊石頭跌落其上頭,箇個主顧必定壓勒粉碎。」

 45 Keh-sing tsi-s-deo teng Fah-li-sæ nying t'ing-meng Gyi-go pi-fông shih-wô, hyiao-teh z kông-tao gyi-lah zi. 46 Sing-siang iao k'ô Gyi, tsih-z p'ô pah-sing, ing-we gyi-lah sön Gyi z-go sin-cü-nying.

⁴⁵ 箇星祭司頭等<u>法利賽</u>人聽聞其個比方說話,曉得是 講到其拉自。⁴⁶ 心想要抲其,只是怕百姓,因為其拉算其 是個先知人。

Mt. XXII.

Yiæ-su k'æ k'eo yi yüong pi-fông shih-wô teng gyi-lah kông, z-ka wô:——

耶穌開口又用比方說話等其拉講,是介話: ---

² "T'in-koh k'o-pi ih-go wông-ti, bæn gyi ng-ts-go hao-nyih-tsiu: ³ ts'a gyi nu-boh ky'i ts'e ts'ing-kæn-go nying-k'ah læ ky'üoh hao-nyih-tsiu; gyi-lah feh k'eng læ. ⁴ Yi ts'a bih-go nu-boh, z-ka wô, 'Hao teng ts'ing-kæn-go

nying-k'ah ky'i wô, Ngô-go tsiu-væn yi-kying be-hao-de, keh-sing ngeo teng công-công sang-k'eo tu sah-hao, yiang-yiang tu zi-be-de; hao-nyih-tsiu hao læ ky'üoh-de.' 5 Dæn-z gyi-lah feh ts'æ gyi, tseo-leh-ky'i-de; ih-go tao zi din-deo ky'i, ih-go tso sang-i ky'i. 6 Yü-to cô-leh gyi nuboh, tsao-t'ah, sah-diao. ⁷ Wông-ti ih t'ing-meng, fah-ôngde; ziu ts'a ping-mô djü-mih keh-sing hyüong-siu, siaodiao gyi-lah zing-li. ⁸ Keh-tsao yi teng nu-boh wô, 'Haonyih-tsiu be-hao-tong, tsih-z ts'ing-kæn-go nying-k'ah ky'in hao. ⁹ Ka-ni, ng-lah hao tao s-ts'ô-lu-k'eo ky'i, vænpah sô p'ong-djôh-go, tu eo gyi læ ky'üoh hao-nyih-tsiu.' ¹⁰ Keh-sing nu-boh tseo-c'ih lu-li ky'i, væn-pah sô p'ongdjôh-go, hao-hao-tæ-tæ tu ling gyi tsing-læ: ky'üoh haonyih-tsiu go nying-k'ah ziu zo-mun-de. ¹¹ Wông-ti tseotsing-læ k'en zo-zih-go nying-k'ah, k'en-kyin ih-go nying, feh c'ün 'o hao-nyih go do-i; ¹² ziu teng gyi wô, 'Beng-yiu, ng feh c'ün 'o hao-nyih go do-i, dza-we tseo-tsing dôngdeo læ?' Gyi feh k'æ k'eo. 13 Keh-tsao wông-ti teng kehsing ti-'ô-nying wô, 'Hao bo gyi siu kyiah, t'o-c'ih tao nga-deo heh-en-go di-fông; keh-deo yiu ngao-leh ngô-ts' di-k'oh-go sing-hyiang.' ¹⁴ Ing-we dziao-læ-go to, t'iao-shün-go ky'üih."

「天國可比一個皇帝,辦其兒子個好日酒。³ 差其奴 僕去催請間個人客來喫好日酒。其拉弗肯來。4 又差別個奴 僕,是介話:『好等請間個人客去話,我個酒飯已經備好 了, 箇星牛等壯壯牲口都殺好, 樣樣都齊備了, 好日酒好 來喫了。』5但是其拉弗睬其,走了去了。一個到自田頭 去,一個做生意去。6餘多揸勒其奴僕,遭蹋,殺掉。7皇 帝一聽聞,發快了。就差兵馬除滅箇星兇手,燒掉其拉城 裏。8 箇遭又等奴僕話: 『好日酒備好東, 只是請間個人客 欠好。⁹介呢,爾拉好到四岔路口去,凡百所碰着個,都謳 其來喫好日酒。』10 箇星奴僕走出路裏去,凡百所碰着 個,好好歹歹都領其進來。喫好日酒個人客就坐滿了。11 皇帝走進來看坐席個人客,看見一個人,弗穿賀好日個大 衣, ¹² 就等其話: 『朋友,爾弗穿賀好日個大衣,咋會走 進蕩頭來?』其弗開口。13 箇遭皇帝等箇星底下人話:

『好縛其手腳,拖出到外頭黑暗個地方,箇頭有咬勒牙齒啼哭個聲響。』¹⁴ 因為召來個多,挑選個缺。」

¹⁵ KEH-GO z-'eo Fah-li-sæ nying ky'i siang-liang, dzago hao tsiang Gyi-go shih-wô tsông kw'u-t'ao-ky'ün t'ao Gyi. ¹⁶ Ziu ts'a zi-go meng-du teng Hyi-lih keh-tông, meng Gyi z-ka wô, "Sin-sang, ah-lah hyiao-teh Ng z dzing-jih-go, jih-jih-we-we kông Jing-ming-go dao-li; ih-ngæn feh gyühyih nying-kô, yia feh cing nying-kô-go min-k'ong. ¹⁷ Kani, hao wô hyiang ah-lah dao, Ng-go i-s dza-go? deo zinliang peh [1] Kæ-sah, z feh-z?" 18 Yiæ-su hyiao-teh gyi-lahgo ôh-i, ziu wô. "Kô-hao-nying, ng-lah dza-we siang s-s Ngô? 19 Deo zin-liang go t'ong-'ang-dzin do-læ peh Ngô k'en." Gyi-lah ziu ^[2]do jih-kw'e fæn-ping peh Gyi. ²⁰ Yiæsu teng gyi-lah wô, "Keh-go deo-ts teng [3]koh-'ao z jü-nohgo?" ²¹ Gyi-lah wô, "Z Kæ-sah-go." Keh-tsao Yiæ-su teng gyi-lah wô, "Ka-ni, z Kæ-sah-go tong-si, hao peh Kæ-sah: z Jing-ming-go tong-si, hao peh Jing-ming." 22 Gyi-lah ih t'ing-meng tu hyi-gyi; ziu li-k'æ Gyi ky'i-de.

15 箇個時候法利賽人去商量,咋個好將其個說話裝箍 套圈套其。16 就差自個門徒等希律箇黨,問其是介話: 「先生, 阿拉曉得爾是誠實個, 實實惠惠講神明個道理, 一眼弗懼脅人家,也弗准人家個面孔。17 介呢,好話向阿 拉道,爾個意思咋個?頭錢糧撥該撒[1],是弗是?」18 耶 穌曉得其拉個惡意,就話:「假好人,爾拉咋會想試試 我?19 投錢糧個通行錢馱來撥我看。」其拉就馱十塊番餅 [2] 撥其。20 耶穌等其拉話: 「箇個頭子等國號[3] 是誰儂 個?」21 其拉話:「是該撒個。」箇遭耶穌等其拉話: 「介呢,是該撒個東西,好撥該撒;是神明個東西,好撥 神明。」22 其拉一聽聞都稀奇,就離開其去了。

- [1] Kæ-sah ziu-z Lo-mô wông-ti-go koh-'ao. 該撒就是羅馬皇帝個國號。 (原註)
- [2] Keh-kw'e fæn-ping dzih ih-din nying-ts go: k'en. Mt. 20. ² 該塊番 餅值一鈿銀子個。看 Mt. 20. 2
 - [3] Peng-veng wô z-ngæn. 本文話字眼。

²³ Sah-t'u-kæ nying, ziu-z wô weh-cün-læ-go z-ken z m-teh-go, keh nyih-ts gyi-lah yiu-sing tseo-long-læ, meng Gyi, z-ka wô, ²⁴ "Sin-sang, Mo-si wô, ih-go nying ziah-z mneh ng-nô ziu si-de, ah-di kæ c'ü gyi lao-nyüing, hao teng ah-ko djün-cong-tsih-dæ. ²⁵ Næn-kæn ah-lah u-sen yiu ts'ih hyüong-di: do-go dæ-leh lao-nyüing, si-de; ing-we mneh ng-nô, lao-nyüing yi-lôh peh ah-di: ²⁶ di-nyi, di-sæn, ih-dzih tao di-ts'ih, tu z-ka-go. 27 Ting kyih-sah, laonyüing yia si-de. ²⁸ Ka-ni, weh-cün-læ-go z-'eo, keh ts'ihgo cong-nyiang gyi tao-ti sön jü-go lao-nyüing? ing-we tu c'ü gyi ko-de." ²⁹ Yiæ-su we-teh gyi-lah, wô, "Ng-lah weleh feh hyiao-teh Sing-shü teng Jing-ming-go neng-ken, keh-lah ts'o-de. 30 Ing-we weh-cün-læ-go z-'eo, feh tsôh c'ü-tsing kô-c'ih; z ziang Jing-ming-go t'in-s læ t'in-zông ih-yiang-go. ³¹ Ziah kông-tao si-nying weh-cün-læ z-ken, Jing-ming teng ng-lah sô wô, ³² 'Ngô z Üô-pah-lah-hen-go Jing-ming, Yi-sah-go Jing-ming, Yüô-kôh-go Jing-ming,' [C. 3. 6.] keh-go shih-wô ng-lah soh m-neh doh-ko ma? Jingming feh-z si-nying-go Jing-ming, z weh-nying-go *Jing-ming*." ³³ Pah-sing t'ing-meng, tu hyi-gyi Gyi-go kao-hyüing.

23 撒土該人,就是話活轉來個事幹是嘸得個,箇日子 其拉有星走攏來,問其,是介話:²⁴「先生,摩西話,一 個人若是嘸得兒囡就死了, 阿弟該娶其老媳, 好等阿哥傳 宗接代。²⁵ 難間阿拉烏碎有七兄弟。大個抬了老嬝,死 了。因為嘸得兒囡,老嬝遺落撥阿弟。²⁶ 第二、第三,一 直到第七,都是介個。27 頂結煞,老嶩也死了。28 介呢, 活轉來個時候, 箇七個中央其到底算誰個老儂?因爲都娶 其過了。」²⁹ 耶穌回答其拉,話:「爾拉為了弗曉得聖書 等神明個能幹, 箇勒錯了。30 因為活轉來個時候, 弗作娶 進嫁出。是像神明個天使來天上一樣個。³¹ 若講到死人活 轉來事幹,神明等爾拉所話,32『我是亞伯拉罕個神明, 以撒個神明,雅各個神明,』[C. 3. 6.] 箇個說話爾拉啥嘸得 讀過嗎?神明弗是死人個神明,是活人個神明。」33百姓 聽聞,都稀奇其個教訓。

³⁴ Fah-li-sæ nying t'ing-meng *Yiæ-su* kông-leh Saht'u-kæ nying ve k'æ k'eo, ziu dô-kô jü-jih-long. ³⁵ Nencong yiu ih-go, z kao lih-fah go sin-sang, iao s-s Gyi k'en, ziu meng Gyi wô, ³⁶ "Sin-sang, lih-fah li-deo 'ah-li ih-diao do?" 37 Yiæ-su teng gyi wô, "Ng tông-kæ yüong djün-fu sing-dziang, djün-fu tsing-jing, djün-fu dzæ-dzing, ækying Cü ng-go Jing-ming.' [Sm. 6. 5.] ³⁸ Keh z deo-ih-go lih-fah, yi z gyi do-go. ³⁹ Di-nyi yia teng gyi siang-ziang, ziu-z, 'Tông-kæ æ-sih ng-go ling-sô-kô ziang zi ih-yiang.' [Lv. 19. 18.] 40 Long-tsong lih-fah teng sin-cü-nying-go shih-wô, tu z k'ao-djôh keh liang-diao tso-cü."

34 <u>法利賽</u>人聽聞<u>耶穌</u>講勒<u>撒土該</u>人艙開口,就大家聚集攏。35 內中有一個,是教律法個先生,要試試其看,就問其話:36 「先生,律法裏頭何裏一條大?」37 <u>耶穌</u>等其話:『爾當該用全副心腸,全副精神,全副才情,愛敬主爾個神明。』38 箇是頭一個律法,又是其大個。39 第二也等其相像,就是:『當該愛惜爾個鄰舍家像自一樣。』[Lv.

19. 18.] ⁴⁰ 攏總律法等先知人個說話,都是靠着箇兩條做主。」

⁴¹ Fah-li-sæ nying jü-long-tong-go z-'eo, Yiæ-su meng gyi-lah, wô, ⁴² "Ng-lah ts'eng Kyi-toh dza-go? z jü-go 'Eo-dæ?" Gyi-lah wô, "Da-bih-go." ⁴³ *Yiæ-su* teng gyi-lah wô, "Keh-meh dza-we Da-bih be *Sing-Ling* ken-dong ts'ing-hwu Gyi z Cü, z-ka wô, ⁴⁴ 'Cü teng ngô-go Cü wô, Hao zo læ Ngô jing-siu-pin, teng-tao Ngô pô Ng-go dziu-dih tso Ng-go dah-kyiah-teng.' [S. 110. 1.] ⁴⁵ Ka-ni, Da-bih kyi-jün ts'ing-hwu Gyi z Cü, Gyi dza-we wa z Da-bih-go 'Eo-dæ?"

41 <u>法利賽</u>人聚攏東個時候,<u>耶穌</u>問其拉,話: 42 「爾 拉忖<u>基督</u>咋個?是誰個後代?」其拉話: 「<u>大闢</u>個。」 43 <u>耶穌</u>等其拉話: 「箇末咋會<u>大闢</u>被聖靈感動稱呼其是主, 是介話: 44 『主等我個主話,好坐來我順手邊,等到我把 爾個仇敵做爾個踏腳凳。』[S. 110. 1.] 45 介呢,<u>大闢</u>既然稱 呼其是主,其咋會還是大闢個後代?」

⁴⁶ M-nying neng-keo we-teh Gyi ih-sing: dzong keh nyih yi-'eo yia m-nying ken tsæ ky'i meng Gyi.

⁴⁶ 嘸人能夠回答其一聲。從箇日以後也嘸人敢再去問 其。

Mt. XXIII.

KEH-GO z-'eo Yiæ-su kông peh cong-nying teng Zi-go meng-du t'ing, z-ka wô, ² "Doh-shü-nying teng Fah-li-sæ nying z zo læ Mo-si ü-ts go: ³ sô-yi gyi-lah væn-pah eo nglah pao-siu go, hao ky'i pao-siu, hao ky'i tso: dæn-z m-nao tsiao gyi 'ang-we ka tso; ing-we gyi-lah tsih we kông, feh we tso. ⁴ Gyi-lah z bo-long djong-djong næn-t'iao-go tændeo, fông læ nying-kô kyin-kah-deo: gyi-lah zi ziu-z ihmeh ts-deo feh k'eng ky'i dong gyi. ⁵ Gyi-lah væn-pah sô tso-go, tu z deh-we iao peh nying-kô k'en. Gyi-lah conghyiao-ta tso-leh kw'eh-kw'eh-go, i-zông ken-den tso-leh do-do-go; ⁶ tsiu-yin-zông iao zo deo-we, jü-we-dông-li iao zo zông-we, ⁷ z-min-zông iao nying ts'ing gyi en; yi hwunhyi nying-kô ts'ing-hwu gyi, Fu-ts, fu-ts!

箇個時候<u>耶穌</u>講撥衆人等自個門徒聽,是介話:²「讀書人等<u>法利賽</u>人是坐來<u>摩西</u>椅子個。³ 所以其拉凡百謳爾拉保守個,好去保守,好去做。但是嘸得好照其行為介做。因為其拉只會講,弗會做。⁴ 其拉是縛攏重重難挑個擔頭,放來人家肩胛頭。其拉自就是一末指頭弗肯去動其。⁵ 其拉凡百所做個,都是特為要撥人家看。其拉忠孝帶做勒闊闊個,衣裳秆頭做勒大大個。⁶ 酒筵上要坐頭位,聚會堂裏要坐上位,⁷ 市面上要人請其安,又歡喜人家稱呼其,夫子,夫子!

8 "Dæn-z ng-lah m-nao peh nying-kô ts'ing-hwu fu-ts: ing-we ng-lah tu z hyüong-di; tsih-yiu Ih-go z ng-lah-go Sin-sang, ziu-z Kyi-toh. ⁹ Yia m-nao ts'ing-hwu shü-kæn-zông nying z ah-tia: ing-we tsih-yiu Ih-go z ng-lah-go Ah-tia, ziu-z Keh-we læ t'in-zông go. ¹⁰ Yia m-nao peh nying-kô ts'ing-hwu sin-sang: ing-we tsih-yiu Ih-go z ng-lah-go Sin-sang, ziu-z Kyi-toh. ¹¹ Dæn-z ng-lah cong-nyiang do-go cü-kwu, kæ tso ng-lah-go yüong-nying. ¹² Væn-pah zi

sing-zông tso kao go, we kông gyi lôh tso ti; zi kông-lôh tso ti go, we sing gyi zông tso kao.

- ⁸「但是爾拉嘸得好撥人家稱呼夫子。因為爾拉都是兄弟,只有一個是爾拉個先生,就是<u>基督</u>。⁹也嘸得好稱呼世間上人是阿爹。因爲只有一個是爾拉個阿爹,就是箇位來天上個。¹⁰也嘸得好撥人家稱呼先生。因爲只有一個是爾拉個先生,就是<u>基督</u>。¹¹但是爾拉中央大個主顧,該做爾拉個傭人。¹²凡百自身上做高個,會降其落做低,自降落做低個,會升其上做高。
- ¹³ "Doh-shü-nying teng Fah-li-sæ nying, ng-lah kô-hao-nying yiu 'o-se! ing-we læ nying-kô min-zin so-djü t'in-koh-go *meng*: ng-lah zi feh tseo-tsing-ky'i, læ-tih tseo-tsing-go cü-kwu ng-lah yia feh hyü gyi tseo-tsing-ky'i.
- 13 「讀書人等<u>法利賽</u>人,爾拉假好人有禍祟!因為來 人家面前鎖住天國個門。爾拉自弗走進去,來的走進個主 顧爾拉也弗許其走進去。

- ¹⁴ "Doh-shü-nying teng Fah-li-sæ nying, ng-lah kô-hao-nying yiu 'o-se! ing-we t'eng-ky'üoh kwu-sông lao-nyüng-go kô-kyi, kô-hyi-deo tao-kao mæn-dziang: keh-lah pih-ding ziu-ze yü-kô djong.
- 14 「讀書人等<u>法利賽</u>人,爾拉假好人有禍祟!因為吞 喫孤孀老嬝個家計,假嬉頭禱告漫長。箇勒必定受罪愈加 重。
- 15 "Doh-shü-nying teng Fah-li-sæ nying, ng-lah kô-hao-nying yiu 'o-se! ing-we tseo-pin shü-lu 'en-lu ky'i ky'ün ih-go nying jih zi-go kyiao; yi-kying jih-leh kyiao, fæn-cün peh gyi pi ng-lah zi wa iao kô-be tso di-nyüoh-go nying.
- 15 「讀書人等<u>法利賽</u>人,爾拉假好人有禍祟!因為走 遍水路旱路去勸一個人入自個教。已經入勒教,反轉撥其 比爾拉自還要加倍做地獄個人。
- ¹⁸ "Ng-lah ling-lu-go hah-ts yiu 'o-se! ng-lah wô, 'Nying ziah-z pô *sing*-din vah-tsiu, keh z m-kao; ziah-z pô

sing-din-li-go kying-ts vah-tsiu, pih iao sön-su, ¹⁷ Ng-lah nyü-beng-go hah-ngæn cü-kwu! 'ah-li ih-yiang do, wa-z kying-ts do, wa-z sing-din do? keh-go kying-ts yia z we-leh sing-din tseng-ky'i-go. ¹⁸ Wa-yiu wô, 'Nying ziah-z pô tsidæn vah-tsiu, keh z m-kao; ziah-z pô tsi-dæn-zông-go liveh vah-tsiu, pih iao sön-su. ¹⁹ Ng-lah nyü-beng-go hahngæn cü-kwu! 'ah-li ih-yiang do, wa-z li-veh do, wa-z tsidæn do? li-veh yia z we-leh tsi-dæn tseng-ky'i-go. 20 Ka-ni, nying ziah-z pô tsi-dæn vah-tsiu, keh z lin tsi-dæn-zông ihts'ih-go *li-veh* tu vah-tsing dzæ-nen. ²¹ Nying ziah-z pô sing-din vah-tsiu, keh z lin sing-din-li deng-tih-go Cü-kwu, vah-tsing dzæ-nen. ²² Nying ziah-z pô t'in vah-tsiu, keh z pô Jing-ming-go zo-we, lin zo-tih-go Cü-kwu, vah-tsing dzæ-nen.

¹⁸「爾拉領路個瞎子有禍祟!爾拉話:『人若是把聖殿罰咒,箇是嘸告;若是把聖殿裏個金子罰咒,必要算數,』¹⁷爾拉愚笨個瞎眼主顧!何裏一樣大,還是金子大,還是聖殿大?箇個金子也是爲了聖殿尊起個。¹⁸還有

話:『人若是把祭壇罰咒,箇是嘸告;若是把祭壇上個禮物罰咒,必要算數。¹⁹ 爾拉愚笨個瞎眼主顧!何裏一樣大,還是禮物大,還是祭壇大?禮物也是為了祭壇尊起個。²⁰ 介呢,人若是把祭壇罰咒,箇是連祭壇上一切個禮物都罰進在內。²¹ 人若是把聖殿罰咒,箇是連聖殿裏庉的個主顧,罰進在內。²² 人若是把天罰咒,箇是把神明個座位,連坐的個主顧,罰進在內。

 23 "Doh-shü-nying teng Fah-li-sæ nying, ng-lah kô-hao-nying yiu 'o-se! ing-we pô bo-ho, we-hyiang, gying-ts'æ, jih-kwu li-deo tseng-ky'i ih-kwu; tsih-z lih-fah li-hyiang ting djong-deo z-ken, ziu-z kong-yi, dz-pe, sing-'ang, ng-lah tu ts'o-lôh-de. Dæn-z dông-yiang z kæ tso-go, ziu-z keh-yiang yia feh kæ ts'o-lôh. 24 Ng-lah ling-lu-go hah-ts! hyiang-ts djong we li-c'ih, loh-do tao t'eng-lôh-ky'i.

23 「讀書人等<u>法利賽</u>人,爾拉假好人有禍祟!因為把 薄荷、茴香、芹菜,十股裏頭尊起一股。只是律法裏向頂 重頭事幹,就是公義、慈悲、信行,爾拉都錯落了。但是 蕩樣是該做個,就是箇樣也弗該錯落。²⁴ 爾拉領路個瞎子!香子蟲會濾出,駱駝倒吞落去。

²⁵ "Doh-shü-nying teng Fah-li-sæ nying, ng-lah kô-hao-nying yiu 'o-se! ing-we un-tsæn diah-ts, ng-lah we long gyi nga-deo ken-zing, gyi li-deo tao yiu gyiang-wang-pô-dao teng mang-sing tsi-mun-liao-go. ²⁶ Ng hah-ngæn-go Fah-li-sæ nying! un-tsæn diah-ts, sin iao long gyi li-deo ken-zing, s-teh gyi nga-deo yia we ken-zing-de.

²⁵ 「讀書人等<u>法利賽</u>人,爾拉假好人有禍祟!因為碗 盞碟子,爾拉會弄其外頭乾淨,其裏頭到有強橫霸道等猛 心齒滿了個。²⁶ 爾瞎眼個<u>法利賽</u>人!碗盞碟子,先要弄其 裏頭乾淨,使得其外頭也會乾淨了。

²⁷ "Doh-shü-nying teng Fah-li-sæ nying, ng-lah kô-hao-nying yiu 'o-se! ing-we ng-lah k'o-pi-ziang feng-bah-liao-go veng-mo, nga-deo k'en-læ z hao-k'en-go, li-deo yiu s-kweh teng yiang-yiang ao-tsao tsi-mun-liao-go. ²⁸ Ng-lah yia z-ka, nga-kwông-min nying-kô k'en-kyin z tsing-dzih-go, li-deo yiu kô-i teng fi-li z-ken seh-mun-liao-go.

²⁷「讀書人等<u>法利賽</u>人,爾拉假好人有禍祟!因為爾 拉可比像粉白了個墳墓,外頭看來是好看個,裏頭有屍骨 等樣樣鏖糟齒滿了個。²⁸ 爾拉也是介,外光面人家看見是 正直個,裏頭有假意等非禮事幹塞滿了個。

²⁹ "Doh-shü-nying teng Fah-li-sæ nying, ng-lah kôhao-nying yiu 'o-se! ing-we ng-lah ky'i-zao keh-sing sincü-nying-go veng-mo, tsông-sih tsing-dzih nying-go vengdeo, ziu wô, ³⁰ 'Ah-lah ziah sang læ tsu-tsong z-'eo, tsæ-ve teng gyi dô-kô ky'i liu-c'ih sin-cü-nying-go hyüih.' 31 Kehlah ng-lah zi tso te-tsing ng-lah z long-sah sin-cü-nying cükwu-go ts-seng. ³² Ka-ni, ng-lah hao ky'i mun-tsoh tsutsong-go ôh-kwun. 33 Ng-lah dôh-dzô sang-go dôh-dzô! dza neng-keo min-diao di-nyüoh-li-go ying-vah? 34 Kehlah Ngô we ts'a sin-cü-nying, ts'ong-ming nying, doh-shünying, tao ng-lah-go u-sen læ: yiu-sing ng-lah we sah-diao gyi, yiu-sing jih-z-kô ting gyi sah, yiu-sing læ ng-lah jü-wedông-li pin-ts tang gyi, wa-yiu tao-c'ü zing-li ken gyi tseo: ³⁵ s-teh shü-kæn-zông liu-c'ih tsing-dzih nying-go hyüih,

dzong tsing-dzih-go Üô-pah ky'i-deo, ih-dzih tao Pô-lah-kyüô ng-ts Sah-kyüô-li-üô, (ziu-z ng-lah læ tsi-dæn teng da-din-go cong-nyiang sah-diao-go,) tu iao kwe tao ng-lah sing-zông. ³⁶ Ngô tsing wô hyiang ng-lah dao, Keh-sing z-ken tu iao ing-djôh keh-go shü-dæ.

29 「讀書人等法利賽人,爾拉假好人有禍祟!因為爾 拉去造箇星先知人個墳墓,裝飾正直人個墳頭,就話:30 『阿拉若生來祖宗時候,再赠等其大家去流出先知人個 血。』31 箇勒爾拉自做對證爾拉是弄煞先知人主顧個子 孫。32 介呢,爾拉好去滿足祖宗個惡貫。33 爾拉毒蛇生個 毒蛇!咋能夠免掉地獄裏個刑罰?34 箇勒我會差先知人、 聰明人、讀書人,到爾拉個烏碎來。有星爾拉會殺掉其, 有星十字架釘其煞,有星來爾拉聚會堂裏鞭子打其,還有 到處城裏趕其走。35 使得世間上流出正直人個血,從正直 個亞伯起頭, 一直到巴拉迦兒子撒迦利亞, (就是爾拉來 祭壇等大殿個中央殺掉個,)都要歸到爾拉身上。³⁶我真 話向爾拉道, 箇星事幹都要應着箇個世代。

³⁷ "Yiæ-lu-sah-leng! Yiæ-lu-sah-leng! ng sah-diao sin-cü-nying, keh-sing ts'a tao ng-go u-dông læ-go, pô zah-deo k'ang-sah gyi; ng-go ng-nô Ngô to-siao we-su iao jü gyi long-læ, ziang kyi-nyiang yiah-sao ti-'ô u siao-kyi ka; tsih-z ng-lah feh iao! ³⁸ Ka-ni, ng-lah-go oh-lô iao pin-leh k'ong-di. ³⁹ Ngô wô hyiang ng-lah dao, Dzong-kying-yi-'eo ng-lah feh we tsæ k'en-kyin Ngô, ih-dzih iao tao ng-lah we wô, K'ao-djôh Cü ming-deo læ-go Cü-kwu z ing-kæ cohtsæn-go, ka z-'eo."

37 「<u>耶路撒冷</u>! <u>耶路撒冷</u>! 爾殺掉先知人,箇星差到爾個烏蕩來個,把石頭接煞其。爾個兒囡我多少回數要聚其攏來,像雞娘翼梢底下捂小雞介。只是爾拉弗要! 38 介呢,爾拉個屋落要變勒空地。39 我話向爾拉道,從今以後爾拉弗會再看見我,一直要到爾拉會話,靠着主名頭來個主顧是應該祝讚個,介時候。」

Mt. XXIV.

YIÆ-SU tseo-c'ih li-k'æ sing-din z-'eo, meng-du tseo-long-ky'i, iao tin-tin sing-din-go oh-yü peh Gyi k'en. ² Yiæ-su teng gyi-lah wô, "Keh-sing long-tsong, ng-lah k'en-kyin feh? Ngô tsing wô hyiang ng-lah dao, Dông-deo tsiang-læ lin-tsih ih-kw'e zah-deo tu m-neh dzing-lôh læ zah-deo zông-teng; long-tsong we ts'ah-diao."

耶穌走出離開聖殿時候,門徒走攏去,要點點聖殿個屋宇撥其看。² 耶穌等其拉話:「箇星攏總,爾拉看見弗?我真話向爾拉道,蕩頭將來連只一塊石頭都嘸得剩落來石頭上頂,攏總會拆掉。」

³ Yiæ-su læ Ken-læn sæn zo-kæn z-'eo, meng-du s-'ô tseo-long-læ, *meng Gyi*, z-ka wô, "Kyi-z yiu keh-sing z-ken? wô-wô hyiang ah-lah dao: wa-yiu Ng læ z-'eo, teng z-shü mah-go nyih-ts, yiu soh-go ziao-deo?"

³ <u>耶穌</u>來橄欖山坐間時候,門徒私下走攏來,問其,是介話:「幾時有箇星事幹?話話向阿拉道。還有爾來時候,等時世末個日子,有啥個兆頭?」

⁴ Yiæ-su we-teh gyi-lah, wô, "Ng-lah yüong kwu-djôh, m-nao peh nying-kô ta-diao. ⁵ Ing-we yiu hyü-to nying we mao-leh Ngô ming-deo læ-gyi, z-ka wô, 'Ngô z Kyi-toh;' yia we ta-diao yiu-ho nying. ⁶ Ng-lah we t'ing-meng tangtsiang z-ken, teng tang-tsiang-go sing-sih; ng-lah tön mnao yiao-'ôh: ing-we keh-sing z-ken tu pih-ding yiu-go, dæn-z mah-go z-'eo wa mi-de. ⁷ Ing-we pah-sing teng pahsing, koh-kô teng koh-kô, tu we dô-kô tang-tsiang: wa-yiusing di-fông yiu hwông-nyin, z-yüoh, teng di-cing kehsing. ⁸ Keh-sing long-tsong z-ken peh-ko z tsæ-næn-go ky'i-deo.

⁴ <u>耶穌</u>回答其拉,話:「爾拉用顧着,嘸得好撥人家帶掉。⁵ 因為有許多人會冒勒我名頭來其,是介話:『我是<u>基</u>督。』也會帶掉有夥人。⁶ 爾拉會聽聞打仗事幹,等打仗個信息。爾拉斷嘸得好搖惑。因為箇星事幹都必定有個,但是末個時候還未了。⁷ 因為百姓等百姓,國家等國家,都會大家打仗。還有星地方有荒年、時疫、等地震箇星。⁸ 箇星 攏總事幹不過是災難個起頭。

- ⁹ "Keh-go z-'eo nying-kô we tsiang ng-lah song kwun, iao peh ng-lah ziu næn; yi we sah-diao ng-lah: ping-ts'ia we-leh Ngô-go ming-deo, ng-lah we peh 'en-t'in-'ô pahsing k'eh-ts'eng. 10 Keh-go z-'eo yiu hyü-to meng-du we pæn-tih; yia we dô-kô song kwun, dô-kô k'eh-ts'eng. ¹¹ Yia yiu hyü-to kô sin-cü-nying we c'ih-læ, ta-diao yiu-ho nying. 12 Wa-yiu we-leh fi-li z-ken to-ky'i-læ, hyü-to mengdu-go æ-sih-sing we lang-de. 13 Dæn-z jing-næ tao ti go cükwu we teh-djôh kyiu. ¹⁴ Keh *t'in*-koh-go foh-ing yia iao djün-k'æ 'en-t'in-'ô, tso te-tsing peh koh-tang-koh-go pahsing; keh-tsao mah-go z-'eo ziu læ-de.
- ⁹「箇個時候人家會將爾拉送官,要撥爾拉受難,又會 殺掉爾拉。並且為了我個名頭,爾拉會撥咸天下百姓刻 忖。¹⁰ 箇個時候有許多門徒會班跌,也會大家送官,大家 刻忖。¹¹ 也有許多假先知人會出來,帶掉有夥人。¹² 還有 為了非禮事幹多起來,許多門徒個愛惜心會冷了。¹³ 但是 忍耐到底個主顧會得着救。¹⁴ 箇天國個福音也要傳開咸天 下,做對證撥國打國個百姓,箇遭末個時候就來了。

¹⁵ "Ng-lah k'en-kyin sin-cü Dæn-yi-li sô wô-go, 'we mih-diao di-fông, keh k'o-u-go tong-si,' lih læ keh tsengky'i-go di-fông; (doh-go cü-kwu kæ ming-bah;) ¹⁶ keh-tsao læ Yiu-t'a di-fông læ-kæn-go cü-kwu hao dao tao sæn-li kv'i: 17 læ oh-teng cü-kwu m-nao tseo-lôh-læ, do-c'ih ohli-go tong-si: 18 læ din-deo cü-kwu yia m-nao cün-læ do izông. ¹⁹ Keh-sing nyih-ts, do-du teng ky'üoh-na-go laonyüing yiu 'o-se! 20 Ng-lah yüong tao-kao, s-teh ng-lah dao-tseo hao-vong læ tong-t'in-li, yia hao-vong læ en-sihnyih. 21 Ing-we keh-go z-'eo pih-ding yiu da-næn; dzong k'æ-bih t'in-di ih-dzih tao næn-kæn dzong m-neh keh-cüka ko, 'eo-deo yia tsæ-ve yiu-go. ²² Ziah feh s-teh keh-sing nyih-kyiah tön-tin, ih-go nying tu kyiu-feh-læ: dæn-z weleh keh-sing t'iao-shün-go nying, we s-teh keh-sing nyihkyiah tön-go.

15 「爾拉看見先知但以理所話個,『會滅掉地方,箇可惡個東西,』立來箇尊起個地方。(讀個主顧該明白,) 16 箇遭來猶太地方來間個主顧好逃到山裏去。17 來

屋頂主顧嘸得好走落來,馱出屋裏個東西。¹⁸ 來田頭主顧也嘸得好轉來馱衣裳。¹⁹ 箇星日子,大肚等喫奶個老嶩有禍祟!²⁰ 爾拉用禱告,使得爾拉逃走好甮來冬天裏,也好甮來安息日。²¹ 因為箇個時候必定有大難,從開闢天地一直到難間從嘸得箇株介過,後頭也再艙有個。²² 若弗使得箇星日腳短點,一個人都救弗來。但是為了箇星挑選個人,會使得箇星日腳短個。

²³ "Keh-go z-'eo ziah yiu nying teng ng-lah wô, 'Kyitoh dông-deo læ-tong;' 'ôh-tsia wô, 'Keh-deo læ-kæn;' mnao siang-sing gyi. ²⁴ Ing-we yiu kô Kyi-toh kô sin-cünying iao c'ih-læ, yia we tso do-do jing-tsih teng gyi-z; steh keh-sing t'iao-shün-go nying, ziah-z hao ta-diao, yia we peh gyi-lah ta-diao. ²⁵ Ngô teng ng-lah yü-sin wô-go. ²⁶ Ka-ni, ziah yiu nying teng ng-lah wô, 'Ts'ia-k'en, Kyi-toh læ kw'ông-iæ di-fông; ng-lah m-nao tseo-c'ih-ky'i: ôh-tsia wô, 'Læ mih-feh-dong-fong oh-li læ-kæn;' ng-lah m-nao siang-sing. ²⁷ Ing-we tsing-ziang sin-din dzong tong-pin fah-c'ih-læ, we liang-ko tao si-pin; Nying-go Ng-ts læ yia we z-ka-go. Ing-we s-siu læ 'ah-li, lao-ing yia we jü-long tao 'ah-li.

²³「箇個時候若有人等爾拉話,『<u>基督</u>蕩頭來東。』 或者話,『箇頭來間。』嘸得好相信其。²⁴ 因為有假<u>基督</u> 假先知人要出來,也會做大大神蹟等奇事,使得箇星挑選 個人,若是好帶掉,也會撥其拉帶掉。²⁵ 我等爾拉預先話 個。²⁶ 介呢,若有人等爾拉話,『且看,<u>基督</u>來曠野地 方,爾拉嘸得好走出去。或者話,『來密弗洞風屋裏來 間。』爾拉嘸得好相信。²⁷ 因為正像閃電從東邊發出來, 會亮過到西邊。人個兒子來也會是介個。因為屍首來何 裏,老鷹也會聚攏到何裏。

²⁹ "Keh-sing tsæ-næn nyih-ts 'eo-deo, nyih-deo ziu we heh-en, yüih-liang feh we fah-kwông, sing-siu we dzong t'in-li tih-lôh-læ, t'in-zông keh-sing yiu gyün-ping go we yiao-dong. ³⁰ Keh-go z-'eo Nying-go Ng-ts ziao-deo we yin-c'ih læ t'in-zông: keh-tsao t'in-'ô-go cong ts-p'a tu we k'oh-leh sông-sing, yia we k'en-kyin Nying-go Ng-ts, yiu do-do gyün-ping teng yüong-wô, zo-leh t'in-li-go yüing

ka læ. ³¹ Gyi ziu we ts'a Gyi-go t'in-s, yüong 'ao-dong-go do-do sing-hyiang, dzong t'in-'ô dông-pin zing-deo ih-dzih tao keh-pin zing-deo, ky'i jü-long s-fông t'iao-shüngo nying.

²⁹「箇星災難日子後頭,日頭就會黑暗,月亮弗會發光,星宿會從天裏跌落來,天上箇星有權柄個會搖動。³⁰ 箇個時候人個兒子兆頭會現出來天上。箇遭天下個衆支派都會哭勒傷心,也會看見人個兒子,有大大權柄等榮華,坐勒天裏個雲介來。³¹ 其就會差其個天使,用號筒個大大聲響,從天下蕩邊盡頭一直到箇邊盡頭,去聚攏四方挑選個人。

³² "Ng-lah k'en vu-hwô-ko jü, hao ts'eng tao ih-go pifông: gyi-go ô-ts neng-ky'i-læ, yih-bæn pao-c'ih-læ, keh z-'eo hao hyiao-teh 'ô-t'in kw'a tao-de. ³³ Z-ka-go, ng-lah k'en-kyin keh-sing yiang-yiang z-ken, ziu hao hyiao-teh [1] Jing-ming-go koh kw'a tao-de, ziu læ meng-k'eo de. ³⁴ Ngô tsing wô hyiang ng-lah dao, Keh-go shü-dæ, feh tengtao keh-sing z-ken tu tso-dzing, feh we ko-ky'i. ³⁵ T'in teng di we ko-ky'i: Ngô-go shih-wô feh we ko-ky'i.

32 「爾拉看無花果樹,好忖到一個比方。其個椏枝嫩 起來,葉爿爆出來,箇時候好曉得夏天快到了。³³ 是介 個,爾拉看見箇星樣樣事幹,就好曉得神明個國^[1]快到 了,就來門口了。³⁴ 我眞話向爾拉道,箇個世代,弗等到 箇星事幹都做成,弗會過去。³⁵ 天等地會過去。我個說話 弗會過去。

[1] 'Ôh-tsia, Nying-go Ng-ts. 或者人個兒子。 (原註)

36 "Dæn-z keh-go nyih-ts, keh-go z-zing, m-nying hyiao-teh; t'in-zông-go t'in-s yia *feh hyiao-teh*; tsih-yiu Ngô Ah-tia Zi *hyiao-teh-go*. ³⁷ Wa-yiu Nying-go Ng-ts læ *z-'eo*, tsing-hao-ziang Nô-üô z-'eo ka-go. ³⁸ Ing-we 'ong-shü zin-deo, ih-dzih tao Nô-üô tseo-tsing fông-jün keh nyih, gyilah tu læ-tih ky'üoh læ-tih hah, c'ü-tsing kô-c'ih; ³⁹ dzihteng-tao 'ong-shü læ, long-tsong t'eng-ky'i, dzæ-fông tehcü-de: Nying-go Ng-ts læ, yia we z-ka-go. ⁴⁰ Keh-go z-'eo yiu liang-go nying læ din-deo læ-kæn; ih-go we siu-leh-

kyʻi, ih-go we dzing-lôh-tong. ⁴¹ Yiu liang-go nyü-nying læ mo-fông-li læ-kæn mo feng; ih-go we siu-leh-kyʻi, ih-go we dzing-lôh-tong.

³⁶「但是箇個日子,箇個時辰,嘸人曉得,天上個天 使也弗曉得,只有我阿爹自曉得個。³⁷ 還有人個兒子來時 候,正好像挪亞時候介個。³⁸ 因為洪水前頭,一直到挪亞 走進方船箇日,其拉都來的喫來的喝,娶進嫁出。³⁹ 直等 到洪水來,攏總汆去,纔方得知了,人個兒子來,也會是 介個。⁴⁰ 箇個時候有兩個人來田頭來間,一個會收勒去, 一個會剩落東。⁴¹ 有兩個女人來磨坊裏來間磨粉,一個會 收勒去,一個會剩落東。

⁴² "Sô-yi ng-lah yüong kying-sing: ing-we feh hyiaoteh ng-lah-go Cü soh-go z-'eo læ-gyi. ⁴³ Kô-cü ziah hyiaoteh zeh 'ah-li ih-kang læ, pih-ding kying-sing, tsæ-ve eo gyi oh-lô ts'ah dong, keh z ng-lah hyiao-teh-go. ⁴⁴ Keh-lah ng-lah yia tông-kæ bông-be-hao: ing-we Nying-go Ng-ts læ-go z-'eo, z ng-lah ts'eng-feh-tao-go.

42 「所以爾拉用警醒:因為弗曉得爾拉個主啥個時候來其。⁴³ 家主若曉得賊何裏一更來,必定警醒,再গ謳其屋落拆洞,箇是爾拉曉得個。⁴⁴ 箇勒爾拉也當該防備好。因為人個兒子來個時候,是爾拉忖弗到個。

⁴⁵ "Keh-meh jü z cong-sing ts'ong-ming-go nu-boh, gyi-go cü-nying-kô t'ôh gyi kwun oh-li-go cong nu-boh, ze z-'eo feng k'eo-liang peh gyi-lah? ⁴⁶ Cü-nying-kô tseo-læ, k'en-kyin yiu nu-boh z-ka tso-fah, keh-go nu-boh tao yiu foh-ky'i. ⁴⁷ Ngô tsing wô hyiang ng-lah dao, *Cü-nying-kô* we peh gyi kwun long-tsong kô-kyi. ⁴⁸ Ziah yiu ôh-go nuboh sing-li wô, 'Ngô cü-nying-kô iao tæn-kôh-kyi læ-de;' 49 ziu ky'i tang gyi-go dong-de nu-boh, teng tse-hen dô-kô ky'üoh dô-kô hah: ⁵⁰ keh-go nu-boh siang-feh-tao-go nyihts, feh teh-cü-go z-'eo, gyi-go cü-nying-kô læ-de; ⁵¹ ziu iao [1]tsæn gyi nyüoh-tsiang, peh gyi teng kô-hao-nying dô-kô yiu-veng: keh-deo yiu ngao-leh ngô-ts' di-k'oh-go singhyiang.

45 「箇末誰是忠心聰明個奴僕,其個主人家託其管屋 裏個衆奴僕,隨時候分口糧撥其拉? 46 主人家走來,看見 有奴僕是介做法,箇個奴僕倒有福氣。47 我眞話向爾拉 道,主人家會撥其管攏總家計。48 若有惡個奴僕心裏話: 『我主人家要耽擱記來了。』49 就去打其個同隊奴僕,等 醉漢大家喫大家喝。50 箇個奴僕想弗到個日子,弗得知個 時候,其個主人家來了。51 就要斬其肉醬^[1],撥其等假好 人大家有份。箇頭有咬勒牙齒啼哭個聲響。

[1] 'Ôh-tsia wô tang gyi li-'æ. 或者話打其厲害。(原註)

Mt. XXV.

"Keh-go z-'eo, t'in-koh we ziang jih-go dong-nyü, doleh gyi teng-tsæn, tseo-c'ih-ky'i nying-tsih sing-lông. ² Nen-cong yiu ng-go ts'ong-ming, ng-go nyü-beng. ³ Kehsing nyü-beng-go do-leh gyi teng-tsæn, feh ta yiu: ⁴ kehsing ts'ong-ming-go do-leh gyi teng-tsæn, lin gyi yiukwun-li yia ta yiu. ⁵ Sing-lông wa tæn-kôh-kæn, gyi-lah tu tang k'eh-c'ong, kw'eng-joh-de. 6 Tao pun-yia-ko, nyingsing wæ-ky'i, z-ka wô, 'Sing-lông læ-de; hao tseo-c'ih-læ nying-tsih gyi.' ⁷ Keh-tsao keh-sing dong-nyü tu bô-ky'ilæ, tsông gyi-lah teng-tsæn. ⁸ Keh-sing nyü-beng-go teng ts'ong-ming-go wô, 'Ng-lah-go yiu coh-tin peh ah-lah; ingwe ah-lah-go teng-tsæn iao u-de.' ⁹ Keh-sing ts'ong-minggo we-teh wô, 'S-feh-teh-go; k'ong-p'ô ng-lah teng ah-lah dô-kô yüong iao feh keo: neng-s ng-lah zi tao yiu-fông-li ky'i ma.' ¹⁰ Gyi-lah ky'i ma go z-'eo, sing-lông læ-de: kehsing be-hao-liao-go dong-nyü teng gyi dô-kô tseo-tsing-ky'i ky'üoh hao-nyih-tsiu; meng ziu so-hao-de. ¹¹ Yü-to-go dong-nyü 'eo-deo læ-de, z-ka wô, 'Cü, cü, k'æ-k'æ peh ahlah.' 12 Gyi we-teh wô, 'Ngô tsing wô hyiang ng-lah dao, Ngô feh nying-teh ng-lah.'

「箇個時候,天國會像十個童女, 馱勒其燈盞, 走出去迎接新郎。²內中有五個聰明,五個愚笨。³箇星愚笨個馱勒其燈盞,弗帶油。⁴箇星聰明個馱勒其燈盞,連其油罐

裏也帶油。⁵ 新郎還耽擱間,其拉都打瞌晚,睏熟了。⁶ 到 半夜過,人聲懷起,是介話:『新郎來了,好走出來迎接 其。』⁷ 箇遭箇星童女都爬起來,裝其拉燈盞。⁸ 箇星愚笨 個等聰明個話:『爾拉個油給點撥阿拉,因為阿拉個燈盞 要鴆了。』⁹ 箇星聰明個回答話:『使弗得個,恐怕爾拉等 阿拉大家用要弗夠,能使爾拉自到油坊裏去買。』¹⁰ 其拉 去買個時候,新郎來了。箇星備好了個童女等其大家走進 去喫好日酒,門就鎖好了。¹¹ 餘多個童女後頭來了,是介話:『主,主,開開撥阿拉。』¹² 其回答話:『我眞話向 爾拉道,我弗認得爾拉。』

- ¹³ "Sô-yi ng-lah yüong kying-sing; ing-we feh hyiaoteh Nying-go Ng-ts soh-go nyih-ts, soh-go z-zing, we læ.
- 13 「所以爾拉用警醒。因為弗曉得人個兒子啥個日子,啥個時辰,會來。
- ¹⁴ ING-WE *t'in-koh* k'o-pi ih-go nying iao c'ih-meng ky'i, eo-long gyi nu-boh, pô kô-kyi kao-dæ gyi-lah: ¹⁵ ze kôh-nying-go vu-nyih-ts feng nying-ts peh gyi-lah, ih-go ng-ts'in liang, ih-go nyi-ts'in liang, ih-go ih-ts'in liang: ziu

c'ih-meng ky'i-de. ¹⁶ Keh do ng-ts'in cü-kwu ziu ky'i-de, tsiang keh-go nying-ts tso sang-i, yi dzæn-tsing ng-ts'in. ¹⁷ Keh do nyi-ts'in cü-kwu yia z-ka, gyi yia dzæn-tsing nyi-ts'in. ¹⁸ Keh do ih-ts'in cü-kwu di-yiang-li ky'i gyüih ih-go den, pô gyi cü-nying-kô nying-ts k'ông-kæn.

¹⁴ 因為天國可比一個人要出門去,謳攏其奴僕,把家計交代其拉。¹⁵ 隨各人個武藝子分銀子撥其拉,一個五千兩,一個二千兩,一個一千兩,就出門去了。¹⁶ 箇馱五千主顧就去了,將箇個銀子做生意,又賺進五千。¹⁷ 箇馱二千主顧也是介,其也賺進二千。¹⁸ 箇馱一千主顧地垟裏去掘一個窗,把其主人家銀子囥間。

19 "Deng-leh dziang-kyiu, keh-sing nu-boh-go cünying-kô kyü-læ, teng gyi-lah sön tsiang. Keh do ng-ts'in cü-kwu tseo-læ, ling-nga yi ta ng-ts'in, z-ka wô, 'Cü, ng yiu ng-ts'in liang kao-dæ ngô; næn-kæn ngô yi yiu ng-ts'in dzæn-ts'eo.' ²¹ Cü-nying-kô teng gyi wô, 'Hao; ng congsing-go hao nu-boh! ng kying-siu yiu-'æn-go *kyi-jün* yiu cong-sing, ngô we peh ng kying-siu yiu-ho: hao tseo-tsing

ng cü-nying-kô kw'a-lôh-go di-fông læ.' 22 Keh do nyi-ts'in go tseo-læ, wô, 'Cü, ng yiu nyi-ts'in liang kao-dæ ngô; næn-kæn ngô yi yiu nyi-ts'in dzæn-ts'eo.' 23 Cü-nying-kô teng gyi wô, 'Hao; ng cong-sing-go hao nu-boh! ng kyingsiu yiu-'æn-go kyi-jün yiu cong-sing, ngô we peh ng kyingsiu yiu-ho: hao tseo-tsing ng cü-nying-kô kw'a-lôh-go difông læ.' ²⁴ Yiu ih-ts'in do-ko cü-kwu yia tseo-læ, wô, 'Cü, ngô hyiao-teh ng z k'eh-boh nying, feh-z ng cong-kæn usen yia we ky'i keh, feh-z ng tsah-kæn u-sen yia we ky'i siu; ²⁵ keh-lah ngô p'ô-de, tsiang ng-go nying-ts di-yiang-li ky'i k'ông-kæn: næn-kæn ng-zi-go tong-si læ-tong.' 26 Cünying-kô we-teh gyi, wô, 'Ng læn-do-go wa nu-boh! ng hyiao-teh feh-z ngô cong-kæn u-sen ngô yia we ky'i keh, feh-z ngô tsah-kæn u-sen ngô yia we ky'i siu: ²⁷ ka-ni, ng kæ pô ngô nying-ts dzin-tin-li ky'i dzeng-kæn; teng ngô læ-go z-'eo, ngô-zi-go nying-ts lin li-din tu hao do-kyü. 28 Ka-ni, ng-lah hao ky'i deh gyi keh ih-ts'in, kao-fu keh yiu jih-ts'in cü-kwu. ²⁹ Ing-we væn-pah yiu-go cü-kwu, wa iao kô-ts'eo peh gyi, s-teh yiu-yü: m-teh-go cü-kwu, lin gyi sô yiu-go yia iao teng gyi deh-leh-ky'i. ³⁰ Wa-yiu keh m-yüong-go nu-boh ken-c'ih tao nga-deo heh-en-go di-fông: keh-deo yiu ngao-leh ngô-ts' di-k'oh-go sing-hyiang.'

19 賬。箇馱五千主顧走來,另外又帶五千,是介話: 爾有五千兩交代我,難間我又有五千賺湊。』21 主人家等 其話: 『好,爾忠心個好奴僕!爾經手有限個既然有忠 心,我會撥爾經手有夥,好走進爾主人家快樂個地方 來。』22 箇馱二千個走來,話:『主,爾有二千兩交代 我,難間我又有二千賺湊。』23 主人家等其話: 『好,爾 忠心個好奴僕!爾經手有限個既然有忠心,我會撥爾經手 有夥。好走進爾主人家快樂個地方來。』24有一千馱個主 顧也走來,話:『主,我曉得爾是刻薄人,弗是爾種間烏 碎也會去割, 弗是爾扎間烏碎也會去收。25 箇勒我怕了, 將爾個銀子地垟裏去囥間。難間爾自個東西來東。』26主 人家回答其,話:『爾懶惰個壞奴僕!爾曉得弗是我種間 烏碎我也會去割,弗是我扎間烏碎我也會去收。²⁷介呢,

爾該把我銀子錢店裏去存間,等我來個時候,我自個銀子連利鈿都好馱歸。²⁸ 介呢,爾拉好去奪其箇一千,交付箇有十千主顧。²⁹ 因爲凡百有個主顧,還要加湊撥其,使得有餘;嘸得個主顧,連其所有個也要等其奪勒去。³⁰ 還有箇嘸用個奴僕趕出到外頭黑暗個地方。箇頭有咬勒牙齒啼哭個聲響。』

³¹ "NYING-GO Ng-ts yiu yüong-wô, ta-leh long-tsong sing-jün-go t'in-s dô-kô læ, keh-go z-'eo we zo læ Gyi yüong-wô-go zo-we. ³² Væn-koh-go pah-sing tu we jü-long tao Gyi min-zin læ: Gyi ziu we feng-c'ih liang-'ao-sang, tsing-ziang k'en-yiang cü-kwu feng-c'ih wu-yiang sæn-yiang ka; wu-yiang peh gyi læ jing-siu-pin, sæn-yiang peh gyi læ tsia-siu-pin.

31 「人個兒子有榮華,帶勒攏總聖善個天使大家來, 箇個時候會坐來其榮華個座位。32 萬國個百姓都會聚攏到 其面前來。其就會分出兩號生,正像看羊主顧分出湖羊山 羊介,湖羊撥其來順手邊,山羊撥其來借手邊。

³⁴ "Keh-tsao Wông-ti we teng keh-sing læ Gyi jing-siupin go wô, 'Ng-lah z Ngô Ah-tia coh-foh-go cü-kwu, hao læ tsih-ziu keh we-leh ng-lah dzong k'æ-bih t'in-di be-haotong-go koh, tso ts'æn-nyih. ³⁵ Ing-we Ngô du-kyi, ng-lah peh Ngô ky'üoh; k'eo-k'eh, ng-lah peh Ngô hah; c'ihmeng-kæn, ng-lah siu-liu Ngô; ³⁶ c'ih-poh-go, ng-lah peh Ngô c'ün; sang bing, ng-lah kwu-djôh Ngô; lôh lao-kæn, ng-lah læ k'en-kwu Ngô.' ³⁷ Keh-sing tsing-dzih nying ziu we ing-ky'i, teng Gyi wô, 'Cü, ah-lah kyi-z k'en-kyin Ng du-kyi, peh Ng ky'üoh; 'ôh-tsia k'eo-k'eh, peh Ng hah? 38 Kyi-z k'en-kyin Ng c'ih-meng-kæn, siu-liu Ng; 'ôh-tsia c'ih-poh-go, peh Ng c'ün? ³⁹ Kyi-z k'en-kyin Ng sang bing, 'ôh-tsia lôh lao-kæn, læ k'en-kwu Ng?' 40 Wông-ti ziu we ing-ky'i, teng gyi-lah wô, 'Ngô tsing wô hyiang ng-lah dao, Ngô keh-sing ting siao hyüong-di ziu-z ih-go, ng-lah yiu tosiao hao-c'ü tao gyi, ziu-z yiu to-siao hao-c'ü tao Ngô.'

34 「箇遭皇帝會等箇星來其順手邊個話: 『爾拉是我 阿爹祝福個主顧, 好來接受箇為了爾拉從開闢天地備好東 個國,做產業。³⁵ 因為我肚飢,爾拉撥我喫;口渴,爾拉撥我喝;出門間,爾拉收留我;³⁶ 出膊個,爾拉撥我穿;生病,爾拉顧着我;落牢監,爾拉來看顧我。』³⁷ 箇星正直人就會應起,等其話:『主,阿拉幾時看見爾肚飢,撥爾喫;或者口渴,撥爾喝?³⁸ 幾時看見爾出門間,收留爾;或者出膊個,撥爾穿?³⁹ 幾時看見爾生病,或者落牢監,來看顧爾?』⁴⁰ 皇帝就會應起,等其拉話:『我眞話向爾拉道,我箇星頂小兄弟就是一個,爾拉有多少好處到其,就是有多少好處到我。』

⁴¹ "Keh-tsao yia we teng keh-sing læ tsia-siu-pin go wô, 'Ng-lah be tsiu-mô go cü-kwu, hao li-k'æ Ngô, tao keh we-leh mo-kwe teng gyi ts'a-s be-hao-kæn-go üong-yün ho-li ky'i. ⁴² Ing-we Ngô du-kyi, ng-lah m̆-teh peh Ngô ky'üoh; k'eo-k'eh, ng-lah m̆-teh peh Ngô hah; ⁴³ c'ihmeng-kæn, ng-lah m̆-teh siu-liu Ngô; c'ih-poh-go, ng-lah m̆-teh peh Ngô c'ün; sang bing teng lôh lao-kæn, ng-lah m̆-teh læ k'en-kwu Ngô.' ⁴⁴ Gyi-lah yia we ing-ky'i, teng Gyi wô, 'Cü, ah-lah kyi-z k'en-kyin Ng du-kyi, 'ôh-tsia

k'eo-k'eh, 'ôh-tsia c'ih-meng-kæn, 'ôh-tsia c'ih-poh-go, 'ôh-tsia sang bing, 'ôh-tsia lôh lao-kæn, tu m-teh *læ* konging Ng?' ⁴⁵ Gyi ziu we ing-ky'i, teng gyi-lah wô, 'Ngô tsing wô hyiang ng-lah dao, Keh-sing ting siao cü-kwu ziu-z ih-go, ng-lah yiu to-siao hao-c'ü m-teh tao gyi, ziu-z *yiu to-siao hao-c'ü* m-teh tao Ngô. ⁴⁶ Keh-sing iao tao üong-yün ying-vah-li ky'i; dæn-z keh-sing tsing-dzih nying tao üong-yün weh-ming *ky'i*."

41 「箇遭也會等箇星來借手邊個話:『爾拉被咒罵個主顧,好離開我,到箇為了魔鬼等其差使備好間個永遠火裏去。42 因為我肚飢,爾拉嘸得撥我喫;口渴,爾拉嘸得撥我喝;43 出門間,爾拉嘸得收留我;出膊個,爾拉嘸得撥我穿;生病等落牢監,爾拉嘸得來看顧我。』44 其拉也會應起,等其話:『主,阿拉幾時看見爾肚飢,或者口渴,或者出門間,或者出膊個,或者生病,或者落牢監,都嘸得來供應爾?』45 其就會應起,等其拉話:『我眞話向爾拉道,箇星頂小主顧就是一個,爾拉有多少好處嘸得

到其,就是有多少好處嘸得到我。⁴⁶ 箇星要到永遠刑罰裏 去,但是箇星正直人到永遠活命去。』」

Mt. XXVI.

YIÆ-SU kông-hao keh-sing long-tsong shih-wô, ziu teng Gyi meng-du wô, ² "Ng-lah hyiao-teh tsæ z liang nyih z Yü-yüih-tsih, Nying-go Ng-ts iao song *kwun*, ting læ jih-z-kô-zông."

耶穌講好箇星攏總說話,就等其門徒話:²「爾拉曉得再是兩日是逾越節,人個兒子要送官,釘來十字架上。」

³ Keh-go z-'eo keh-sing tsi-s-deo, doh-shü-nying, teng pah-sing-go tsiang-lao, tu jü-jih-long tao tsi-s-deo kyiao-leh Kæ-üô-fah-go ngô-meng-li; ⁴ siang-liang yüong kyi-kao k'ô Yiæ-su, iao long-sah Gyi. ⁵ Tsih-z wô, "M-nao læ tsih-k'eng nyih, k'ong-p'ô pah-sing iao nao-z."

³ 箇個時候箇星祭司頭、讀書人、等百姓個長老,都聚 集攏到祭司頭叫勒<u>該亞法</u>個衙門裏,⁴ 商量用計較抲<u>耶穌</u>, 要弄煞其。⁵ 只是話:「嘸得好來節肯日,恐怕百姓要鬧 事。」

⁶ YIÆ-SU læ Pah-da-nyi, sang da-mô-fong go Si-meng oh-li læ-kæn: ⁷ yiu ih-go nyü-nying do-leh ting kyü hyiang-yiu tsi-tih-go nyüoh-go 'eh-ts, Yiæ-su zo-zih-go z-'eo, tseo-long-læ tao læ Gyi deo-li. ⁸ Meng-du k'en-kyin, ông-de, z-ka wô, "Keh me-fi-diao tsôh soh? ⁹ Keh-go hyiang-yiu feh-jün hao ma hyü-to dong-din, feng peh gyüong-nying." ¹⁰ Yiæ-su teh-cü, ziu teng gyi-lah wô, "Nglah dza-we long keh-go nyü-nying tæn sing-z? gyi teng Ngô tso-go z ih-yiang hao z-ken. ¹¹ Ing-we ng-lah yiu gyüong-nying dziang-t'ong dô-kô læ-tong; dæn-z m-teh Ngô dziang-t'ong læ-tong. ¹² Gyi keh-go hyiang-yiu tao læ Ngô sing-zông, z we-leh Ngô sông-z tso-go. ¹³ Ngô tsing wô hyiang ng-lah dao, 'En-t'in-'ô feh-leng soh-go di-fông, z yiu keh-go foh-ing djün-k'æ-go, yia pih-ding kông-tao kehgo nyü-nying sô tso-go z-ken, hao peh nying-kô kyi-teh gyi."

⁶ <u>耶</u>穌來<u>伯大尼</u>,生大麻瘋個<u>西門</u>屋裏來間。⁷ 有一個 女人馱勒頂貴香油齒的個玉個盒子,<u>耶</u>穌坐席個時候,走 攏來到來其頭裏。⁸ 門徒看見,快了,是介話:「箇糜費掉 作啥?⁹ 箇個香油弗然好賣許多銅鈿,分撥窮人。」¹⁰ <u>耶穌</u> 得知,就等其拉話:「爾拉咋會弄箇個女人擔心事?其等 我做個是一樣好事幹。¹¹ 因為爾拉有窮人長通大家來東, 但是嘸得我長通來東。¹² 其箇個香油倒來我身上,是為了 我喪事做個。¹³ 我眞話向爾拉道,咸天下弗論啥個地方, 是有箇個福音傳開個,也必定講到箇個女人所做個事幹, 好撥人家記得其。」

¹⁴ Keh-go z-'eo jih-nyi meng-du li-hyiang ih-go, kyiao-leh Kyüô-liah-go Yiu-da, tseo tao keh-sing tsi-s-deo-go u-sen, z-ka wô, ¹⁵ "Ng-lah k'eng peh ngô to-siao, ngô we tsiang Gyi ma peh ng-lah?" Gyi-lah ziu ts'ing sæn-jih-kw'e nying-ts peh gyi. ¹⁶ *Yiu-da* dzong-ts'-ts-'eo zing kyi-we, hao pô Yiæ-su kao-dæ gyi-lah.

- ¹⁴ 箇個時候十二門徒裏向一個,叫勒<u>加略</u>個<u>猶大</u>,走到箇星祭司頭個烏碎,是介話: ¹⁵ 「爾拉肯撥我多少,我會將其賣撥爾拉?」其拉就稱三十塊銀子撥其。 ¹⁶ <u>猶大</u>從此之後尋機會,好把耶穌交代其拉。
- ¹⁷ VU-KAO-TSIH-GO deo-nyih, meng-du tseo-long Yiæ-su-go sing-pin, teng Gyi wô, "Ng iao ah-lah 'ah-li bebæn yü-yüih peh Ng ky'üoh?" ¹⁸ Gyi wô, "Ng-lah tao zing-li mo-nying *oh-li* ky'i, teng gyi wô, 'Sin-sang z-ka wô, Ngôgo z-'eo gying-de; Ngô teng meng-du iao læ ng-go oh-li ko Yü-yüih-tsih." ¹⁹ Meng-du ziu i Yiæ-su feng-fu ka tso, yü-yüih be-hao-kæn.
- ¹⁷無酵節個頭日,門徒走攏<u>耶穌</u>個身邊,等其話:「爾要阿拉何裏備辦逾越撥爾喫?」¹⁸其話:「爾拉到城裏某人屋裏去,等其話:『先生是介話,我個時候近了,我等門徒要來爾個屋裏過逾越節。』」¹⁹門徒就依<u>耶穌</u>吩咐介做,逾越備好間。
- ²⁰ Tao yia-kw'a, Yiæ-su teng jih-nyi meng-du dô-kô zo-zih. ²¹ Gyi-lah ky'üoh-go z-'eo, Yiæ-su z-ka wô, "Ngô

tsing wô hyiang ng-lah dao, Ng-lah cong-nyiang yiu ih-go iao ma-diao Ngô." ²² Gyi-lah do-nyiang iu-meng, ko-tang-ko meng Gyi wô, "Cü, z ngô feh?" ²³ Yiæ-su we-teh wô, "Teng Ngô dô-kô beng-ts-li 'ô-siu-go cü-kwu, z gyi iao ma-diao Ngô. ²⁴ Nying-go Ng-ts nyün-z iao ky'i ziang *Shü-li* sia-lôh ts-tin Gyi ka-go: dæn-z ma-diao Nying-go Ng-ts keh-go cü-kwu yiu 'o-se! keh-go nying feh sang wa-z gyi bin-i." ²⁵ Iao ma-diao Yiæ-su go Yiu-da ing-ky'i, z-ka wô, "Fu-ts, z ngô feh?" *Yiæ-su* teng gyi wô, "Ng wô-djôh-de."

20 到夜快,<u>耶穌</u>等十二門徒大家坐席。²¹ 其拉喫個時候,<u>耶穌</u>是介話:「我眞話向爾拉道,爾拉中央有一個要賣掉我。」²² 其拉大樣憂悶,個打個問其話:「主,是我弗?」²³ <u>耶穌</u>回答話:「等我大家盆子裏下手個主顧,是其要賣掉我。²⁴ 人個兒子原是要去像書裏寫落指點其介個。但是賣掉人個兒子箇個主顧有禍崇!箇個人弗生還是其便宜。」²⁵ 要賣掉<u>耶穌個猶大</u>應起,是介話:「夫子,是我弗?」耶穌等其話:「爾話着了。」

²⁶ Gyi-lah ky'üoh-go z-'eo, Yiæ-su do-leh mun-deo, [1]coh-foh-ts, p'ah-k'æ kao-fu meng-du, z-ka wô, "Ng-lah hao do-leh ky'üoh: keh z Ngô-go kyi-sing." ²⁷ Yi do-leh pets, coh-zia-ts, kao-fu gyi-lah, z-ka wô, "Ng-lah cong-nying tu hao hah: ²⁸ ing-we keh z Ngô-go hyüih, ziu-z sing-iahgo hyüih, we-leh hyü-to" nying liu-c'ih-læ, hao sô-diao ze go. ²⁹ Ngô wô hyiang ng-lah dao, Dzong-kying-yi-'eo Ngô feh tsæ ky'üoh keh-go bu-dao tsiu, ih-dzih teng-tao Ngô teng ng-lah dô-kô læ Ngô Ah-tia-go koh-li ky'üoh sing tsiu z-'eo."

²⁶ 其拉喫個時候,<u>耶穌</u> 馱勒饅頭,祝福仔^[1],脈開交付門徒,是介話:「爾拉好馱勒喫,箇是我個肌身。」²⁷ 又馱勒杯子,祝謝仔,交付其拉,是介話:「爾拉衆人都好喝,²⁸ 因為箇是我個血,就是新約個血,為了许多人流出來,好赦掉罪個。²⁹ 我話向爾拉道,從今以後我弗再喫箇個葡萄酒,一直等到我等爾拉大家來我阿爹個國裏喫新酒時候。」

[1]Yiu-teh Hyi-lah kwu-kyün wô, coh-zia-ts: k'en Mk. 6. 41. 有得<u>希</u> 臘古卷話,祝謝仔。看 Mk. 6. 41. (原註)

³⁰ [1]Sing-s ts'ông-hao, gyi-lah tseo-c'ih tao Ken-læn sæn ky'i. Keh-tsao Yiæ-su teng gyi-lah wô, ³¹ "Kyih-mih yia-tao, ng-lah cong-nying tu we in-tseng ky'i-diao Ngô: ing-we Shü-li yiu sia-lôh-tih, wô, 'Ngô we tang K'en-yianggo Nying, keh-dziao yiang ziu we sæn-k'æ.' [Sk. 13. 7.] ³² Dæn-z Ngô weh-cün-læ 'eo-deo, we sin-jü ng-lah tao Kyüô-li-li ky'i." 33 Pe-teh we-teh Gyi, wô, "Ziu-z congnying tu in-tseng ky'i-diao Ng, ngô üong feh we in-tseng ky'i-diao Ng." 34 Yiæ-su teng gyi wô, "Ngô tsing wô hyiang ng dao, Kyih-mih yia-tao, kyi feh-zing di-go zin-deo, ng we sæn-tsao feh tsiao-jing Ngô." ³⁵ Pe-teh teng Gyi wô, "Ngô ziu-z kyiao-leh teng Ng dô-kô si, yia tsæ-ve feh tsiao-jing." Cong meng-du yia z-ka wô.

30 聖詩^[1]唱好,其拉走出到橄欖山去。箇遭<u>耶穌</u>等其 拉話: ³¹ 「今末夜到,爾拉衆人都會嫌憎棄掉我。因為書 裏有寫落的,話:『我會打看羊個人,箇潮羊就會散 開。』[Sk. 13. 7.] ³² 但是我活轉來後頭,會先如爾拉到<u>加利</u>利去。」 ³³ 彼得回答其,話:「就是衆人都嫌憎棄掉爾,我永弗會嫌憎棄掉爾。」 ³⁴ 耶穌等其話:「我眞話向爾道,今末夜到,雞弗曾啼個前頭,爾會三遭弗招認我。」 ³⁵ 彼得等其話:「我就是叫勒等爾大家死,也再繪弗招認。」衆門徒也是介話。

[1] 'Ôh-tsia wô, tsæn-me-s. 或者話, 讚美詩。(原註)

³⁶ KEH-TSAO Yiæ-su teng gyi-lah dô-kô tao ih-t'ah difông kyiao-leh K'eh-si-mô-nyi; ziu teng meng-du wô, "Ngô keh-deo ky'i tao-kao; ng-lah zo-leh dông-deo teng-tong."

36 箇遭<u>耶穌</u>等其拉大家到一埭地方叫勒<u>客西馬尼</u>,就等門徒話:「我箇頭去禱告,爾拉坐勒蕩頭等東。」

³⁷ Ziu ta-leh Pe-teh teng Si-pi-t'a-go liang ng-ts dô-kô ky'i, *sing-li* ziu iu-meng pe-shông-ky'i-læ-de. ³⁶ Keh-tsao teng gyi-lah wô, "Ngô-go sing do-nyiang iu-meng tao si-go din-di: ng-lah hao dông-deo læ-tong, teng Ngô dô-kô kying-sing."

37 就帶勒<u>彼得</u>等<u>西庇太</u>個兩兒子大家去,心裏就憂悶悲傷起來了。³⁸ 箇遭等其拉話:「我個心大樣憂悶到死個田地。爾拉好蕩頭來東,等我大家警醒。」

³⁹ Ziu tsing-kyʻi ih-ngæn, pʻoh-tao gyiu-gyiu, z-ka wô, "Ngô-go Ah-tia, ziah-z hao-s-teh, peh keh-go pe-ts li-kʻæ Ngô kyʻi: se-tsih ka-go, m-teh hao ze Ngô-go cü-i, tsong z ze Ng-go *cü-i*." ⁴⁰ Tseo tao meng-du u-sen læ, kʻen-kyin gyi-lah kwʻeng-joh-tih; ziu teng Pe-teh wô, "Ng-lah ka feh neng-keo teng Ngô dô-kô kying-sing ih tin-cong kong-fu ma? ⁴¹ "Yüong kying-sing, tao-kao; sæn-leh tseo-tsing mi-'ôh li-hyiang kyʻi. Ling-sing z dzing-nyün-go, tsih-z nyüoh-sing nyün-ziah."

³⁹ 就進去一眼,撲倒求求,是介話:「我個阿爹,若是好使得,撥箇個杯子離開我去。雖即介個,嘸得好隨我個主意,總是隨爾個主意。」⁴⁰ 走到門徒烏碎來,看見其拉睏熟的,就等<u>彼得</u>話:「爾拉介弗能夠等我大家警醒一點鐘工夫嗎?⁴¹ 用警醒,禱告,省勒走進迷惑裏向去。靈性是情願個,只是肉身軟弱。」

⁴² Di-nyi-vah yi kyʻi tao-kao, z-ka wô, "Ngô-go Ah-tia, ziah-z Ngô pih iao kyʻüoh keh-go pe-ts, ——peh gyi li-kʻæ Ngô kyʻi ziah s-feh-teh-go, ——ka-ni, hao tsiao Ng-go ts-i tso-dzing." ⁴³ Tseo-læ, kʻen-kyin gyi-lah yi kwʻeng-joh-tih: ing-we gyi-lah ngæn-tsing mi-long-kyʻi-de.

42 第二伐又去禱告,是介話:「我個阿爹,若是我必要喫箇個杯子,——撥其離開我去若使弗得個,——介呢,好照爾個旨意做成。」⁴³ 走來,看見其拉又睏熟的,因為其拉眼睛眯攏去了。

⁴⁴ Ziu li-k'æ gyi-lah, tsæ ky'i, di-sæn-tsao tso tao-kao, yia z-ka wô-fah. ⁴⁵ Keh-tsao tao meng-du u-sen læ, teng gyi-lah wô, "Yi-'eo ze ng-lah kw'eng-joh, tsiang-sih: z-'eo gying-de; Nying-go Ng-ts iao kao-dæ ze-nying-go siu-li de. ⁴⁶ Bô-ky'i, ah-lah yüong ky'i-de: ma Ngô cü-kwu gying-long-læ-de."

⁴⁴ 就離開其拉,再去,第三遭做禱告,也是介話法。 ⁴⁵ 箇遭到門徒烏碎來,等其拉話:「以後隨爾拉睏熟,將 息。時候近了,人個兒子要交代罪人個手裏了。⁴⁶ 爬起, 阿拉用去了。賣我主顧近攏來了。」

⁴⁷ GYI wa læ-tih kông-go z-'eo, jih-nyi meng-du lihyiang ih-go *kyiao-leh* Yiu-da læ-de, wa-yiu ih-do-dziao nying ta-leh tao teng kweng-ts, dzong tsi-s-deo teng pahsing-go tsiang-lao u-sen, teng Yiu-da dô-kô læ. ⁴⁸ Ma Gyi diao-go cü-kwu yi-kying peh gyi-lah ih-go en-'ao, z-ka wô, "Ngô teng Gyi hyüong-cü-go, ziu-z: ng-lah hao k'ô Gyi." ⁴⁹ Ze-siu tseo-long Yiæ-su-go sing-pin, wô, "Fu-ts, ts'ing en!" ziu teng Gyi hyüong-cü. ⁵⁰ Yiæ-su teng gyi wô, "Beng-yiu, ng we soh-go z-ken læ?" Keh-tsao gyi-lah tseo-long-læ, 'ô-siu k'ô Yiæ-su.

47 其還來的講個時候,十二門徒裏向一個叫勒<u>猶大</u>來了,還有一大潮人帶勒刀等棍子,從祭司頭等百姓個長老島碎,等<u>猶大</u>大家來。⁴⁸ 賣其掉個主顧已經撥其拉一個暗號,是介話:「我等其嗅嘴個,就是。爾拉好抲其。」⁴⁹ 隨手走攏耶穌個身邊,話:「夫子,請安!」就等其嗅

嘴。⁵⁰ 耶穌等其話:「朋友,爾爲啥個事幹來?」箇遭其 拉走攏來,下手抲耶穌。

⁵¹ Yiæ-su sing-pin yiu ih-go nying dong-siu bah-c'ih tao læ, tsæn tsi-s-deo-go nu-boh, siah-lôh gyi ng-to. ⁵² Keh-tsao Yiæ-su teng gyi wô, "Ng-go tao siu-tsing tao-k'ôh-li: væn-pah do-leh tao *tsæn-go* cü-kwu iao be tao tsæn-sah. ⁵³ Ng tao feh ts'eng Ngô yin-dzæ hao gyiu Ngô-go Ah-tia, Gyi ziu we ts'a to-jü jih-nyi ying t'in-s læ pông-dzu Ngô ma! ⁵⁴ Ziah-z ka, Sing-shü sô wô, keh-go z-ken pih-ding yiu-go, *keh-go shih-wô* dza-we ing-leh-læ ni?"

51 <u>耶穌</u>身邊有一個人動手拔出刀來,斬祭司頭個奴僕,削落其耳朵。52 箇遭<u>耶穌</u>等其話:「爾個刀收進刀殼裏,凡百馱勒刀斬個主顧要被刀斬煞。53 爾倒弗忖我現在好求我個阿爹,其就會差多如十二營天使來幫助我嗎!54 若是介,聖書所話,箇個事幹必定有個,箇個說話咋會應勒來呢?」

⁵⁵ Keh-go z-'eo Yiæ-su teng keh-dziao nying wô, "Ng-lah tseo-c'ih-læ, dza-we do-leh tao teng kweng-ts læ k'ô

Ngô, ziang k'ô gyiang-dao ka? Ngô nyih-nyih læ sing-din-li zo-leh ng-lah-go cong-nyiang kông dao-li, ng-lah feh k'ô Ngô. ⁵⁶ Dæn-z keh-sing z-ken tu z-ka tso-fah, hao s-teh sin-cü-nying shü-li-go shih-wô yiu yiao-nyiæn." Keh-tsao meng-du tu li-k'æ Gyi dao-tseo-de.

55 箇個時候<u>耶穌</u>等箇潮人話:「爾拉走出來,咋會馱勒刀等棍子來抲我,像抲強盜介?我日日來聖殿裏坐勒爾拉個中央講道理,爾拉弗抲我。56 但是箇星事幹都是介做法,好使得先知人書裏個說話有效驗。」箇遭門徒都離開其逃走了。

⁵⁷ K'ô Yiæ-su go cü-kwu ta-leh Gyi tao tsi-s-deo Kæ-üô-fah-go *ngô-meng-li*, ziu-z doh-shü-nying teng tsiang-lao jü-long-kæn u-sen. ⁵⁸ Pe-teh yün-yün keng-leh Gyi ih-dzih tao tsi-s-deo ngô-meng-li; ziu tseo-tsing li-hyiang ky'i, teng ts'a-nying dô-kô zo-lôh, iao k'en-k'en keh-go *z-ken* dza-go kyih-gyüoh.

57 <u>河耶穌</u>個主顧帶勒其到祭司頭<u>該亞法</u>個衙門裏,就 是讀書人等長老聚攏間烏碎。⁵⁸ 彼得遠遠跟勒其一直到祭 司頭衙門裏,就走進裏向去,等差人大家坐落,要看看箇 個事幹咋個結局。

⁵⁹ Keh-sing tsi-s-deo tsiang-lao teng djün kong-we tu iao zing kô te-tsing læ kao Yiæ-su, hao bæn Gyi si-ze; ⁶⁰ tsih-z zing-feh-djôh: se-tsih yiu hyü-to tso kô te-tsing cü-kwu læ, dzing-gyiu zing-feh-djôh. 'Eo-deo yiu liang-go tso kô te-tsing cü-kwu læ, z-ka wô, "Keh-go nying wô, 'Ngô neng-keo hwe-diao Jing-ming-go din, sæn nyih li-deo tsæ ky'i gyi hao."

59 箇星祭司頭長老等全公會都要尋假對證來告<u>耶穌</u>,好辦其死罪,⁶⁰ 只是尋弗着。雖即有許多做假對證主顧來,仍舊尋弗着。後頭有兩個做假對證主顧來,是介話:「箇個人話:『我能夠毀掉神明個殿,三日裏頭再起其好。』」

⁶² Tsi-s-deo lih-ky'i-læ, teng Gyi wô, "Ng ih-kyü tu feh we-teh ma? Gyi-lah tso te-tsing kao Ng go z-ken tao-ti dza-go?" ⁶³ Yiæ-su feh hyiang. Tsi-s-deo yi k'æ k'eo, teng Gyi wô, "Ngô feng-fu Ng ts-tin keh-we weh-go Jing-ming vah-

tsiu wô hyiang ah-lah dao, Ng tao-ti z Kyi-toh, Jing-ming-go Ng-ts feh?" ⁶⁴ Yiæ-su teng gyi wô, "Ng wô-djôh-de: Ngô wa-yiu wô hyiang ng-lah dao, Dzong-kying-yi-'eo ng-lah we k'en-kyin Nying-go Ng-ts zo læ yiu neng-ken Cü-kwu-go jing-siu-pin, yi dzing-leh t'in-li-go yüing ka læ."

62 祭司頭立起來,等其話:「爾一句都弗回答嗎?其 拉做對證告爾個事幹到底咋個?」63 <u>耶穌</u>弗響。祭司頭又 開口,等其話:「我吩咐爾指點箇位活個神明罰咒話向阿 拉道,爾到底是<u>基督</u>,神明個兒子弗?」64 <u>耶穌</u>等其話: 「爾話着了。我還有話向爾拉道,從今以後爾拉會看見人 個兒子坐來有能幹主顧個順手邊,又成勒天裏個雲介 來。」

⁶⁵ Keh-tsao tsi-s-deo c'ô-k'æ zi-go i-zông, z-ka wô, "Gyi kông sih-doh-go shih-wô; ah-lah 'o-yüong bih-nyinggo te-tsing? Gyi sih-doh-go shih-wô næn-kæn ng-lah z t'ing-meng-de. ⁶⁶ Ng-lah-go i-s dza-go?" Gyi-lah we-teh, z-ka wô, "Gyi z væn-djôh si-ze." ⁶⁷ Keh-tsao gyi-lah zæn-t'u t'u Gyi-go min-k'ong, gyün-deo k'ao Gyi; yiu-sing ^[1]siu

kwah Gyi, z-ka wô, ⁶⁸ "Kyi-toh, ts'ia kông-kông sin-cü shih-wô, wô tang Ng go cü-kwu z jü?"

65 箇遭祭司頭扯開自個衣裳,是介話:「其講褻瀆個 說話,阿拉何用別人個對證?其褻瀆個說話難間爾拉是聽 聞了。66 爾拉個意思咋個?」其拉回答,是介話:「其是 犯着死罪。」67 箇遭其拉饞唾吐其個面孔,拳頭敲其,有 星手摑其^[1],是介話:⁶⁸ 「<u>基督</u>,且講講先知說話,話打 爾個主顧是誰?」

[1] 'Ôh-tsia wô, pin-ts tang-Gyi. 或者話, 鞭子打其。(原註)

⁶⁹ Pe-teh læ nga-deo, ming-dông-li zo-kæn, yiu ih-go ô-deo tseo-læ, teng gyi wô, "Ng yia z teng Kyüô-li-li Yiæ-su dong-de-go." ⁷⁰ Pe-teh læ cong-nying min-zin feh tsiao-jing, z-ka wô, "Ng-go shih-wô dza-go, ngô feh hyiao-teh." ⁷¹ Pe-teh tseo-c'ih tao meng-k'eo, yi yiu ih-go ô-deo k'en-kyin gyi, teng keh-sing læ-kæn-go nying wô, "Keh-go nying yia z teng Nô-sah-leh Yiæ-su dong-de-go." ⁷² Pe-teh ziu vah ih-go tsiu, di-nyi-tsao feh tsiao-jing, wô, "Ngô feh nying-teh keh-go nying." ⁷³ Ko-leh ih-zông, keh-sing lih-

tong-go nying tseo-læ, teng Pe-teh wô, "Ng yia jih-dzæ z gyi-lah tso-de nying; ng-go k'eo-ing z bin-leh ng c'ih." ⁷⁴ Keh-tsao *Pe-teh* vah zing-do-tsiu, wô, "Ngô feh nying-teh keh-go nying." Kyi ziu lih-k'eh di-de. ⁷⁵ Pe-teh ziu kyi-teh-tao Yiæ-su teng gyi kông-ko-go shih-wô, "Kyi feh-zing di-go zin-deo, ng we sæn-tsao feh tsiao-jing Ngô:" ziu tseo-c'ih nga-deo, k'oh-leh sông-sing.

69 彼得來外頭,明堂裏坐間,有一個丫頭走來,等其 話:「爾也是等加利利耶穌同隊個。」70 彼得來衆人面前 弗招認,是介話:「爾個說話咋個,我弗曉得。」⁷¹ 彼得 走出到門口,又有一個丫頭看見其,等箇星來間個人話: 「箇個人也是等拿撒勒耶穌同隊個。」72 彼得就罰一個 咒,第二遭弗招認,話:「我弗認得箇個人。」⁷³過了一 晌, 箇星立東個人走來, 等彼得話: 「爾也實在是其拉做 隊人,爾個口音是辨勒爾出。」⁷⁴ 箇遭彼得罰甚大咒, 「我弗認得箇個人。」雞就立刻啼了。⁷⁵ 彼得就記得 話: 到耶穌等其講過個說話,「雞弗會啼個前頭,爾會三遭弗 招認我。」就走出外頭, 哭勒傷心。

Mt. XXVII.

TAO-LEH t'in-nyiang, cong tsi-s-deo teng pah-sing-go tsiang-lao tu siang-liang iao bæn Yiæ-su si-ze. ² Ziu bo-ts ta-c'ih-ky'i, ka peh tsong-toh Peng-tiu Pe-lah-to.

到了天亮,衆祭司頭等百姓個長老都商量要辦<u>耶穌</u>死 罪。² 就縛仔帶出去,解撥總督本丟·彼拉多。

³ Keh-go z-'eo ma Yiæ-su go Yiu-da, k'en-kyin Gyi ze ding-jih, ziu ao-hwe, do-leh keh sæn-jih-kw'e nying-ts ky'i wæn keh-sing tsi-s-deo tsiang-lao, z-ka wô, ⁴ "Ngô ma m-ze Cü-kwu-go hyüih, yiu ze-ko." Gyi-lah wô, "Yü ah-lah soh-go siang-ken? ng-zi ky'i dzing-tông." ⁵ Yiu-da nying-ts k'ang læ *sing*-din-li, tseo-c'ih, ziu ky'i tiao-sah-de.

³ 箇個時候賣<u>耶穌個猶大</u>,看見其罪定實,就懊悔,馱 勒箇三十塊銀子去還箇星祭司頭長老,是介話: ⁴ 「我賣嘸 罪主顧個血,有罪過。」其拉話:「與阿拉啥個相干?爾 自去承當。」⁵ 猶大銀子揞來聖殿裏,走出,就去吊煞了。 ⁶ Keh-sing tsi-s-deo do-leh nying-ts, wô, "Keh kyi-jün z ma-hyüih-go kô-din, feh ing-kæ tiu læ nying-kw'u-li." ⁷ Ziu dô-kô siang-liang, pô nying-ts ky'i ma siao-yiao-go din, hao en-tsông c'ih-meng-go nying. ⁸ Sô-yi keh-go din tao jü-kying eo gyi z "Hyüih-din." ⁹ Keh-tsao sin-cü Yiæ-limi sô kông-go shih-wô yiu yiao-nyiæn, z-ka wô, "Gyi-lah do-leh keh sæn-jih-k'we nying-ts, ziu-z be z-dzih-kwu-kô cü-kwu-go kô-din, Yi-seh-lih nying sô kong-kwu-go; ¹⁰ yi do-c'ih-ky'i ma siao-yiao-go din, tsiao Cü sô feng-fu ngô." [Sk. 11. 13.]

⁶ 箇星祭司頭馱勒銀子,話:「箇既然是賣血個價鈿, 弗應該丟來銀庫裏。」⁷ 就大家商量,把銀子去買燒窯個 田,好安葬出門個人。⁸ 所以箇個田到如今謳其是「血 田」。⁹ 箇遭先知<u>耶利米</u>所講個說話有效驗,是介話:「其 拉馱勒箇三十塊銀子,就是被市值估價主顧個價鈿,<u>以色</u> 列人所公估個。¹⁰ 又馱出去買燒窯個田,照主所吩咐 我。」[Sk. 11. 13.] ¹¹ YIÆ-SU lih læ tsong-toh min-zin: tsong-toh meng Gyi wô, "Ng z Yiu-t'a; nying-go Wông-ti feh?" Yiæ-su teng gyi wô, "Ng wô-djôh-de." ¹² Keh-sing tsi-s-deo teng tsiang-lao kao Yiæ-su z-'eo, Gyi ih-ngæn feh, ing. ¹³ Keh-tsao Pelah-to! teng Gyi wô, "Gyi-lah yiu to-siao en-gyin tso tetsing kao Ng, Ng soh feh t'ing-meng ma?" ¹⁴ Yiæ-su ziu-z ih-yiang en-gyin tu feh we-teh gyi; s-teh tsong-toh donyiang hyi-gyi.

11 <u>耶穌</u>立來總督面前,總督問其話:「爾是<u>猶太</u>人個皇帝弗?」<u>耶穌</u>等其話:「爾話着了。」¹² 箇星祭司頭等長老告<u>耶穌</u>時候,其一眼弗應。¹³ 箇遭<u>彼拉多</u>等其話:「其拉有多少案件做對證告爾,爾啥弗聽聞嗎?」¹⁴ <u>耶穌</u>就是一樣案件都弗回答其,使得總督大樣稀奇。

¹⁵ Tao tsih-k'eng-go *nyih-ts*, tsong-toh lao kwe-kyü iao fông ih-go væn-nying peh pah-sing, ze gyi-lah iao jü. ¹⁶ Keh-go z-'eo gyi-lah yiu ih-go yiu-ming-go væn-nying, kyiao-leh Pô-lah-pô. ¹⁷ Pah-sing jü-long-tong z-'eo, Pe-lah-to teng gyi-lah wô, "Ng-lah iao ngô fông 'ah-li ih-go peh

ng-lah? wa-z Pô-lah-pô, wa-z Yiæ-su kyiao-leh Kyi-toh?" ¹⁸ Ing-we hyiao-teh z we-leh kyʻi Gyi feh-ko, ka Gyi zông-læ-go.

15 到節肯個日子,總督老規矩要放一個犯人撥百姓, 隨其拉要如。¹⁶ 箇個時候其拉有一個有名個犯人,叫勒巴 拉巴。¹⁷ 百姓聚攏東時候,<u>彼拉多</u>等其拉話:「爾拉要我 放何裏一個撥爾拉?還是<u>巴拉巴</u>,還是<u>耶穌</u>叫勒<u>基督</u>?」¹⁸ 因為曉得是為了氣其弗過,解其上來個。

- ¹⁹ Tsong-toh zo dông z-'eo, gyi-go lao-nyüing ts'a nying tao gyi u-sen læ, z-ka wô, "Keh tsing-dzih Nying-go z-ken m-nao ky'i kwun-tsiang: ing-we ngô kyih-mih mong li-hyiang we-leh Gyi ky'üoh hyü-to kw'u-deo."
- 19 總督坐堂時候,其個老嬝差人到其烏碎來,是介話:「箇正直人個事幹嘸得好去管賬,因為我今末夢裏向為了其喫許多苦頭。」
- ²⁰ Keh-sing tsi-s-deo teng; tsiang-lao ts'ön-teh kehdziao nying, hao t'ao Pô-lah-pô, djü-mih Yiæ-su. ²¹ Tsong-

toh we-teh gyi-lah, wô, "Keh liang-go, iao ngô fông 'ah-li ih-go peh ng-lah?" Gyi-lah wô, "Pô-lah-pô." ²² Pe-lah-to teng gyi-lah wô, "Ka-ni, Yiæ-su kyiao-leh Kyi-toh, ngô kæ dza bæn Gyi?" Cong-nying wô, "Hao ting Gyi læ jih-z-kô-zông." ²³ Tsong-toh wô, "Gyi tso soh-go ôh z-ken?" Gyi-lah yüih-fah eo-leh hyiang, wô, "Ting Gyi læ jih-z-kô-zông."

²⁰ 箇星祭司頭等長老攛掇箇潮人,好討<u>巴拉巴</u>,除滅<u>耶穌</u>。²¹ 總督回答其拉,話:「箇兩個,要我放何裏一個撥爾拉?」其拉話:「<u>巴拉巴</u>。」²² <u>彼拉多</u>等其拉話:「介呢,<u>耶穌</u>叫勒<u>基督</u>,我該咋辦其?」衆人話:「好釘其來十字架上。」²³ 總督話:「其做啥個惡事幹?」其拉越發謳勒響,話:「釘其來十字架上。」

²⁴ Pe-lah-to hyiao-teh z m-shih-fah, *pah-sing* fæn-hyiang yü-kô nao-z; ziu do-leh shü, læ keh-dziao nying min-zin gyiang-gyiang siu, z-ka wô, "*Liu-c'ih* keh tsing-dzih Nying-go hyüih, ngô z m-ze: ng-lah zi ky'i dzing-tông." ²⁵ Cong pah-sing we-teh wô, "Gyi-go hyüih hao kwe peh ah-lah teng ah-lah ts-seng." ²⁶ Keh-tsao fông Pô-lah-

pô peh gyi-lah; yüong pin-ts tang Yiæ-su, ziu kao-dæ gyi-lah ky'i ting Gyi læ jih-z-kô-zông.

24 <u>他拉多</u>曉得是嘸設法,百姓反響愈加鬧事。就馱勒水,來箇潮人面前滰滰手,是介話:「流出箇正直人個血,我是嘸罪。爾拉自去承當。」²⁵ 衆百姓回答話:「其個血好歸撥阿拉等阿拉子孫。」²⁶ 箇遭放<u>巴拉巴</u>撥其拉。用鞭子打耶穌,就交代其拉去釘其來十字架上。

²⁷ KEH-TSAO tsong-toh-go ping ta Yiæ-su tao ^[1]kwunt'ing-li, eo-long 'eh-ying-go ping læ *c'ü-siao* Gyi. ²⁸ Ziu poh-diao Gyi i-zông, do-leh 'ong-bao p'i Gyi; ²⁹ ts' pin-c'ih ih-ting bing-t'in-kwun, ta læ Gyi deo-li; yi peh Gyi jingtsah siu do ih-keng lu-ken; ziu gyü-lôh Gyi min-zin, c'ü-siao Gyi, wô, "Yiu-t'a nying-go Wông-ti, kong-hyi!" ³⁰ Yi zæn-t'u t'u Gyi, do-leh keh-keng lu-ken tang Gyi deo. ³¹ C'ü-siao-hao-ts, poh-diao *'ong*-bao, *dzing-gyiu* peh Gyi c'ün Zi-go i-zông; ziu t'o-c'ih-ky'i ting Gyi læ jih-z-kô-zông.

- ²⁷ 箇遭總督個兵帶<u>耶穌</u>到官廳裏^[1], 謳攏合營個兵來取笑其。²⁸ 就剝掉其衣裳,馱勒紅袍披其,²⁹ 刺編出一頂平天冠,戴來其頭裏,又撥其順隻手馱一根蘆竿。就跪落其面前,取笑其,話:「<u>猶太</u>人個皇帝,恭喜!」³⁰ 又饞唾吐其,馱勒箇根蘆竿打其頭。³¹ 取笑好仔,剝掉紅袍,仍舊撥其穿自個衣裳,就拖出去釘其來十字架上。
 - [1] 'Ôh-tsia wô, wông-kong-li. 或者話, 皇宮裏。(原註)
- ³² Gyi-lah tseo-c'ih-ky'i, p'ong-djôh ih-go Kwu-li-næ nying, ming-z kyiao-leh Si-meng; ziu ngang-k'ô gyi pe Yiæ-su-go jih-z-kô.
- 32 其拉走出去,碰着一個<u>古利奈</u>人,名字叫勒<u>西門</u>, 就硬抲其背耶穌個十字架。
- ³³ TSEO tao ih-t'ah di-fông kyiao-leh Kôh-kôh-t'a, ziu-z 'kw'u-lu-deo u-sen' ka-shih, ³⁴ ziu do-leh yiu kw'u-tæn 'o-tih-go sön-tsiu peh Gyi ky'üoh: Gyi ih zông-djôh, feh k'eng ky'üoh. ³⁵ Ting-zông jih-z-kô ts-'eo, gyi-lah ts'eh ts-meh-den dô-kô feng Gyi i-zông; hao s-teh keh sin-cü-

nying kông-ko-liao shih-wô yiu yiao-nyiæn, z-ka wô, "Ngô nga-deo i-zông gyi-lah dô-kô feng-k'æ; we-leh Ngô li-deo i-zông gyi-lah ts'eh ts-meh-den." [S. 22. 18.] ³⁶ *Keh-sing ping* zo-ts kwun-kæn. ³⁷ Læ Gyi deo-zông t'iah *ih-da* yiu Gyi ze-ming sia-tih-go *diao-ts*, ziu-z wô, "KEH Z YIÆ-SU, YIU-T'A NYING-GO WÔNG-TI."

- 33 走到一埭地方叫勒<u>各各他</u>,就是『骷顱頭烏碎』解 說,³⁴ 就馱勒有苦膽和的個酸酒撥其喫。其一嘗着,弗肯 喫。³⁵ 釘上十字架之後,其拉撮指末頭大家分其衣裳,³⁶ 好使得箇先知人講過了說話有效驗,是介話:「我外頭衣 裳其拉大家分開,為了我裏頭衣裳其拉撮指末頭。」[S. 22. 18.] 箇星兵坐仔管間。³⁷ 來其頭上貼一埭有其罪名寫的個 條子,就是話:「箇是耶穌,猶太人個皇帝。」
- ³⁸ Keh-go z-'eo yiu liang-go gyiang-dao teng Gyi dong-de ting læ jih-z-kô-zông, ih-go læ jing-siu-pin, ih-go læ tsia-siu-pin.
- ³⁸ 箇個時候有兩個強盜等其同隊釘來十字架上,一個來順手邊,一個來借手邊。

³⁹ Tseo-ko-go cü-kwu deo yiao-yiao, sih-doh Gyi, z-ka wô, ⁴⁰ "Ng z we hwe-diao sing-din, sæn nyih kong-fu tsæ ky'i-hao Cü-kwu, næn-kæn hao Zi kyiu Zi. Ng ziah z Jingming-go Ng-ts, dzong jih-z-kô hao tseo-lôh-læ." 41 Kehsing tsi-s-deo doh-shü-nying teng tsiang-lao yia z-ka læ-tih tsao-siao Gyi, wô, ⁴² "Gyi yiu bih-nying kyiu-ko-de, feh neng-keo kyiu Zi. Gyi ziah z Yi-seh-lih-go Wông-ti, nænkæn dzong jih-z-kô hao tseo-lôh, ah-lah ziu we siang-sing Gyi. ⁴³ Gyi z k'ao-djôh Jing-ming; Jing-ming ziah-z hwunhyi Gyi, næn-kæn kæ læ kyiu Gyi: ing-we Gyi wô, 'Ngô z Jing-ming-go Ng-ts." 44 Teng Gyi dong-de ting-kæn-go gyiang-dao yia z tso-yiang shih-wô zôh-mô Gyi.

39 走過個主顧頭搖搖,褻瀆其,是介話: 40 「爾是會 毀掉聖殿,三日工夫再起好主顧,難問好自救自。爾若是 神明個兒子,從十字架好走落來。」 41 箇星祭司頭讀書人 等長老也是介來的嘲笑其,話: 42 「其有別人救過了,弗 能夠救自。其若是<u>以色列</u>個皇帝,難問從十字架好走落, 阿拉就會相信其。 43 其是靠着神明,神明若是歡喜其,難 間該來救其,因為其話:『我是神明個兒子。』」⁴⁴ 等其同隊釘間個強盜也是做樣說話警罵其。

⁴⁵ Dzong jih-nyi tin-cong tao sæn tin-cong, pin-di tu heh-en. ⁴⁶ Mao sæn tin-cong, Yiæ-su do-do sing-hyiang eo-ky'i-læ, wô, "Yi-li! Yi-li! lah-mô sah-bah-da-nyi?" ziu-z wô, "Ngô-go Jing-ming! Ngô-go Jing-ming! dza-we ky'i-diao Ngô?" [S. 22.1.] ⁴⁷ Yiu-sing keh-deo lih-kæn-go nying t'ing-meng, z-ka wô, "Keh-go nying læ-tih eo Yi-li-üô." ⁴⁸ Nen-cong yiu ih-go nying ze-siu peng-ky'i, do-leh hæ-min-hwô, ts'u seng-t'eo-ts, c'oh læ lu-ken-li, peh Gyi ky'üoh. ⁴⁹ Yü-to z-ka wô, "Vong-de; ah-lah ts'ia k'en Yi-li-üô we læ kyiu Gyi feh?"

45 從十二點鐘到三點鐘, 遍地都黑暗。46 毛三點鐘, 耶穌大大聲響謳起來, 話:「以利!以利!拉馬撒白大尼?」就是話:「我個神明!我個神明!咋會棄掉我?」47 有星箇頭立間個人聽聞, 是介話:「箇個人來的謳<u>以利</u>亞。」48 內中有一個人隨手奔起, 馱勒海綿花, 醋滲透

- 任,戳來蘆竿裏,撥其喫。⁴⁹ 餘多是介話:「甮了。阿拉 且看以利亞會來救其弗?」
- ⁵⁰ Yiæ-su yi do-do sing-hyiang eo ih-sing, ky'i ziu dön-de.
 - 50 耶穌又大大聲響謳一聲,氣就斷了。
- ⁵¹ Sing-din-li-go mun-tsiang zông-'ô te-lih-k'æ, diyiang cing-dong, zah-deo lih-k'æ: ⁵² veng-mo k'æ-k'æ; hyü-to kw'eng-kæn sing-nying-go p'oh-s yi bô-ky'i, dzong veng-li ka tseo-c'ih-læ, teng Yiæ-su weh-cün-læ ts-'eo tseo-tsing sing-dzing-li, yin-c'ih-læ peh hyü-to nying k'en.
- 51 聖殿裏個縵帳上下的裂開,地垟震動,石頭裂開, 52 墳墓開開,許多睏間聖人個魄屍又爬起,從墳裏介走出 來,等耶穌活轉來之後走進聖城裏,現出來撥許多人看。
- ⁵⁴ Pah-tsong teng gyi dong-de kwun Yiæ-su go cükwu, k'en-kyin di-cing teng keh-sing *bih-nyiang-kao* z-ken, do-nyiang p'ô-ky'i-læ, z-ka wô, "Keh jih-dzæ z Jing-minggo Ng-ts."

54 百總等其同隊管<u>耶穌</u>個主顧,看見地震等箇星別樣告事幹,大樣怕起來,是介話:「箇實在是神明個兒子。」

⁵⁵ Keh-deo yiu hyü-to nyü-nying yün-yün k'en-kæn, ziu-z dzong Kyüô-li-li keng-leh Yiæ-su kong-ing Gyi go cü-kwu. ⁵⁶ Nen-cong yiu Meh-da-lah-go Mô-li-üô, Yüô-kôh teng Iah-si-go ah-nyiang Mô-li-üô, wa-yiu Si-pi-t'a ng-ts-go ah-nyiang.

55 箇頭有許多女人遠遠看間,就是從<u>加利利</u>跟勒<u>耶穌</u>供應其個主顧。56 內中有<u>抹大拉個馬利亞</u>,雅各等約西個阿孃馬利亞,還有西庇太兒子個阿孃。

⁵⁷ TAO yia-kwʻa, yiu ih-go yiu-lao tseo-læ, z Üô-li-mô-tʻa nying, ming-z kyiao-leh Iah-seh, yia z tso Yiæ-su meng-du go: ⁵⁸ gyi læ kyin Pe-lah-to, tʻao Yiæ-su-go s-siu. Pe-lah-to ziu feng-fu pô s-siu kao-dæ *gyi*. ⁵⁹ Iah-seh do-leh s-siu, yüong ken-zing-go si mô-pu ko-hao-ts, ⁶⁰ kyʻi en-leh gyi-zi-go zah-ngæn zôh-cʻih-læ ziu-veng-li: yi fæn ih-kwʻe do zah-deo seh læ veng meng-kʻeo, ziu kyʻi-de. ⁶¹ Keh-deo

yiu Meh-da-lah-go Mô-li-üô, teng keh bih-go Mô-li-üô, dziao-leh veng zo-kæn.

⁵⁷ 到夜快,有一個有佬走來,是<u>亞利馬太</u>人,名字叫勒<u>約瑟</u>,也是做<u>耶穌</u>門徒個。⁵⁸ 其來見<u>彼拉多</u>,討<u>耶穌</u>個 屍首。<u>彼拉多</u>就吩咐把屍首交代其。⁵⁹ <u>約瑟</u>馱勒屍首,用 乾淨個細麻布裹好仔,⁶⁰ 去安勒其自個石巖鑿出來壽墳 裏。又翻一塊大石頭塞來墳門口,就去了。⁶¹ 箇頭有<u>抹大</u> 拉個馬利亞,等箇別個馬利亞,朝勒墳坐間。

62 TAO di-nyi nyih, ziu-z yü-be-nyih-go di-nyi nyih, keh-sing tsi-s-deo teng Fah-li-sæ nying tu jü-long læ kyin Pe-lah-to, z-ka wô, 63 "Da-jing, ah-lah kyi-teh keh-go p'inzeh weh-zin wô, 'Ko-leh sæn nyih, Ngô we weh-cün-læ.' 64 Keh-lah ts'ing ng feng-fu Gyi-go veng lao-lao-k'ao-k'ao kwun-siu gyi tao di-sæn nyih; k'ong-p'ô Gyi-go meng-du yia-deo læ t'eo Gyi *s-siu*, ziu teng pah-sing wô, 'Gyi dzong si-nying cong-nyiang weh-cün-læ-de:' ka-ni, keh 'eo-deo-go hong-p'in pi zin-deo keng-kô li-'æ." 65 Pe-lah-to teng gyi-lah wô, "Ng-lah yiu ih-de ping: hao ky'i, 'eo ng-lah vu-

nyih-ts lao-lao-k'ao-k'ao kwun-siu *Gyi-go veng.*" ⁶⁶ Gyi-lah ziu ky'i, fong-bi fong-hao zah-deo, peh keh-de ping kwun-kæn, s-teh veng-mo lao-k'ao.

62 到第二日,就是預備日個第二日,箇星祭司頭等<u>法</u>利賽人都聚攏來見<u>彼拉多</u>,是介話: 63 「大人,阿拉記得箇個騙賊活前話: 『過了三日,我會活轉來。』64 箇勒請爾吩咐其個墳牢牢靠靠管守其到第三日,恐怕其個門徒夜頭來偷其屍首,就等百姓話: 『其從死人中央活轉來了。』介呢,箇後頭個哄騙比前頭更加厲害。」65 <u>彼拉多</u>等其拉話: 「爾拉有一隊兵,好去,候爾拉武藝子牢牢靠靠管守其個墳。」66 其拉就去,封皮封好石頭,撥箇隊兵管間,使得墳墓牢靠。

Mt. XXVIII.

KO-LEH en-sih-nyih, ts'ih-nyih-go deo-nyih t'in kw'a liang z-'eo, Meh-da-lah-go Mô-li-üô teng keh bih-go Mô-li-

üô læ k'en veng-mo.

過了安息日,七日個頭日天快亮時候,<u>抹大拉</u>個<u>馬利</u> 亞等箇別個馬利亞來看墳墓。

² [1]Keh-go z-'eo, di do-nyiang cing-dong-ko-de: ing-we yiu ih-go Cü-go t'in-s dzong t'in lôh-læ, fæn-ko *veng* meng-k'eo keh-kw'e zah-deo, ziu zo læ keh zah-deo-zông.

³ Gyi-go siang-mao ziang sin-din ka *liang*; i-zông ziang shih ka bah. ⁴ Kwun-kæn-go *ping* we-leh p'ô t'in-s ky'ih-hoh, hah-leh ziang si-liao ka.

² 箇個時候,地大樣震動過了^[1]。因為有一個主個天使 從天落來,翻過墳門口箇塊石頭,就坐來箇石頭上。³ 其個 相貌像閃電介亮,衣裳像雪介白。⁴ 管間個兵為了怕天使喫 惟,嚇勒像死掉介。

⁵ T'in-s k'æ k'eo, teng keh-sing nyü-nying wô, "Ng-lah hao-vong p'ô: ngô hyiao-teh ng-lah z læ zing ting jih-z-kô go Yiæ-su. ⁶ Gyi feh læ dông-deo; z weh-cün-læ-de, ziang Gyi wô-ko ka. Hao læ k'en Cü tsông-go u-sen. ⁷ Yi

hao kwʻa-kwʻa kyʻi, teng Gyi meng-du wô, Gyi dzong sinying cong-nyiang z weh-cün-læ-de; ping-tsʻia sin-jü ng-lah tao Kyüô-li-li kyʻi: læ keh-deo ng-lah we kʻen-kyin Gyi. Ngô z wô hyiang ng-lah dao-de."

⁵天使開口,等箇星女人話:「爾拉好留怕,我曉得爾 拉是來尋釘十字架個<u>耶穌</u>。⁶其弗來蕩頭,是活轉來了,像 其話過介。好來看主葬個烏碎。⁷又好快快去,等其門徒 話,其從死人中央是活轉來了,並且先如爾拉到<u>加利利</u> 去。來箇頭爾拉會看見其。我是話向爾拉道了。」

⁸ Gyi-lah kw'a-kw'a tseo-c'ih veng-mo, yi p'ô yi donyiang hwun-hyi; ziu peng-ky'i t'ong-pao Gyi-go meng-du. ⁹ Ky'i t'ong-pao meng-du z-'eo, Yiæ-su p'ong-djôh gyi-lah, z-ka wô, "Ts'ing en!" Gyi-lah tseo-long, bao-leh Gyi kyiah, pa Gyi. ¹⁰ Yiæ-su ziu teng gyi-lah wô, "Hao-vong p'ô: ky'i eo Ngô-go hyüong-di tao Kyüô-li-li ky'i; læ kehdeo we k'en-kyin Ngô."

⁸ 其拉快快走出墳墓,又怕又大樣歡喜,就奔去通報其個門徒。⁹ 去通報門徒時候,耶穌碰着其拉,是介話:「請

安!」其拉走攏,抱勒其腳,拜其。¹⁰ <u>耶穌</u>就等其拉話:「好甮怕,去謳我個兄弟到<u>加利利</u>去,來箇頭會看見我。」

¹¹ Gyi-lah ky'i-go z-'eo, keh-de ping li-hyiang yiu kyi-go tseo-tsing zing-li, pô keh-ky'i z-ken long-tsong t'ong-pao keh-sing tsi-s-deo. ¹² Tsi-s-deo teng tsiang-lao dô-kô jü-long, siang-liang-hao ziu coh hyü-to nying-ts peh keh-sing ping, z-ka wô, ¹³ "Ng-lah hao wô, 'Gyi meng-du yia-tao tseo-læ; ah-lah tang k'eh-c'ong z-'eo, pô Gyi s-siu t'eo-leh-ky'i-de.' ¹⁴ Tsong-toh ziah-z teh-cü, ah-lah ziu we ky'i ky'ün gyi, pao ng-lah hao fông-sing." ¹⁵ Gyi-lah do-leh nying-ts, tsiao kao gyi ka tso: keh-go shih-wô tao jü-kying Yiu-t'a nying wa læ-tih djün-ky'i.

¹¹ 其拉去個時候,箇隊兵裏向有幾個走進城裏,把箇 起事幹攏總通報箇星祭司頭。¹² 祭司頭等長老大家聚攏, 商量好就給許多銀子撥箇星兵,是介話:¹³ 「爾拉好話: 『其門徒夜到走來,阿拉打瞌睆時候,把其屍首偷勒去 了。』¹⁴ 總督若是得知,阿拉就會去勸其,保爾拉好放 心。」¹⁵ 其拉馱勒銀子,照教其介做。箇個說話到如今<u>个</u> 太人還來的傳去。

kyʻi, ziu-z Yiæ-su sô wô-ko-go sæn. ¹⁷ Kʻen-kyin Yiæ-su, ziu pa Gyi: tsih-z yiu-sing læ-tih nyi-ʻôh. ¹⁸ Yiæ-su tseo-long-læ, teng gyi-lah z-ka wô, "Tʻin-zông di-ʻô væn-pah gyün-ping yi-kying kao-dæ Ngô de. ¹⁹ Keh-lah ng-lah hao kyʻi tsiao væn-koh-go pah-sing tso meng-du, yüong Ah-tia teng Ng-ts teng Sing-Ling-go ming-deo ʻang si-li peh gyilah; ²⁰ væn-pah z Ngô sô feng-fu ng-lah go, kao gyi-lah kyʻi pao-siu. Ping-tsʻia Ngô nyih-nyih teng ng-lah dô-kô læ-tong, ih-dzih tao z-shü mah-go nyih-ts." Üô-meng.

¹⁶十一門徒就走到<u>加利利</u>一座山去,就是<u>耶穌</u>所話過個山。¹⁷看見<u>耶穌</u>,就拜其,只是有星來的疑惑。¹⁸ <u>耶穌</u> 走攏來,等其拉是介話:「天上地下凡百權柄已經交代我了。¹⁹ 箇勒爾拉好去招萬國個百姓做門徒,用阿爹等兒子等聖靈個名頭行洗禮撥其拉。²⁰ 凡百是我所吩咐爾拉個,

教其拉去保守。並且我日日等爾拉大家來東,一直到時世 末個日子。」亞們。